

785 Gift of B.C. High

~~1.50~~

4912

Grant

Maffei, Giovanni Pietro, S.J.,
1533-1603.

(copy 2)

~~m~~
119

BK

4700

.47

M344

1458

JEFFERSON


COLLEGE

DOMESTIC
LIBRARY

HIGH SCHOOL

OLC 17375242

- 31727205






BOSTON COLLEGE

DOMESTIC
LIBRARY

HIGH SCHOOL



**DIVINÆ
GLORIÆ.**



*...potio-
...dice-
tur, quam Tibi,
ô DIVINA
GLORIA? An non, hanc tu
ipsa vitam texuisti? Et is, cu-
jus illa est, num Opus est tuum?
Num suam, ipse Tibi vitam,
dum vivit, prius consecravit;
quàm illam, evulgaremus nos,*

A

922
HIGH SCHOOL

postquam vixit? Quid aliud
spiravit ille, dum spiraret ad-
huc mortalis hujus vitæ au-
ram, nisi Te? Quid præter Te,
in ore habuit? Quid scripsit
unquam, quod tibi non adscri-
pserit? Quid gessit, aut sensit,
quod non dicarit? Tu, illius
eras Meta cordis unica; Tu
Cogitationum Scopus omnium,
Animique Centrum, ac Vitæ
Finis. Inchoaverat quidem,
hanc malè Vitam, Humanæ
Gloriæ manus imperita; pri-
moresque, vano conatu, duxe-
rat lineas; pinxeratque nihil,

nisi umbras , nisi recessus : At
Tu, DIVINA OPIFEX,
hos errorum recessus , umbra-
rumque naves delesti luce tua,
factisque splendidis ; Tuoque
imponens coronidem Operi, fe-
cisti Operæ pretium, IGN A-
TIV M dum perfecisti , non
minori dignum præmio,quàm
Te ipsa. Tibi ergò, inscribenda
hæc vita fuit, quæ, antè fuit
tua,quàm scriberetur. Debit,
Opus Tibi nuncupare suum,fa-
cta qui scripsit ; Cui se totum
Ille manciparat , qui scripta
fecit. In gloriæ certè jacerent, ac

*sine Vita, hujus Vitæ chara-
cteres emortui; nisi glorioso il-
los ambires, radiorum Titulos;
ipsamque Libri frontem, no-
mine tuo coronares. Hac luce
Nominis, pellicies ad hujus
Vitæ lectionem, blandiùs ocu-
los; & illustrabis, spero, Le-
gentium mentem; ut facien-
da sciant, qui facta legent;
Exemploque discant IGN A-
TII, suam Tibi dicare vitam;
si dignam, quæ tradatur po-
steris, actum velint.*

Extrait du Privilege du Roy.

PAR Lettres Patentes du Roy, données à Fontaine-Bleau, le 19. Septembre 1683. Signées de Valentin, & scellées du grand sceau de cire jaune; Il est permis à ANTOINE MOLIN, Marchand Libraire à Lyon, de faire imprimer vendre, où debiter, les livres intitulez, *Flos Latinitatis, ex Auctorum Latina lingua principum monumentis excerptus*, Auctore Patre FRANCISCO POMEY, è Societate JESU. *Amalthæum Prosodicum, sive brevis, & accurata vocum omnium Prosodia, ab uno è Societate JESU. Vita S. Ignatij Fundatoris Societatis JESU*, Auctore JOANNE PETRO MAFFEIO, ejusdem Societatis Sacerdote; Et, *Indiculus Universalis rerum fere omnium quæ in mundo sunt, scientiarum, artiumque nomina aptè breviterque colligens*, en Latin, & en François, par le P. FRANÇOIS POMEY, de la Compagnie de JESUS, & ce durant le temps, & espace de six années, avec défences à toutes personnes d'imprimer, de faire imprimer lesdits livres, sur les anciennes copies, ny autrement en quelle maniere que ce soit, sans le consentement dudit MOLIN, sous les peines portées par lesdites Lettres.

Registré sur le livre de la Communauté des Libraires & Imprimeurs de Paris, le 14. Octobre 1683.

Achevé d'imprimer pour la première fois, le 22^e Octobre 1683.

Les Exemplaires ont esté fournis.

Signé C. ANGOT, Syndic.

Signifié aux Syndics des Marchands Libraires, & Imprimeurs de cette ville de Lyon, par l'exploit de JEAN CHOL, Huisfier Audiencier en ladite Ville, le 25. Octobre 1683.



EFFIGIES
SANCTI IGNATII
FVNDATORIS SOC. IESV

Per. A. G. 1644

Fecit



SANCTI
IGNATII
VITÆ
LIBER PRIMUS.

Ortus ejus , & Educatio.

CAPUT I.



N ea Hispaniæ re-
gione, quæ ad Py-
renæum pertinet, ac
vulgi sermone Gui-
puzcoa nominantur,
in primis clara est
Loïoleiæ familia. Ejus
familiæ princeps Bertramus, Ognis &
Loïolæ dominus, quæ loca sunt in fini-

2 S. I G N A T I I V I T Æ

bus urbis Aspeithiæ , in matrimonium ductâ Marinâ Sone , æquè clari generis fœmina, quinque suscepit ex ea filias, filios octo: quorum minimus natus, fuit Ignatius is , quem Societas J E S U parentem agnoscit ; cujus de vita & moribus , quæ nobis fuerint comperta , in unius Dei gratiam gloriamque , litteris mandare decrevimus. Hisce ergo parentibus natus Ignatius est anno post Virginis partum M. CD. XCI. regnantibus in Hispania Ferdinando & Elisabetha , cognomento Catholicis. Ac de prima ipsius pueritia id unum constat, haud ita severâ disciplinâ educatum à suis fuisse ; atque ab ipsis incunabulis , ut in opulenta domo, profanos admodum hausisse spiritus : deinde litteris vixdum à limine salutatis ; cùm esset eximiâ & animi & corporis indole , continuò in Ferdinandi regiam à patre missum , veteri Hispaniæ more , quo in regno , Principum liberi, ea ferè conditione ac jure nascuntur , ut maximus ætate duntaxat, in patrimonio imperiòque succedat ; reliqui , sive ad acuendam gentis industriam, sive ad splendorem familiæ in uno capite retinendum , portiuncula quadam hæreditatis aspersi , quæ tenuem in victum cultumque sit satis ; vel studiis doctrinæ militiæve dant operam , vel aulæ regum-


que præsidio, ad opes gloriámque nituntur. Hic ille cum honorarios inter Ephēbos aliquandiu apparuisset, aulicis imbutus moribus, ad Antonium Manricum sese contulit Naiarensium Ducem, ex iis, quos in Hispania, Magnates appellant; quo cum, Loioleia genti, necessitudo vetus intercedebat. Atque apud hunc, domi forisque in honore habitus, rei militaris tyrocinia posuit: & quod iis ferme usu venit, qui nondum cœlestes delicias degustarunt, id ipsum Ignatio contigit, ut ardenti laudis humanæ studio & communis consuetudinis impetu abreptus, cum esset in corporis ornatu elegantissimus, equorúmque & armorum usu præcelleret; quod sibi datum fuerat temporis ad negotiationem salutis æternæ, id ille miserabiliter, ut plerique mortalium, partim in factionum rixarúmque periculis, partim in amatoria vesania, & cætera sæculi vanitate consumeret. Verumtamen inter ejusmodi vitia, & cœcos errores, præclara quædam emicabant bonæ ac religiosæ mentis indicia. Primum enim in tanta licentia militari, tamque corruptis hominum moribus, quamvis animo costernatus esset interdum, & multis undique cinctus angustiis; nulla tamen ipsius atrocior unquam audita vox est, quales multæ à nefariis ho-

4 S. IGNATII VITÆ

minibus in Deum ac Dei providentiam vulgò jactantur. Nec solùm ab omni verborum impietate semper abhorruit, sed etiam sacra omnia sacrorùmque antistites, naturæ perpetuo instinctu, admodum religiosè reveritus est. Erat præterea intactus ab avaritiæ sordibus, & à lucri cupiditate vehementer alienus: quod cùm aliàs, tum verò in expugnatione urbis Naiaræ, quæ in Cantabriæ finibus est, perspici potuit: quam jure belli cùm Dux militi diripiendam dedisset; Ignatius, quamvis ad ipsum, victoriæ pars non exigua pertineret; tamen nec præsentis prædæ dulcedine, nec cæterorum exemplo adduci potuit, ut sese alienæ rei contactu pollueret; non Christiano solùm, sed etiam ingenuo homine id indignum existimans. Quæ ipsius altitudo animi, in privatis quoque dissidiis ac simultatibus eminebat; ut si quando ex certamine dignitatis (ut sit) ad manus pugnâque venisset, si locus reconciliationi daretur, illico unà cum armis odium omne deponeret, & cum inimicis in gratiam, planè bona rediret fide. Neque verò eidem in magnis arduisque negotiis capeffendis alacritas, vel gerendis consilium & cautio deerat; quocirca inter quosdam Cantabriæ populos gravi orta seditione, legatus ad eos, à Duce Naiaræ, brevi con-

LIBER PRIMUS.

troverfias omnes magno partis utriufque confenfu & approbatione diremit : Ac licèt juvenis admodum efferet ætate; in agendo tamen, tractandisque hominum ingeniis, jam tum fenilis quædam in eo maturitas apparebat; prorfus, ut negotium nullum ferme fufceperit, quod non ad optatum exitum, fua lenitate ac virtute perduxerit: Quamquam ob imperitiâ rerum divinarum, hæc tam egregia animi bona & quali talenta non optimè collocabat interdum : ad hominum videlicet gratiam, ac fui ipfius incrementa, iis artibus utens, quas ad unius Dei honorem & gloriam omnino referri oportuerat.

*Converfio ejus ad Christum.*

C A P. I I

HU NC maxime in modum, adolescentiâ atque ipfo ætatis flore confumpto, cùm annum ageret jam nonum circiter & vigefimum, à miferabili errore certoque æternæ vitæ periculo in rectum falutis iter, fummo Dei beneficio revocatus eft. Tota autem converfionis ratio fuit ejufmodi : Ardebat eo tempore

6 S. IGNATII VITÆ

Hispania, intestini belli tumultibus; quam nactus occasionem, Franciscus Galliae Rex, Navarrae Vasconum, quæ Guipuzcoam attingit, Henrico Alibreto cognato suo recuperandæ, cujus pater ex ea Ferdinandi Catholici armis olim exactus fuerat; Andreæ Foxium, cognomento Asparotum, cum exercitu jussit in eas regiones impetum facere; qui celeritate usus, cum aliquot loca improvise adventu cepisset; cùmque nobilitas Henrici cupida, ad Gallum sese quotidie adjungeret; Naiaræ dux, qui Navarrae summo cum imperio præerat, ejus rei fama commotus, in ulteriorem Hispaniam ad auxilia contrahenda profectus est, Ignatio paucisque præterea, Pompelone, custodiæ causâ relictis. Ac cæteri quidem appropinquante Gallorum exercitu, magnitudine pedestrium & equestrium copiarum exterriti, & simul diffusi oppidanorum animis, tempori cedere & urbem relinquere omnino decreverant: Ignatius verò, multis verbis homines ab eo consilio revocare conatus, ubi se nihil proficere hortando perspexit, ardentibus oculis detestatus ignaviam perfidiâque, spectantibus omnibus in arcem solus introit, paratus illam cum aliquot in præsidio relictis omni opetueri: quo virtutis exemplo permo-

LIBER PRIMUS.

rus alius quidam Ignatij in studio bellicæ laudis æmulus, eandem aleam subiit : reliquis verò salus , quàm aut fides aut gloria fuit antiquior. Ventum deinde in consilium est à custodibus de summa rei: cùmque in tanta propugnatorum paucitate contra tantas hostium copias negarent plerique, locum obtineri possediutius , ac seniorum præsertim sententiæ ad perfectionem inclinarent ; Ignatius , quo erat animi & corporis robore , quàm acerrimè sese rursus opposuit , remque disjecit. Interea Galli , resistente nemine , propiùs ad urbem accedunt , & magna civium voluntate admissi , castris ad arcem positis, Præfectum præsidij ad colloquium evocant. Ille accepta fide cum tribus duntaxat egreditur , in quibus erat Ignatius ; qui cùm ab hostibus proponi conditiones iniquiores vidisset ; exarsit nimirum , easque conditiones tam acri ac vehementi oratione commilitonibus dissuasit , ut ad extrema omnia perpetienda potiùs , quàm arcem deferendam cunctos accenderit. Nec mora : Galli omisso colloquio acriùs instare , tormentis mœnia quatere , atque diruere : undique ascensum tentare : Hispani contra , Ignatij præsertim exemplo atque adhortationibus incitati , fortiter sese defendere , subeuntem hostem gla-

diis, telis, contis arcere: Quoad Ignatio, ante alios dimicanti, globi vi excussus è muro lapis, lævam haud ita graviter læsit tibiam; globus verò ipse quamquam impetu refracto subsiliens, dextram adeò labefactavit atque confregit, ut è vestigio semianimis alienata mente corruerit. Tum verò debilitati animis cæteri, & deditio facta. Ignatium porrò stratum, vel ad colligendam clementiæ famam, vel etiam virtutem in hoste admirati, Galli benignè suscipiunt, & in urbem ex arcè translatum, in pristino hospitio collocant, medicisq; adhibitis, & rebus omnibus necessariis diligenter curant. Huic Gallorum benignitati, pro sua animi magnitudine, egregiè respondit Ignatius; quippe tantum aberat, ut eos odisset, à quibus in illam calamitatem, vitæque discrimen erat adductus, ut cùm in lecto decumberet, singulos blandè comitèrque compellans, omnia ferè sua, in eos, amoris causa diviserit; atque hunc clypeo, illum pugione, alium thorace donarit. Interjectis deinde aliquot diebus, cùm gravius laboraret, quam ut brevi tempore sanari posse videretur; ad cæteram humanitatem illud etiam additum à Gallis, ut Ignatium, lecticâ Loiolam usque (neque enim longè aberat) deportandum cura-

rent, qui pèramanter à suis acceptus, cùm ingravescente in dies morbo periculosius ægrotaret, accersiti confestim undique medici, citre inspecto, severè pronuntiant, ossa illa, sive id prioris chirurgi vitio, sive itineris agitatione contigerit, nequaquam esse bene locata: neque verò, nisi ea coagmentatione denuò resoluta, frustisque suo loco repositis, posse ullo modo fieri, ut coalescant. Qua tam acerba denuntiatione Ignatius minimè exterritus, non modò statim æquo animo sese paratum ostendit ad omnia subeunda, sed etiam inter ipsam curationem, quamvis esset asperrima, nullum aliud indicium dedit doloris, nisi ut coactos in pugnum digitos valde constringeret. Ex eo die morbus majorem in modum est auctus; cùmque jam Ignatius omnes ferè cibos haustusque stomacho fastidiente respueret, aliàque in eo cernerentur lethalia signa; suorum admonitu sacris, quæ ad expiandum animum pertinent, ritè procuratis, ipso B. Petri Apostoli pervigilio, cunctis mœrentibus, eò deductus est, ut medici prorsus actum affirmarent, nisi ante mediam eam noctem vis morbi remitteret. Venerabatur jamdudum Ignatius præcipuo quodam cultu principem Apostolorum: quin etiam ejus laudes mi-

litariter olim, carmine Hispanico celebra-
 verat : cujus profectò pietatis fructum
 non exiguum tulit : si quidem illa ipsa de-
 cretoria nocte , per quietem videre sibi vi-
 sus est eundem Apostolum , optatam sibi
 valetudinem divinitus afferentem. Nec
 sanè in irritum ea visio recidit : quippe
 continuò levare doloribus , cibòque re-
 fici est cœptus. Iamque Dei beneficio
 periculum mortis evaserat , magnaque
 suorum gratulatione , melius habebat in-
 dies : cum repente animadvertit os quod-
 dam , genu sub ipso fœdiùs præminere :
 quod quoniam præter cætera incommoda
 impedimento etiam sibi videbat fore,
 quò minùs graphicè, quàm soleret ac vel-
 let , ocreatus incederet , (ut erat idem &
 patientiæ militari , & urbanæ munditiæ
 & elegantiae apprime deditus) percontat-
 us est medicos , possène ullo pacto de-
 formitas tolli. Qui cùm respondissent
 posse utique , sed dolore omnium , quos
 ad eam diem sensisset , maximo & acerbis-
 simo ; propterea quòd in eam sedem frag-
 menta jam firmiter coaluerant ; non du-
 bitavit Ignatius , ingenti omnium vel ad-
 miratione vel metu , concinnum ac de-
 corum corporis habitum anteferre mani-
 festo vitæ discrimini , secarique de sen-
 tentia medicorum, os jussit, clariore etiam,

quam antea , fortitudinis ac patientiæ documento : quandoquidem in ea carnificina (quæ quò lentior , eò fuit horribilior) non modò ligari tenerive se non est passus , verùmetiam iis , qui aderant , pavore propemodum exsanguibus , ab omni prorsùs querimonia gemitúque se ipse continuit. Post hæc , doloribus magna jam ex parte mitigatis , nondum tamen gressu recuperato , nec pedibus ad insistendum idoneis ; interea dum jacentis corpus , terrestres medici persanare conantur , ejusdem animi vulnera curare medicus cælestis aggreditur. Cum enim affixus lectulo Ignatius , fallendi temporis causa , prophanum quempiam librum poposcisset ex iis , quos antea per otium lectitare consueverat ; divino planè consilio factum est , nullus ut eo tempore , domi , liber esset ejusmodi : at verò longè meliores alij duo reperti sunt , Hispanico sermone conscripti ; quorum alterius , Vita Christi ; alterius , Sanctorum Flores , erat inscriptio. Ea videlicet lectio salutis initium attulit homini. Dum enim oblatos sibi libros variis locis quasi aliud agens delibat , sensim capi cœptus est pulchritudine eorum , quæ scripta reperiēbat ; atque adeò , inter ipsam lectionem , ubi quidpiam insigne


cognoverat, subsistere, secum ipse deliberans: Quid si præclarum hoc sancti Dominici facinus, quid si hoc sancti Francisci, Deo frerus aggrediar? Neque verò, cum hæc & alia sibi multa proponeret, res occurrebat ulla tam ardua, tamque difficilis, quam non perficere sese posse generosa quadam alacritate confideret. Quæ cum apud se diutiùs agitasset, emergabant rursus rerum inanium voluntates, & sæcularia desideria: quorum sese nonnullis adeò manciparat, ut dum eorum vel adipiscendi rationem exquirat, vel potiundæ spem animo concepit, plures interim horas per imprudentiam in ea cogitatione defixus hæreret. Jamque priora illa propemodum exciderant, accensósque nuper igniculos pietatis, voluptatum illecebræ & perniciofa rerum fluxarum blandimenta restinxerant; cum periclitanti servulo Divina Bonitas opem celeriter afferebat; ex eorum videlicet recordatione, quæ legerat, meliorem ei mentem & consilia saniora submittens. Atque in hac item commentatione tamdiu morabatur, donec interventu cujuscumque, aliò mentem animúmque converteret. Hac ille vicissitudine & quasi conflictu, dies aliquot mirum in modum exagitatus, cum in ejus pectore voluptas &

virtus , pænè ex æquo certarent ; contrarias in partes magna sua perturbatione distrahebatur , incertus animi , hancine viam , an illam , cùm primùm posset , insisteret. Verumtamen inter alternas fluctuantis animi propensiones , illud intererat , quòd blandis illis rerum fluxarum imaginibus , quandiu præsentes obversabantur , tamdiu titillabatur Ignatij mens : abeuntibus verò succedebat illicò amarus quidam torpor , & ægritudo , & sibi met displicentis animi tædium. At contrà , præclari illi ad Christianam laudem impetus , cogitationesque de adæquanda vigilantia & sobrietate Sanctorum , de votivis peregrinationibus , de victu cultúque in primis horrido & aspero ; non modò cùm aderant , animum insolita quadam jucunditate mulcebant , sed in recessu quoque , tristitia subeunte nulla , securum hilarémque præstabant. Sed enim , tantum hoc ille discrimen , sæculi tenebris occæcatus adhuc , hebésque ad subtiliora hominis interni iudicia , quasi ignotum quidpiam præteribat ; quoad clariore demum oborta sibi luce , mentis aciem accuratiùs in eam varietatem cœpit intendere ; ac denique non sine admiratione quadam animadvertit , ab illis cogitationibus , ut erant inanes ipsæ , sic

se jejunum & aridum ; ab his autem , velut à pabulo salutari , lætum vegetumque discedere : Liquidòque perspexit , fucata & infidiosa voluptas , quantum à vero & solido gaudio & suavitate distaret. Atque hanc primam de intimis animi sensibus motibúsque ratiocinationem , habuisse fertur Ignatius : ad quam ubi major deinde rerum divinarum usus accessit , tantam in spirituum discretione (quæ consummata sapientiæ virtus est) solertiam atque peritiam est consecutus ; ut egregia etiam illius generis præcepta in eo libro , qui , Exercitiorum , appellatur , posteritati reliquerit. His ergo observationibus & assiduis librorum monitis è lethali animæ veterno excitatus , antea actæ vitæ peccata & infinitam in se Dei clementiam aliquando cœpit agnoscere ; nec solùm de mutandis in posterum moribus , verùm etiam de expiandis omni ratione delictis , placandoque Numine , seriò cogitare. Atque in hanc deliberationem ingressus , denuò sese ad Christi Domini Sanctorumque sectanda vestigia , occulto quodam instinctu acriter sentiebat impelli ; eorum præcipuè , qui in se ipsi quam maximè duri ac severi existissent : Artium quippe spiritualium & Christianæ philosophiæ rudis & ignarus

adhuc, omnem ferè sanctitatis & officij perfectionem, in asperitate vitæ & in voluntaria corporis afflictatione statuerat. Quocirca jam tum agitabat animo, simul atque per valetudinem liceret, nudis pedibus Hierosolymam petere, ac frequenti verberatione longoque jejunio, tantas peccatorum pœnas ultro suscipere, quantas videlicet ab excelsa magnoque animo, salutare odium sui, & ardens divinæ gratiæ promerendæ studium, exigebat. Jamque rectis euntem sensibus, & optimâ quæque expetentem, longè vehementius incitavit divina visio. Etenim nocte quadam, vigilantibus, augustissima specie ac beatissimo lumine fulgens, MARIA Virgo unâ cum puerulo JESU, non modò sese palam ostendit, verùm etiam incredibili benignitate spectandam aliquandiu præbuit: Quo viso mirificè recreatus Ignatius, tantum repentè odium fastidiumque concepit eorum, quæ apud cæcos mortales prima putantur, ac præsertim quæ cum inhonestâ voluptate conjuncta sunt, ut omnes rerum illarum quantumvis diuturno usu ac vetustate corroboratas imagines, ex hominis memoria confestim aspectus ille deterferit. Accessit ad hæc illud quoque non leve Dei beneficium, quòd ei in omnem deinde vitam, proprium ac stabile

mansit : ut quotiescumque sublati in cœ-
lum oculis astra suspiceret , (quod sanè
sæpe faciebat ac diu) mortalia cuncta illi
repentè sordescerent ; & miro quodam
æternæ patriæ desiderio raperetur.



*Ad Montem-serratum , religionis
causâ proficiscitur.*

C A P. III.

INTEREA simul & animo &
corpore convalescens , è lectulo
surgere , & intra cubiculi fines
paulatim crura explicare atque ingredi
cœperat ; nihilque longiùs ei videbatur
quam ut de cognatione sua & de domo
patris exire , & præteritæ vitæ peccata
quàm acerrimè vindicare sibi liceret. Sed
quia nondum erat ad iter faciendum ido-
neus , constituit interim præclarissimas
quasque Christi Domini , Sanctorumque
res gestas , memoriæ causâ describere : at-
que ad id ipsum , exquisiti cujusdam nito-
ris & elegantia , codice comparato ; quæ
de virtutum exemplis præcipuè admira-
batur , in eum codicem vario picturæ ge-
nere

nere, quàm compositissimis & quàm clarissimis literis, ordine referebat. Atque huic operi dum insistit ardentius, quamquam sua de instituendo novo genere vitæ, consilia, mortalium nulli aperuerat; hæc tamen tanta scribendi ac legendi assiduitas, contemptus corporis, frugalitatis amor & parcimoniæ, sermo quotidianus non ad urbanitatem, vel ad ambitionem, ut antea, sed ad modestiam pietatémque compositus: hæc, inquam, & alia non obscura immutati animi indicia, celeriter illum domesticis prodiderunt. In iis, Martinus Garzia, frater natu maximus, qui demortuo jam pridem Bertramo, in dominaturéque familiaris administratione successerat, suspicatus id quod erat, Ignatium vel morbi vexatione, vel eorum quæ legerat admonitione compunctum, ac pertæsum vitæ prioris, novum aliquid ac magnum moliri, atque etiam fortasse nuntium rebus humanis velle remittere; commotus animo vehementer, hominem se vocat, variisque interrogationibus blandè pertentans, ad extremum, per communes parentes, perque fortunas omnes obtestatur & obsecrat, videat etiam atque etiam quid agat, quò progrediatur, neu quid consilii capiat, quod vel ipsi munitum & exploratum ad gloriam & opes iter


impediat ; vel sempiternam Loioleiaæ familiæ , dedecoris notam inurat. Ad quæ Ignatius breviter , quò se quam primùm à fratre expedirèt , satis memorem fore sese respondit officii : & simul , quoniam de recuperata propemodum ejus valetudine , ad Naiaræ Ducem nuntii venerant, in oppido finitimo , cui Navarreto nomen est, eo tempore commorantem ; veniam à fratre petit, Ducis pro amicitia revisendi ; ac per eam causam , duobus duntaxat assumptis famulis , eques in viam se dedit, ac brevi Navarretum pervenit incolumis. Ibi Duce, amicisq; ita salutatis, ut arcana consiliorum suorum quàm accuratissimè tegeret , simul etiam certâ pecuniæ summâ in usus pios insumptâ , Barcinonem petere, ut Hierosolymas inde contendere, famulosque dimittere , statuit , quò liberius remotis arbitris , in suum sævire corpus, & debita vitæ licentiùs actæ supplicia , à semetipso posset exigere. Solus ergo per summam dissimulationem Navarreto profectus, primùm omnium , religionis causâ, celeberrimam Beatæ Virginis ædem adire decrevit, quæ in Montserratò à monachis Benedictinis incolitur ; estque Barcinonem è Navarra petentibus , minimè devia. Deinde reputans apud animum suum , partim voluptates,

quibus antea indulserat, partim etiam periculosum & grave bellum, quod sibi rursùm à carnis illecebris, atque ab inferioris animæ viribus imminebat; omni ratione se, contra domestici hostis insidias muniendum, est arbitratus. Ergò non solum institutam, ex quo die, Lolola discesserat, consuetudinem, obfirmato retinuit animo, ut singulis noctibus, pœnæ nomine, se accerrimè verberaret; sed etiam ratus, nullum continentiae præsidium posse firmiter inveniri, quàm Dei Matris ejusdemque Virginis perpetuæ atrocitatem, recenti præsertim illius in se clementiâ ac benignitate invitatus; in ejus maximè clientelam fidemque confugit; ac studio virtutis incensus, illicò fecit, ut eidem Virgini Beatissimæ, sese irrevocabili voto castitatis obstringeret. Quod religiosi animi obsequium & sacrificium, pro sua infinita bonitate ratum & gratum, Deus ipse videtur habuisse: quandoquidem, ipsa Virgine deprecante videlicet, ex eo tempore ad extremum usque diem, Ignatius planè omni sensu libidinis caruit. Cæterùm quò faciliùs omnes intelligant, quàm sit periculosum & anceps, in Christianæ philosophiæ curriculo, sine rectore ac magistro versari; non omitтам hoc loco, quod ambulanti

in fervore spiritus, per eos ipsos dies, Ignatio contigit. Erant eo tempore in Hispaniæ finibus, Maurorum multæ reliquæ; quos nefariæ superstitioni Mahometis addictos, Ferdinandus Catholicus haud ita pridem è suo pepulerat regno. Ex ea igitur sæce, quidam insidens mulo, Ignatium fortè affecutus, comitem sese illi adjunxit; ac nonnulla primùm (ut fit) de itinere sciscitantur; variis deinde sermonibus eò deventum est, ut de singulari Mariæ virginitate differerent. Quam cum nefarius ille, ante partum quidem integram illibatamque fuisse fateretur, à partu verò nequaquam; contra Ignatius, ab ejusmodi errore quibuscunque poterat rationibus, hominem revocare contendere; post multam altercationem magis magisque obstinatus impius ille, cum oblatam sibi veritatis lucem intueri nollet; repentinè, non sine rabie quadam, subditis mulo calcaribus antecessit, seque celeriter ex Ignatii conspectu proripuit. Quo facto vehementius irritatus Ignatius, parum abfuit, quin citato gressu persequeretur abeuntem, & pugione confoderet; facinus indignum existimans, non tam contemptum relictumque superbè se, quàm de summa castimonia & sanctitate Regiæ Angelorum, ausum fuisse vilissi-

mum caput , ore polluto detrahere : cū-
 que militari etiam tūm spiritu , religionis
 officiique momenta perpenderet , sese vix
 pietati satisfacturum putabat , si tantas
 blasphemias patéretur inultas , neque ab
 impuro Dæmonis mancipio , pœnas pe-
 tulantis linguæ reposceret. Verumtamen
 incitatum jam generosi pectoris impe-
 tum retardabat suspicio latentis in tam
 speciosa cogitatione piaculi ; metusque
 probabilis , ne per hanc animadversio-
 nem , & cœleste Numen , & eam ipsam,
 quam defendere conabatur, Virginem of-
 fenderet. Cū igitur multa secum agita-
 sset , motu corporis pariter atque animo
 varius ; ad extremum, sanè quàm præci-
 piti consilio statuit ad bivium usque pro-
 cedere , unde Maurum ex habito collo-
 quio ad proximum pagum noverat diver-
 tisse : in eo bivio laxatis omnino mulæ,
 qua vehebatur, habenis, ita de re tota in-
 terpretari , ut si bestia ipsa per se , Mauri
 vestigiis insisteret, non dubitaret quin ac-
 cepta futura esset ultio Majestati divinæ :
 sin minùs , pro certo putaret, nequaquam
 id à se officii, Deum Beatamque Virginem
 postulare. Hac ille mente processit ad bi-
 vium : cūque pagus ille, quem diximus,
 abesset diverticulo passuum non ampliùs
 quadraginta , via facili ac spatiosa, planè

divinitus factum est, ut sponte sua jumentum angustiore via Barcinonē versūs iter arriperet. Atque hunc in modum Ignatius in re tam gravi, nullo pia ipsius studia regente periclitatus, lethalis noxæ crimen felicius effugit, quàm sapientiùs. Inde progressus ad vicum à Monte-serrato haud longè distantem, de peregrinatione Hierosolymitana, deque asperiore vita quamprimum ineunda mirè sollicitus, viatorium ibi coëmit ornatum, sparteos videlicet calceos, talarem è sacéo tunicam, funemque pro baltheo, tornatilem baculum, & in usum aquæ, cucurbitam. Quæ omnia, ut Christi paupertatem non erubescere, & perversam recti verecundiam deponere paulatim assuesceret; suspensa propalàm ex ephippiis, ad montem usque lætus advexit.



Acta ejus in Monte-serrato.

C A P. I V.




Uò, simul atque pervenit, templum ingressus, ac Numine salutato; nihil antiquius habuit, quàm ut per sacram totius antea actæ vitæ confessionem, contractas animi sordes elueret;

qua confessione in primis fideliter atque accuratè de scripto peracta per triduum, summa deinde cum veneratione ad Sacramentum Altaris accessit. Contulit etiam cum eodem patre, qui sibi confitenti aures dederat, omnia sua consilia cogitationesque de imitatione Sanctorum, quæ ad eam usque diem prorsus nemini patefecerat. Præterea, quidquid habuit pecuniæ, totum id in Christi Domini gratiam pauperibus benignè divisit. Dein silentio noctis ejus, cui dies festus Angelicæ salutationis illuxit, pretiosa vestimenta, quibus erat ornatus, quàm occultissimè potuit, pannofo cuidam ex infima plebe largitus, confestim oprato illo sacco sese alacer induit, ac fune præcinxit; dextro pedi, quod ex reliquiis morbi, singulis etiam tum noctibus intumesceret, calceum induxit è sparto; sinistrum utique nudum relinquere, & capite idem nudo prorsus decrevit incedere. Sed quia non ignorabat, plurimos pallio tenuis esse philosophos, vestemque faciliùs multò mutari quàm mentem; omni ope sibi enitendum existimavit, ut illa exterioris amictus insignia, ad intimos animi sensus occulta quadam affinitate pertingerent: Cùmque accepisset in more positum olim fuisse, ut nobiles Equites, antequam in ordines re-

ferrentur, in sacris ædibus noctem unam armati excubarent, (quod in Hispania, Pervigilium armorum appellant) militarem illum ritum ad rudimenta Christianæ perfectionis in semetipso transferre constituit. Igitur gladio ac pugione, quibus antea mundo meruerat, è tholo suspensis, novo instructus armorum genere, totam eam noctem pervigil ante aram sanctissimæ Virginis, modò stans, modò nixus genibus, præteritorum veniam demissè precari, divino cultui devovere sese, ac Beatam præcipuè Dei Matrem intenta supplicatione propitiare non destitit. Atque hunc in modum Christianæ militiæ nomen ex animo dedit Ignatius anno post Christum natum M. D. XXII. quo fermè ipso tempore, ut à multis non sine admiratione quadam animadversum est, Martinus Luther infamis hæresiarcha, magnis in Germania motibus excitatis, jussus à Carolo V. Imperatore adesse Vormatiæ, malè pressum ad eam diem virus opinionum suarum effudit in illo conventu palàm, Sedique Apostolicæ & Catholicæ veritati nefarium atque impium bellum temulentus indixit; ut satis appareat, cùm maximè furiam illam contra omnia divina & humana jura legesque sacratas obarmaret Satanas; tùm ex al-

tera parte , præter alia militantis Ecclesiæ
 robora , novum etiam hunc Ducem exci-
 tatum , divinæ providentiæ nutu quem
 Christus Imperator & ipsum , & sectato-
 res ipsius, obligatos religionis arctissimæ
 Sacramento , adactosque nominatim in
 verba Romani Pontificis , furori ac libi-
 dini hæreticæ pravitatis opponeret.



Ardores ejusdem, in studio pœnitentia.

C A P. V.

SACRA igitur vigiliâ, quemadmo-
 dum dicebamus, exactâ, quò ce-
 lebritatem hominum famamque
 sanctitatis vitaret Ignatius, nondum certa
 luce, relicto monachis jumento, pedes ip-
 se, obvoluto etiam tunc fasciis altero cru-
 re claudicâs, per summû laborem à Mon-
 te-serrato discessit, & è via militari pau-
 lò pòst deflexit ad oppidum Barcinonensis
 agri Minorellam, (hodie Manresam vul-
 gus appellat) novẽ ferẽ millibus passuum
 à Monte-serrato : ubi antequam longin-
 quæ & periculosa peregrinationi Hiero-
 solymitanæ sese committeret, sæviante
 præsertim Barcinone per id tempus pesti-
 lentia , devio & obscuro loco aliquandiu
 delitescere, & humilitatis Christianæ, quæ

cæterarum est parēs custōsque virtutum ,
 solida jacere fundamenta decreverat. In-
 terea mendicus ille , quem Ignatius pridie
 suis vestimentis induerat, cū ex insoli-
 to ornatu in furti suspicionem venisset ,
 illicō à loci magistratibus comprehendi-
 tur, & divinam humanamque frustrā im-
 plorans fidem in vincla conjicitur. Cū-
 que inter quæstionem ea sibi à viro quo-
 dam nobili clām donata jurejurando af-
 firmaret, notasque corporis, ignarus no-
 minis, ederet ; conquiritur extemplō dili-
 genter Ignatius: cū nusquam appareret,
 mittitur ad eum insequendum festinē via-
 tor ; qui ægrē procedentem facilē conse-
 quutus , quærit ex eo num cui quidpiam
 in Monte-serrato donaverit. Ad eam vo-
 cem , id quod erat , suspicatus Ignatius,
 substitit; coactusque innocentis periculo,
 pauperi cuidam vestimenta sese pridie lar-
 gitum esse confessus est : cūque viator
 porrō instaret , quis tu , aut cujas ? nul-
 lum omnino ad ea verbum Ignatius red-
 didit , sed itinere cœpto perrexit tacitus,
 casum infantis apud se miserans , ac se-
 metipsum incusans , qui ne benefacere
 quidem sine ipsius cui benefaceret dam-
 no , vel certē discrimine , didicisset. Ut
 igitur Minorēssam accessit , oppidum in-
 gressus quo dicebamus amictu , ad publi-

cum infimæ plebis hospitium precariò se-
se contulit; ibique sanctæ paupertatis ac
pœnitentiæ studio, inter egentes ac sordi-
dos, quam exsequemur vitam exorsus est.
Victum ostiatim precibus infimis emen-
dicare quotidie: totam hebdomadam, ex-
cepto die Dominico, jejunare; in ipso ci-
batu, simplici pane contentus, atque ubi
sitis urgeret, aqua profluente: somni parcis-
simus, humo nuda cubare: auctoque suppli-
cio, singulis diebus ter sese flagellis quàm
acerrius cedere. Ad hæc horas quotidie
septenas genibus nixus in oratione vocali
persistere; nam ejus quæ mentalis dicitur,
usum & consuetudinem adhuc ignorabat.
Præterea, Sacrificiò matutino, Vespera-
rum & Completorii officiis attentissimâ
curâ semper intererat; obibat etiam octa-
vo quoque die sacra Confessionis & Eu-
charistiæ mysteria. Et quoniam superio-
ribus annis (ut diximus) & humanæ lau-
dis famæque appetentior, & munditiarum
ornatusque fuerat studiosior: ut vitium
utriusque diligentia, pari neglectu repen-
deret, natalium suorum generisque splen-
dorem, ne quis illi honos haberetur, stu-
diosè celare; & capillum, quem pro ejus
sæculi more, promissum impensius comere
curareque consueverat, relinquere cœpit
impexum & squalidum: quin etiam un-

gues ipsos excrescere, per diuturnam incuriam pati: atque in hoc tam aspero tamque horrido vitæ instituto, constanter id omne refugere, quod ullam posset afflictae carni delectationem aut levamen afferre. Itaque cum esset decore vultu, & egregia totius corporis firmitate; detractis paulatim viribus, omnis ille vigor acerrimi bellatoris, & forma viridis juventæ prorsus elanguit.

✠✠✠: ✠✠✠: ✠✠✠ ✠✠✠: ✠✠✠ ✠✠✠: ✠✠✠: ✠✠✠: ✠✠✠:
*Molestia scrupulorum, ac Tentationes
 ejusdem.*

C A P. VI.

EJUSMODI vitæ cursum aliquandiu secutus Ignatius magno animi fructu sine ulla offensione tenuerat, nondum graviora prælia & occultas Dæmonum artes expertus, quibus incauta mens hominum ad præclara tendentium, si præsertim suis viribus ipsi confidant, facile in fraudem inducitur; cum repente quædam illi objicitur species, cujus, quamvis identidem apparentis formam & figuram satis explicare non posset, multis distincta luminibus, & grato quodam splendore collucens, quod spectrum diabolicum postea, ut dicemus, agnovit:

Iisdemque ferè diebus cùm se illuvie &
 squalore oblitum animadverteret, atrox
 illa cogitatio nec opinantem invasit: Quæ,
 malùm, ratio te, miser, impulit, ut reli-
 ctâ patriâ, cognatis, amicisquæ potenti-
 bus, pædore ac dira macie deformatus
 tristissimo & obsoletissimo vestitu, vel
 stipem in triviis corrogares, vel inter in-
 fimas plebis minutæ quisquilias lateres in-
 glorius? nonne intermissa militiæ hono-
 ratæ stipendia, dulcissimosque æqualium
 convictus & pristinæ fortunæ cultum vi-
 ctumque, majore cum tua, tuique sangui-
 nis dignitate repeteres? Hæc & alia id ge-
 nus, ubi animo vehementer objecta, au-
 ctorem sensit Ignatius illicò, & quamvis
 initio paulisper ea recordatione commo-
 tus, tamen ut se collegit, illam ita constan-
 ter ab se rejecit ac repulit, ut ultrò etiam
 familiariùs, quàm antea, sese cœtibus
 atque colloquiis egentium & mendicò-
 rû infereret; qua submissione victus prin-
 ceps auctorque superbiæ, rursùs Ignat-
 io templum ingredienti ad officia divina
 celebranda, quibus mira cum attentione
 ac perseverantia quotidie dabat operam,
 ut diximus, incepti operis molem ac
 difficultatem ita repræsentavit, quasi ejus
 ærumnas & incommoda miserans diceret:
 Hem! infelix Ignati, annis utique septua-

ginta, quot ætas tua recipit, in tantis tibi laboribus, in tanta vitæ asperitate degendum est: quos tu, præsertim urgente senio, tolerare quæ poteris? Tum ille fortiter, nec sine cōtemptu: Quasi verò, inquit, mihi tu vel unius diei spatiū præstare possis? Hæc duo prima post conversionem Ignatius de summâ rerum, certamina subiit, quorum utroque turpiter superatus humani, generis hostis, ubi se irruptione & aperta vi nihil proficere intelligit, longè diversa bellâ di ratione, dolo cuniculisque grassari constituit: Neque abnuitt Christus, pugnarum ejusmodi justissimus Arbiter, qui ut neminem suprâ id quod potest oppugnari permittit, sic militibus suis, quos gratiæ divinæ præsidio & liberæ volûtatibus arbitrio ad omnem virtutē exercet, ne partâ semel victoriâ per otium torpeant, novâ in dies gloriosi triumphi materiam deesse nō patitur. Est igitur in Dæmonis artibus, quas ad bonorum perniciem assiduè meditatur, illa vel pessima; ut quos ita videt studio virtutis ac religionis addictos, ut inde terrestrium, vel honorum spe vel commodorum & voluptatum illecebris, avelli non possint; hos per speciem ipsiusmet honesti, quod adamarunt, ad immoderatam inedia & carnis macerationem acrioribus incitamentis impellat, eosdémque præ-

teriti temporis piacula reputantes, ac cœlestis iræ servili metu perculsos, in singula momenta, misero quodam angore sollicitet; id autem eo consilio, ut vel planè defecti viribus, per causam recuperandæ valetudinis paulatim ad socordiam atque ad ignaviam delabantur, vel assiduâ scrupulorum agitati molestiâ, dum se ipsi calumniari non desinunt, si minùs inertia, certè defatigatione ac lassitudine, ab incepto desistant; cujus utriusque cladis, utinam ne tam multa nobis quotidie exempla suppeterent. Hæc igitur eadem fraus Ignatium quoque in discrimen adduxit. Obtinuerat ille, (quemadmodum dicebamus) ex quo sese ad Christum adjunxit, in summa vitæ austeritate perpetuam animi tranquillitatem atque lætitiâ; quam ne ex quotidiana copia vilem duceret, neu suis ipse meritis per insolentiam adscriberet; ab iis, quas diximus, tentationibus cœpit illi Pater cœlestis universam repente subtrahere, sic ut interdum, cùm maximè gaudens exultaret in Domino tunc subitò nulla præcedente significatione, prorsus exui nudarique se omni gaudio & jucunditate sentiret: nec jam in precibus, neque in psalmis, neque in cæteris, quibus assueverat, pietatis officiis, ullam inveniret omninò


delectationem aut requiem : idque cùm ei frequenter accideret, attonitus rei novitate, animo suspenso ac mirè sollicito, causas ejus varietatis & immutationis inquirere, ac dubitare apud se, rectène confessionem in Monte-serrato, quam diximus, peregisset? quidquàmne omisisset, quod ad integram criminum accusationem attineret? ac proinde num idcirco fortasse Deum adhuc iratum experiretur? Quæ ille dum anxius agit, arrepta occasione diabolus perturbandi hominis, deque suo statu dejectiendi, hanc ipsam suspicionem atque etiam formidinem institit illi vehementer etiam atque etiam incutere. Ex eo tempore tyro vanis agitari terroribus, dies noctesque fleatibus jungere, nullam capere partem quietis. Itaque dum amissam recuperare conscientiae pacem, & hærentem visceribus pestem omni ratione conatur evellere; non satis habuit peccata vetera, quorum de confessione ambigebat, iterùm iterùmque apud Sacerdotem exponere; sed etiam cujusdam concionatoris monitum, qui Minorellæ per eos dies agebat, totius vitæ noxas, quotquot revocare in memoriam potuit, in libellum relatas, quod ad Montem-serratum antea fecerat, quàm accuratissimè rursus explicuit. Sed (quod

sæpe contingit) quod sibi adjumento fore putabat, id erat ei contrarium maximè; si quidem ipsa commemoratione rerum, quas aliquando oblivisci oportuerat, fiebat, ut, etiam si quid ipsa die mitigatum fuerat, recrudesceret. Nec jam tantummodò superiorum annorum delicta occupatum animum amarissima superstitione torquebant, sed etiam præsentis temporis cura pavorque, ne invisæ Christo suæ essent studia, neu Dominum suis omnibus dictis, factis, cogitatis offenderet. Quocirca multis jam rebus frustra tentatis, unum dumtaxat occurrebat illi remediũ, nec sanè spernendum; ut Sacerdos pro potestate omnino sibi posthac ejusmodi suspicionibus ac recordationibus interdiceret. Sed id ipsum consilii, ad eum deferre non audebat, perversa videlicet ratiocinatione delusus, ac veritus, ne sibi minùs ea medicina prodesset, cujus auctor ipsemet extitisset. Inter has ergo curas, gravi pressus mœstitia, cùm ita jaceret, ut nulla jam res mitigare dolorem posse videretur; invasit hominem atrox & sæva cogitatio, uti ad luctus miseriasque finiendas, è fenestra cubiculi (Dominicanorum hospitio tum fortè utebatur) semet ipse præcipitem daret. Quam ille cogitationem ope divina, cùm acerrime

repulisset, subiit animum firmitas & constantia cujusdam anachoretæ, quem in Patrum historia legerat, impetrandi gratia nescio quid, quod vehementer optaret, omni cibo tamdiu abstinuisse, quoad per eam abstinentiam, propitiato Numine, voti compos existeret, & quanquam periculosa admodum ea ratio videbatur, metusque suberat, ne tam audaci incœpro Deum irritaret potius, quàm reconciliaret sibi; tamen tota re apud se diu multumque agitata, ne quid omnino intentatum relinqueret, illum ipsum rigorem perseverantis inediæ, sine ulla dubitatione experiri constituit, atque ita experiri, ut nihil interea de quotidiana precatione, verberibus, & cætera corporis maceratione remitteret. Dies igitur unus, duo, tres, quatuor; nec tamen aut linguæ animo, aut molestia liberari. Itaque ad septimum usque diem obfirmata mente jejunium extendit, extendissetque porrò, ni Sacerdos idem, cui sua non modò vitia, sed etiam bona & intimos omnes animi recessus ac latebras, divino quodam instinctu, nudas & apertas habebat, pro imperio vetuisset eum longiùs progredi, minis insuper additis, ni paruisset, illum à sacra corporis Christi cōmunionē prohibendi. Hac igitur tam severa denuntia-

tione deterritus, cibum sumpsit Ignatius,
 & illo quidem, ac postero die, fuit illi
 quies: tertio verò eadem illa peccata rur-
 sum occurfare memoriæ, quarum cogita-
 tionum initia dum admittit incautiùs, ac
 species (ut fit) speciem adducit; sensim
 in pristinos fluctus æstusque sollicitudinū
 revolutus; cū ex una parte prorsus in-
 staurandum Confessionis misterium ju-
 dicaret, ex altera verò id sibi non modò
 non profuisse, verū etiam nocuisse an-
 tea cerneret; ex vehementi fluctuatione,
 tam grave tædium præsentis miserix mē-
 tem ejus invasit, non quidem ut de mor-
 te oppetenda, sed ut de abjicienda seve-
 riore disciplina, & sæculi commodis repe-
 tendis, magno quodam impetu cogitave-
 rit. Verū, in tantis tenebris ac procellis
 nutanti, & in magnum adducto pericu-
 lum, peropportunè radius divinæ bonita-
 tis affulsit, cujus beneficio, diabolica dis-
 cussa caligine, totius tentationis exordia
 progressusque attentè considerans, liqui-
 dò comperit, omnes illos conscientix sti-
 mulos, vanasque suspiciones, à malo spi-
 ritu fraudulenter immissas; ac proinde si-
 ne ulla dubitatione constituit præteritæ
 vitæ labes, quòd ad confessionem attine-
 ret, perpetua oblivione conterere. Atque
 in hunc modum, singulari Dei bene-

ficio, non modò infelicem illam sui calumniandi miseriam ac pœnam evasit ipse, verùm etiam alios curandi, qui eâdem ægritudine laborarent, miram à Patre luminum facultatem & scientiam est consecutus.



Ignatii profectus in spiritu.

C A P. VII.


ISCÆ igitur periculis perfunctus, Ignatius, ac veluti avulsus ab ubere; majores quotidie efficiebat, in solida virtute processus: & quò acrior ac diuturnior probatio fuerat, eò magis idoneus evasit ad nova omnipotentis Dei charismata capienda: in quibus fuit illud eximium. Cùm enim religionis causâ ædem Pauli Apostoli extra oppidum peteret, & in ipso itinere ad Rubricatum amnem, qui Minoressam interfuit, constitisset; nec opinanti, repentè divina quædam oborta lux est tanta, tamque mirifica, ut momèto penè temporis nullo magistro quàm plurima clarè perspexerit, non solum de fidei Christianæ mysteriis, verùm etiam de aliis vel subtilissimis philosophorum quæstionibus atque decretis,

quasi nitidissimo quodam in speculo perspicuè cerneret e a, quæ post multam accuratamque lectionem, maximosque labores ac vigilias, vix demùm solent homines intelligentiâ comprehendere: atque in eo cælesti prorsus intuitu, non sine summa animi voluptate, diutiùs acquievit. Quo tanto, tamque insigni accepto beneficio, cum ad agendas Domino gratias, accessisset ad Crucem, in propinquo defixam; oranti sese denuo in aëre spectrum illud objecit, de quo diximus antea; sed (quæ nimirum virtus ac potestas est Crucis) nequaquam pari splendore, vel pulchritudine; itaque, quod suspicatus pridie Ignatius fuerat; tùm denique clarè perspexit, esse dæmonium; eodémque deinde sæpiùs apparente, tantùm abest ut moveretur, ut illud etiam baculo per contemptum abigeret. Atque ejus ferè generis, per id tempus, planè divinitus, alia multa percepit. Quodam die, dum indicta publica supplicatione, Minoreffæ religiosum agmen instruitur; & Ignatius interim, beatissimæ Virgini psallit, insistens gradibus templi Dominiciani; subitò in Deum ita rapta mens ejus est, ut quasi per apposita quædam, & maximè illustria symbola, Trinitatis ipsius Numen augustissimum cerneret distinctum Personis,

unum Essentiâ. Qua visione, tanto gaudio est delibutus, ut neque in ipso mox agmine, lacrymis & singultui crebrò temperare valuerit, neque verò totum eum diem, alia ulla de re, nisi de sanctissimo illo fidei Christianæ mysterio, disputare, idque tanta similium & exemplorum varietate & copia, ut cuncti obstupescerent. Quia etiam, per eos ipsos dies, non dubitavit homo, literarum propemodum ignarus, librum de Trinitate conscribere, quoquo potuit stylo: usque adeò cælestes typi, quos diximus, in ejus memoria atque intelligentia, divinas illas rerum altissimarum notiones, impresserant. Ac licet anteà quoque & Monadem in Triade, & in Monade Triadem, sanctissimè coleret; suasque & Naturæ Divinæ communiter, & separatim singulis Personis, preces hymnosque persolveret; ab hoc tamè raptu longè studiosior & ardentior evasit, in eodem officio pietatis; eamque laudabilem consuetudinem, ad extremum usque vitæ retinuit; sic, ut præcipuam caperet voluptatem, & proprio quodam sensu rerum cælestium afficeretur, quotiescunque sanctissimæ Trinitati sacra perageret. Neque verò fuit hic finis mirabilium visuum; siquidem rursus per significationes arcanas, & mystica quædam exempla,

oblatus est ejus menti modus ipse, quem in hujus universitatis molitione, summus ille rerum Opifex tenuit: quas illustrationes atque doctrinas, ut omnino vires naturales excedunt, sic postea negabat Ignatius, posse verbis adumbrari, nedum exprimi. Præterea. cum sacrificio Missæ, in eodem templo Dominicano interesset; dum à sacerdote, de more, Hostia salutaris attollitur, apertissimè vidit Ignatius, illa specie, Christum, Deum eundem & hominem, verissimè contineri. Factum est etiam aliquandò, (idque ipsimet, qui interfuere, testati sunt) ut alienatus à sensibus, à Completorio Sabbati, ad alterum usque proximi Sabbati Completorium, in altissimo quodam excessu perstiterit; quâ ipsâ horâ, multis adstantibus, qui rei totius eventum attètè exspectabant, quasi è profundo somnò excitatus, repentè sustulit oculos; Jesum, perquàm suaviter invocans; atque interim, pii quidam homines, mortuum rati, utique terræ mandassent, nisi contemplati omnia diligentius, ac perturbato corpore, latentem in eo vitam, ex tenui cordis palpitatione sensissent. Ad hæc, intento precationi, sese non semel, tum Christus Dominus, tum Virgo mater ostendit; quibus, & aliis id genus clementiæ divinæ subsidiis, in recta fide usque

adeò confirmatus est; ut etiam si nulla ex-
stitissent, Christianæ religionis monumē-
ta, vel testimonia; nequaquam tamen du-
bitasset, ex iis tantummodò, quæ, Deo, si-
bi aperiēte, cognorat; mortem, pro de-
fensione catholicæ veritatis, oppetere; &
qui paulò ante, vix vocalis nosset oratio-
nis usum, paucis mensibus, tantam rerum
spiritualium peritiam, ac tantam Dei fa-
miliaritatem est nactus; ut quidam, ejus
omnia, vel dicta, vel facta, curiosè obser-
vantes, intempesta nocte supplicantem
animadverterint (elevante spiritu sarcini-
nam corporis) quatuor circiter cubitis, à
terra sublimem: & quidem ex consortio
sermonis Domini (quod de Moyse scrip-
tum legimus) tota facie mirum in mo-
dum radiante.



*De studio collato ad proximos
adjuvandos.*

C A P. VIII.



UÆ omnia, quamquam egregia
atque expetenda per se, tamen,
eò pluris erant in Ignatio facien-
da, quò magis erant cum aliorum fructu
& utilitate, conjuncta. Nam in cæteris
ornamen

ornamentis ac beneficiis, quæ in eum Deus, plenâ manu congeffit, illud equidem, vel præcipuum duxerim, quòd in tanto perfectionis ardore, non dedit illi spiritum solitudinis, animûmve uni sibi vacantem: sed Christianæ propagandæ fidei cupidissimum, ac mirè studiosum divinæ gloriæ, salutisque communis. Cùm igitur acta ejus in Monte-serrato (quantum ea ipse occultissima voluerat esse) institutamque vitæ asperitatem ac sanctimoniam, vicinis locis, fama vulgaret, ac nobilitatem viri præcipue, rumor (ut fit) etiam in maius attolleret; ingens hominû concursus, ad eum fieri cœptus, partim visendi gratia, partim etiam consulendi; quos ille, ut omni-conatu, quàm acerrimè ad Christum adjungeret, neu squalor ille nimius, & diutina illuvies ad se ad-euntibus, terrorem incuteret; primùm deponere sordes, & externum corporis habitum, cœpit aliqua ex parte componere: deinde cùm intelligeret, difficilem in primis & ancipitem esse curationem animorum; quò cautiùs, rectiùsque, in re tanta procederet, ope divina suppliciter etiam atque etiam implorata, suæ conversionis originem ac seriem, variasque tentationum procellas ac tenebras, & subsequutam mox tranquillitatem ac lucem, quàm

accuratissimè secum expendens ; demum
 ex iis, quæ partim cœlesti Magistro dicta-
 te perceperat , partim etiam ipsemet ex-
 periendo cognorat , de fructuosa ratione
 meditandi orandique, præclaras observa-
 tiones & saluberrima præcepta cōscripsit:
 qui liber, (ut antea dictum est) Exercitio-
 rum Spiritualium titulo; tempore proce-
 dente deinceps, ab eodem auctus atque re-
 cognitus, & Romani Pontificis iudicio ac
 testimonio comprobatus, ita multos om-
 nis ætatis atque ordinis homines, tùm in
 eligendo genere vitæ, tùm in componen-
 dis moribus, perturbationibusque sedan-
 dis, ac præsertim in retinenda constantia
 salutari, mirum in modum iuvat, iuvat-
 que quotidie; ut jure optimo videatur, hoc
 non in postremis numerandum esse reme-
 diis, quæ Divina Bonitas, hac hominum
 ætate, vel ad corrigenda sæculi vitia, vel ad
 renovandam veterem Ecclesiæ discipli-
 nam clementer adhibuit. His ergo medi-
 tationibus, quos ad bonam perfectæ vir-
 tutis fugem, Ignatius reperiēbat idoneos,
 paulatim & quasi per gradus cœpit exco-
 lere: ceteros interim precibus monitisque,
 prout sese dabat occasio, à vitiōrū fœdi-
 tate deterrens, atque ad studium æternæ
 beatitudinis incitans: idque eò libentiùs
 atque securiùs, quòd communicandis iis,

quæ à Domino acceperat, nihil interim sibi religionis ac spiritus deperire sentiret. Nec solùm venientes ad se benigno excipiebat alloquio, sed etiã invitatus interdum ab aliis ad prandium, minimè recusabat accedere; nimirum eo consilio, ut ex re & ex tempore sumpta occasione, qui se in Dei gratiam terrestri pavissent cibo, eosdè ipse vicissim spiritualibus epulis & opportuna quapiam adhortatione reficeret. Atque in hunc ferè modum adjuvante Domino, permultos ad arctam salutis semitam, à via lata & spatiosa traduxit.

✠✠✠ ✠✠✠: ✠✠✠: ✠✠✠ ✠✠✠ ✠✠✠: ✠✠✠ ✠✠✠ ✠✠✠


E gravi morbo periclitatur.

C A P. I X.

ED in ejusmodi curam, dum incumbit ardentius, nec tamen interea ferè quidquam, de assiduitate precandi, ac de quotidiana vitæ asperitate diminuit; morbum ex ingenti labore contraxit, adeò periculosum & gravem, ut sæviente atrociter febris, proximè ad mortem accesserit; quo tempore & oppidi Magistratus, periculo viri permoti, publicè diversorium illi curarunt, necessariis rebus instructum: & præter aliam ami-

corum turbam , honestæ matronæ , quæ vitandæ pestilentiaë causâ, Barcinone sese eò receperant , certatim ægrotanti assistere, & nocturnas agere excubias , perinde quasi unius vitæ, salus omnium vertetur. Atque his populi officiis, ac pia sedulitate bonorum , ereptus è præsentis vitæ discrimine, in id ipsum, iterum ac tertio recidit, ob eam causam, quod nondum planè confirmatis viribus, (blandimenta videlicet carnis, & veteris hominis malitiam veritus) præpropere festinatione, ad pristinas occupationes corporis animique redierat; quarum pondere oppressus, denique didicit ipse, aliisque deinde præcipere solitus est, imbecilla valetudine minuendos labores , curandumque tali tempore, ut quantum de consuetis exercitationibus infirmitas demat, tantum ad Dei gloriam & proximorum ædificationem, æquitas animi, & exemplum Christianæ fortitudinis addat. Vetabat idem etiam, corpus debito somno ciboque fraudari, multis eo tempore doctus experimentis, ut moderata sobrietate vegetatur animus, sic immoderatâ vigiliâ vel inediâ, vires adeò frangi ac debilitari, ut mæs earum ministerio destituta, vix munere suo fungi, aut ad contemplationem rerum divinarum possit exurgere. Vexatus

igitur , ut dicebamus, diuturna & periculosa ægrotatione : demùm ità convaluit , ut ex reliquiis morbi , dolore stomachi molestissimo subinde cruciaretur : quapropter calceos induere, & panni crassioris tunica cinerea , & capitis tegumento, contra sævitiam hyemis munire sese, piorum hominum benignitate precibusque coactus est.




De inanis gloriæ vitio superato.

C A P. X.



CESSIT ad illa corporis ægrotantis incommoda , gravis etiam animi cruciatus , ab importuna quadam inanis gloriæ tentatione profectus. Dum enim ingravescente morbo conscientiam suam diligentius excutit , seque ad extremum comparat mortis agonem , subiit illi repentè , se justum esse , neque ullo pacto , sibi de sempiterna beatitudine dubitandum. Cui suasioni, dum resistere vi summa conatur, intelligens , ut quisque sibi maximè placet, ita Deo maximè displicere ; diuturnum & anceps intra sese certamen , tanta tenta-

tione metuque sustinuit , ut miris modis
 quotidie torqueretur , majoremque ex
 offensionis divinæ formidine , quam ex
 ipsa grassantis morbi vehementia , me-
 tum ac sollicitudinem caperet. Versabat
 videlicet in omnes partes , hominis ani-
 mum , Dæmon callidus , Christi permis-
 su ; & quem desperationis jaculis , paulò
 antè superare nequiverat , eundem rursus
 nimix confidentiæ ac vanitatis elatione ,
 supplantare & evertere nitebatur. Sed
 contra ejusmodi cogitationes Ignatius , &
 in ipso (ut diximus) morbo , & recupe-
 ratâ postmodum valetudine , cum diu-
 tius dimicaret ; partim agendis identidem
 Domino gratiis , partim naturæ humanæ
 fragilitatem apud se reputando ; denique
 divino præsidio , detestabile hoc ingrati
 animi vitium , ita debellavit , evulsitque
 radicitus , ut postea , quotiescunque salus
 animarum , aut Dei gloria postularet , sua
 non minùs bona quam mala , sine ulla
 prorsus cenodóxiæ titillatione , palàm
 & ingenuè expromeret.



De profectioe Hierosolymitana.

C A P. X I.

INTER hæc, anni se è spatio exacto, partim spiritualium rerum scientia instructus, partim etiam, arte quadam & consuetudine regendarum animarum imbutus, cùm nihil vulgare aut exiguum agitare animo, sed egregia quædam & ardua in Dei gloriam ab ipso conversionis initio concepisset; Hierosolymam, quod jamdudum habebat in votis, petere omnino constituit; non tam, ut Christi Domini sacratissima incunabula cerneret (tametsi id ipsum vehementer optabat) quàm, ut in convertendis ad Evangelii lucem infidelibus, qui ea re-
nent loca, vel operæ pretium faceret; vel certè martyrii palmam, cujus avidissimus erat, acquireret. Sed hoc suum de prædicando Evangelio consilium, vitandæ scilicet humanæ laudis causa, nemini prorsus aperiebat: peregrinationis verò propositum, cùm necessariò amicis patef-
cisset, multi primùm, id ei multis ratio-

nibus dissuadere, obtestari etiam & orare, ne populum, ab se nuper è somno viti-
 tiorum excitatum ad studia virtutis pietatisque, repente defereret, neu se ipse, affecta præsertim valetudine, itineri tam longinquo ac tam periculoso committeret: deinde cum nec precibus, nec suasionibus, eum de sententia dimovere possent, instare saltem & urgere, ne in comitatus abiret; multa posse in tam remotis, ignotisque sibi regionibus, ac tanta rerum humanarum varietate contingere; quæ præsentem cuiuspiam fidelis opem solatiumque requirerent. Omnino probabilia videbantur afferre, & humano judicio rem æstimantibus, etiam necessaria: nec verò deerant homines impigri, peritique linguarum, qui sese illi comites laboris ac periculorum libenter offerrent. Verum Ignatius, qua erat animi altitudine, in cælum semper intentus, atque à divina providentia usquequaque pendere mirabiliter cupiens, amicis omnia sua in eum studia profitentibus, ita remisit, ut diceret, in præcipuis hominis Christiani virtutibus, non modò fidem & charitatem esse, verum etiam spem. Ejus porrò comparandæ gratiæ; certum sibi esse non modò sine viatico, sed etiam sine comite, iter id ingredi; quòd clarè perspice-

retur Ignatius, quòd commeatus copiam, quamvis exiguam, cerneret inopiæ illius, quam sibi summam proposuerat, legibus adversari; post multas anxiasque cogitationes, totam rem denique permittere statuit, arbitrio Sacerdotis, quem sibi, paucis illis diebus, Barcinone, tùm suæ conscientiæ, iudicem, tùm interpretem divinæ voluntatis elegerat. Ille, re cognita, Ignatio respondit, æqua postulare navarchum: proinde non resistendum esse, nec verò timendum, ne si cibaria, tam vilia præsertim ac necessaria, sibi paraverit, quidquam idcirco, contra consilium perfectæ paupertatis admittat. Tum Ignatius, quamquam soluto vixdum religione animo, tamen partim Sacerdotis impulsu, partim etiam metu occasionis ejus amittendæ; emendicat â de more pecuniâ, panes in navem imposuit, & ne quid præterea secum inferret, paucos qui superfuerant nummos, reliquit in ipso littore: Deinde, solutis anchoris, die quinta, Caietam non minùs periculosa quàm celeri navigatione delatus, Romam, pedibus iter intendit, ac prima nocte divertit ad villam militibus refertam; quibus nefaria quædam ac turpia molientibus, tanto animi ardore ac vociferatione, se objecit, ut illi partim verborum pondere,

LIBER PRIMUS. 57

partim constantiæ miraculo, obstupefacti, à flagitioso conatu destiterint. Inde laboribus maximis, cùm sæviente per eos dies pestilentia, luridus ipse ac macilentus, tectis ferè atque oppidis arceretur; denique in urbem Romam, haud ita custoditam, lassitudine ac fame penè confectus, introiit ipso Dominico die Palmarum. Cùmque venerabundus religiosissima quæque loca obiisset, Adriani VI. Pont. Max. pedes exosculatur. Mox paranti Venetias ire, ut in Palæstinam inde transmitteret; rursùm Hispani amici nonnulli, qui Romæ, eo ipso tempore versabantur, profectionem dissuadere, cùm aliis rationibus, tùm præcipuè, navigationis longæ & infestæ periculis proponendis: quippe cùm paulò antè, per summum nominis Christiani æque damnum, ac dedecus, Turca Rhodum insulam expugnasset, quo nuntio videlicet, omnis Italia cohorruebat. Sed cùm Ignatius, ab instituta peregrinatione, nullo terrore posset abduci; illud saltem hortari & orare institerunt, ne se daret in iter ejusmodi sine pecunia, tùm in alios usus necessaria, tùm utique ad naulum, pro transmissione solvendum. Nam, ut Venetias emendicato victu pervenisset, quæ deinde ratio, quæ spes homini externo &


ignotó foret, in tam remotas regiones, trajectum nanciscendi gratuitum? Proinde, recte amicéque suadentibus, ne resisteret; juvarique se, in Christi gratiam, aliquo saltem viatico pateretur. Cùm hæc & alia ejusmodi asseverantes pariter ac miserantes ingererent; sæpiùs eadem iterando, cunctantem ac tergiversantem denique perpulerunt, ut in ipso discessu, aureos aliquot nummos acciperet; quo ille subsidio oneratus veriùs quàm instructus, non multùm processerat viæ, cùm rem totam attentè contemplans, séque ipse accusans graviter, quòd de fiducia divina, humano metu, se dejici, fixumque paupertatis propositum, oblato auro, passus esset infringi? parùm abfuit, quin omnem pecuniam illicò indignabundus abjiceret, sed quia id prodigum, ac Deo ingratum fore videbatur, decrevit certè in obvios pauperes, paulatim insumere; quod cum alacriter præstitisset, brevi & nummis omnibus vacuus, & stimulis conscientiaë liber evasit. Pergentem porrò Venetias, eadem quæ supra memoravimus incommoda & difficultates, itinere penè toto, vexarunt. Sæviebat etiam tùm, locis aliquot, fœda lues atque contagio; dispositique custodes, aditus oppidorum, assiduè tuebantur. Ignatium ve-

rò ex ipso corporis habitu, vel in summa
 cœli temperie, metuisses. Obsita erat squalore vestis & horrida; color exsanguis, cavum macie caput, conditi introrsum oculi, & ianæ faucium sinus: quocirca fiebat; non solum, ut exclusus à diversoriis omnibus, pernoctare sæpe cogere-
 tur in publico; sed etiam ut pallore & macie peremptum, rigentemque, prætereuntes aliquando nonnulli, ceu monstrum quoddam aut triste simulacrum, horre-
 rent. Ipse verò linguæ imperitus, ignarus itinerum, cum præ defatigatione, sæpe deficeret; ad Fossam tamen Claudiam, Deo adjuvante pervenit; quo ex emporio brevis & quotidianus Venetias trajectus est. Ibi certior factus à viatoribus, ob-
 servari Venetiis omnia diligentissimè, & è suspectis præsertim regionibus venientes accessu prohiberi; flexit inde, itinere terrestri Patavium, quorundam consilium secutus, qui id ipsum periculi metuentes, faciliorem sibi, ex ea urbe Venetias, tran-
 situm fore sperabant, iidemque Ignatium adjunctum sibi comitem, præ imbecillitate, haud ita æquantem gradus, in campis circumpadanis repentè destituunt, unius ope Christi subnixum: qui sanè, pro sua infinita clementia, laboranti servulo, in tanta solitudine, minimè defuit,

sed proxima nocte sese illi, quemadmodum antea sæpe fecerat, visendum obtulit, recreatumque mirificè, intra ipsa Patavina mœnia primùm, deinde Venetias, sine ullo errore aut difficultate perduxit. Nemo quippe ex Patavinis custodibus, ad portas, nemo ex Venetis exploratoribus, ad insulas frequentiores appropinquantem (cum navim ingressi, de more, singulos vectores diligenter exciperent) Ignarium, nullâ munitum valetudinis tesserâ, ne appellavit quidem: mirantibus, cognita postmodum re, Clodianis desertoribus illis; quibus per adulterata videlicet symbola, introitus in urbem utramque non sine magna, vel sollicitudine, vel contentione, patuerat. Venetiarum urbis, in recessu intimo sinus Adriatici, ea regio ac situs est, ut, leniter stagnâtes ex alto aquæ, illam ex omni parte circumluant. Ea inclytæ urbi & ad merces copiasque invehendas, opportuna receptacula, & contra hostiles incursus munimenta firmissima sunt. Ex iis porrò æstuariis, majores minoresque euripi, totam urbem intercurrentes, variis mæandris ac flexibus, ita distinguunt; ut, quot in partes pedibus, in totidem ferè, mari aditus sit; egregio sanè, vel artis, vel naturæ miraculo. Inde vicorum, insularum, ac pontium in-

gens numerus : ut qui diutiùs ibi versati non sunt, viarum locorumque, modò varietate, modò similitudine, sæpe fallantur. Sed contra ejusmodi ambages, certum paratùmque remedium est, maxima multitudo cymbarum, quæ usquequaque dispersæ, nominatim ad omnia, & publica, & privata loca, quemlibet, haud ita magna mercede trajiciant. Ignatius navì Patavina, ex iis quæ per Medoacum flumen, assiduè commeant, in area Marciana, sub noctem expositus, cùm neque vias ad publica xenodochia nosset, nec portitori conducendo suppeterent nummi; assuetus longo jam usu, malè cubare, sub porticu Procuratoria, quam appellant, intendentibus jam se tenebris, vacuum opificis cujusdam fulcrum elegit, in quo fessos artus, utcumque reficeret. Tenet fama, literisque multorum est memoriæ traditum, dum ille ibi noctem exigit, vicinum senatorem M. Antonium Trivisanum (quem, ipsi multo deinde post, ejusdem civitatis Principem vidimus) cœlesti voce excitatum, increpitumque, quòd in multa veste, mollique strato decumberet ipse, cùm interim, Dei Famulus, peregrinus, non longè à vestibulo illius ædium, jaceret in publico pauper, & omni humana ope ac solatio destitutus; itaque in-

genti metu & horrore perfusum, profiliisse confestim, & quæsitum diligenter Ignatium, excepisse per honorificè. Sed ille postridie, cum in amicum veterem Cantabrum incidisset, à lautiore hospitio, sese ad eum familiariter transtulit.



Navigat in Palestinam.

C A P. X I I I.




BI, cum aliquandiù moraretur, in omnem navigandi occasionem intentus; ecce tibi novæ amicorum pugnae, (quos illi, ubivis, brevi conciliabat cognita viri virtus atque modestia) eum variis terroribus ab instituta peregrinatione revocare conantium; quibus ille, Deo fretus, ita resistebat, ut diceret, pro certo habere se, ut cætera cuncta deficerent, vel unâ solummodo tabulâ, quò cupiebat, utique perventurum. Nec eum fefellit bonitatis divinæ fiducia. Cum enim eo anno formidine Turcarum, ut diximus, solito minor esset, in Judæam peregrinantium numerus; & quotquot erant, simul omnes paulo antè sol-

vissent ; desperatâ jam à cæteris re, Ignatius repenté fit certior , navem in Cyprum parari , patricio Veneto , Prætori ejusdem insulæ designato : cumque inde non ignoraret , brevem atque facilem esse trajectum, in Palæstinam ; nullo adhibito deprecatore, cùm tamen multi, nec aspernandi suppeterent, ad Venetorum Ducem Andream Gritum , adiit ipsemet , insigni non minùs humanitate, quàm prudentia Principem : ac Deo favente, facilè ab eodem impetravit, ut gratis in Cyprum usque devehetur. Sed interea dum Prætoria ornatur navis , in febrim Ignatius incidit, factumque divinitùs est , probandæ scilicet ejus constantiæ causa , ut quo die pharmacum hauserat , eo ipso Nautæ, signum profectiōis ediderint : qua re minimè conturbatus Ignatius , veniam petit ab hospite ; qui pertinaciter ipsum etiam atque etiam retinere conatus , cùm nihil omninò proficeret , consulitur medicus. Ille verò sine cunctatione respondet, hominem ad interitum ruere. Attamen Ignatius , nihilo magis immutatus, & cœlestis nimirum Medici ductum sequutus, felici sane consilio (quod tamen admirandum potius quàm imitandum aliis duxerim) fluctuante etiam tum , in stomacho , potione, conscendit ; Deique

providentiâ contigit, ut anchorâ solutâ, inter navigandum, ex ipsa maris agitatione, tantam vim pestiferi ac vitii humoris evomeret, ut morbo planè levatum sese celeriter senserit. Recuperata valetudine, institit suo more, quoscunque poterat, factis dictisque, ad virtutem & pietatem adhortari; cûmque in eadem navî per summam impudentiam, committi gravia quædam flagitia, comperisset; non dubitavit apertum dedecus, detestari palam; & impuros illos homines, tantâ orationis acrimoniâ reprehendere, ut ij factâ cum nautis conjuratione, molestum sibi monitorem, in deserta quadam insula, exponere, atque ab suo conspectu & consuetudine, procul amovere decreverint. Quam rem odorati, è vectoribus quidam Hispani, ad Ignatium pro amicitia detulere; suadentes etiam atque etiam, ut in loquendo cautior esset, sibi que consuleret; sed ille nihilominus, turpiter peccantes objurgare perrexit, divinæ providentiæ ope subnixus: cujus beneficio factum est, ut ad insulam sceleri destinatam appropinquantes nautæ, adverso repentè vento rejecti, volentes nolentes Ignatium in Cyprum usque pervexerint: ubi cûm stare ad salinas peregrinam navem, de quâ suprâ diximus, audisset; illuc itinere terre-

tri, se contulit; in eamque gratis admissus, nihilo plus viatici, secum intulit, quàm in priores intulerat ; Christo uno videlicet fretus, qui tota illa navigatione, sese illi non semel ostendit ; eumque magnopere confirmavit ; ac denique incolumem, ad portum Palæstinæ perduxit.



Palestinae loca sancta perlustrat.

C A P. XIV.



INDE, cum cætera peregrinorum turba progressus, ut ad conspectum sacratissimæ urbis est ventum, incredibilem ex ipso illius intuitu, cepit animo voluptatem; ac deinceps, partim in comitatu, partim etiam solus, loca illa Christi Domini, **MARIÆ** Virginis, & Apostolorum nobilitata vestigiis, eximio quodam animi fructu, venerabundus haud semel obiit, modò inclyti quondam templi reliquias, modò sepulchra Prophetarum intuens : hîc nascentis & vagientis ; illîc docentis, & miracula patrantis Filij Dei monimenta considerans. Ubi verò, ad loca, ejusdem


acerbissimis pœnis insignia, & morientis in cruce, sanguine consecrata, atque ad defuncti sepulchrum accederet; effusus in lacrymas, humo pia oscula imprimere, immortales agere Domino gratias, incredibili quadam spiritus dulcedine, & suavitate compleri. Ad hæc, antiquum beatissimæ Virginis domicilium, itémque locum, instituto primùm Eucharistiæ mysterio, & sancti Spiritus adventu, memorandum; & alia ejusmodi quàm plurima, quæ per otium deinde reviseret; à Mystagogo quàm accuratissimè addiscere. Erat Ignatio, jamdiu deliberatum, ut diximus, in angustis illis Judææ sedibus, pedem figere, atque ad convertendos, ad Evangelij lucem, Infideles, toto pectore incumbere; quòd non reperiret, vel ubi sanctiùs in terris vitam degeret, vel in quo munere, fructuosius operam collocaret. Neque, plurimis jam experimentis divinæ bonitati confidere, & in diem parvoque vivere assuetum; rerum, quæ ad corpus pertinent, habebat cura ulla sollicitum. Id verò laborabat unum, fragilitatis humanæ videlicet conscius, ne spiritui quotidie deficienti, & noxarum sordes aliquas contrahenti, opportuna sacre Pœnitentiæ Ablutio, & Cœlestis Panis alimenta deessent. Quam ad rem, idoneum ratus mi-

nisterium Fratrum , è Franciscana familia, qui loca illa religiosa tuentur, & peregrinis advenientibus præstò solent esse; adit ille ad Custodem cœnobij, ac literas ei, quas ex Italia commendatitias attulerat, reddidit; &, quòd ad conversionem infidelium attinet, nihil ei suorum consiliorum impertit; voluntatem verò suam in eisdem sedibus commorandi, habitandique demonstrat: rogat proinde, uti se, Fratres, duntaxat tecto, recipiant, sibi que Confessionis & Eucharistiæ sacramenta ministrent: se, quæ ad victum cultumque spectent, nullo prorsùs eorum incommodo, curaturum. Custos, partim commendatione amicorum, partim postulati moderatione permotus, bene sperare jubet Ignatium, ita tamen, ut rem in adventum Provincialis Ministri differret, qui per eos dies, in Bethleem oppido versabatur; nec dubitavit Ignatius, quin æquè facilem Provinciale esset habiturus, atque Custodem habuerat. Itaque cùm reditus jam peregrinorum instaret, literas ad amicos in Occidentem scribere aggressus est, quibus eos de suo statu, faceret certiores. Cùm igitur maximè scriberet, quòd in posterum diem, peregrinis erat indicta profectio; ecce tibi à Custode nuntius, adesse Provinciale, & Ignatium accer-

fere ; ad quem bonæ spei plenus , cùm ex templo adiisset , collaudat ille primò piam hominis voluntatem ; sed re apud se diligentius deliberata , videri sibi , ait satiùs , ut recedat ; idque , cùm alias ob causas , tum verò quòd ante id tempus , nonnulli eodem studio accensi , dum securiùs vagantur , à Turcis excepti , vel miserè periissent , vel certè in acerbæ servitutis calamitatem incidissent , quos deinde propter officium , ac vicinitatem , Franciscani fratres , non sine magno cœnobij detrimento , redimere cogebantur : pròinde , se in diem insequentem , cum cæteris peregrinis , ad iter accingeret . Ad quæ cùm ita respondisset Ignatius , ut sibi certum fixumque esse affirmaret , Hierosolymis omnino restare ; simulque modestè significaret , se , quamvis aliter sentiente Provinciali , nequaquam , nisi aliquâ oblatâ religione , à proposito recessurum : tùm ille , potestatem se à summo Pontifice habere subjunxit , sacris interdicendi ; si quis invito se , ibidem remanere conatus esset : jámque potestatis ejus diploma proferre paranti , confestim Ignatius , (ut omnia Ecclesiastica jura & imperia valde reverebatur) nihil prolato opus esse respondit ; credere se , quod diceret , & quoniam ita juberet , dicto au-


dientem fore. Dum igitur ad hospitium tendit mœrens, ut se ad reditum compareret; acris illum incessit repentè cupiditas, montis Oliveti illius celeberrimi revisendi, quo in summo, cernuntur adhuc Jesu Christi ascendentis in cœlum, expressa vestigia: ac ne quis fortè in tantis temporis angustiis, impedimento sibi esset re nemini patefacta, & (quod periculosius est) nullo, propter inopiam, Turca secum adhibito, ex iis, qui mercede conducti peregrinis in ea regione, præsidio sunt; solus ad montem excurrit: cùmque à custodibus non admitteretur, cultellum è calamaria theca detractum, mercedis loco iis dedit, sacri mentis cacumen subiit alacer, & divinorum pedum notas, multa cum prece, & ingenti gaudio veneratus, ad Bethphage properavit: ubi dum singula curiosè perlustrat, subiit illius animum subitò, minùs diligenter, in Oliveti fastigio sese animadvertisse, utra ex cœli plaga dextrum, utra, sinistrum esset Christi vestigium: qua dubitatione, quasi quibusdam calcaribus incitatus, illicò ad montem recurrit, adnotavitque intentis oculis, vel minutissima quæque, sic, ut locus in posterum dubitationi non esset: usque adeò inexplebile studium sacrosancta illa redemptionis humanæ moni-

menta & incunabula Christianæ religionis, penitus etiam atque etiam cognoscendi, recondendique, mentem ejus invaserat. Interea, cum abesset diutius, nec in turba peregrinorum appareret, ad Franciscanos deferitur, desiderari ex eo numero Ignatium. Franciscani, suspicati id quod erat, ac veriti, ne per eam solitudinem Ignatius, in aliquod vitæ vel servitutis discrimen incurreret; Armenium quendam, in eo cœnobio ministrantem, ad illum perquirendum celeriter mittunt; qui descendenti ex Oliveto commodum Ignatio factus obviam, fuste primùm, ac truci vultu acriter minitari, ac temeritatem asperè admodum increpare: deinde immissa manu, & brachio ferociùs apprehensum, ad diversorium trahere minimè sanè renitentem, quin etiam novo cælestis gaudij rore perfusum, quòd inter eas contumelias, Christum sibi præsentem, & usque ad hospitium præeuntem, incredibili quodam genere consolationis, aspiiceret.



In Hispaniam redit.

C A P. X V.

 T igitur , postera dies illuxit , cum reliquo peregrinorum agmine , Ignatius abiit , præ desiderio tristior , & relictam provinciam , sine fine respiciens : nec tamen , quoniam præfenti necessitate victus , inde recederet , de muniendo in posterum sibi quandoque reditu ac mansione , desperans. Cùmque primo trajectu , Cyprum tenuisset incolumis , tres ibi onerarias in Italiam paratas offendit : quarum una erat Veneti mercatoris , maxima , & omnibus rebus instructa ; altera minor , sed benè firma , Turcarum : tertia Christianorum , parva , & malè compacta. Ac cæteri peregrini , quòd tempus erat hybernum & obnoxium tempestatibus , pro se quisque tendere , ac certa mercede pacisci , ut in primam ascenderent : cùmque Ignatius propter egestatem , à navarcho repudiaretur , iidem illum enixè precari , ut hominem sibi notum , probum , atque adeò

D

sanctum , ne recusaret admittere ; quibus ille non minus amare quam ineptè factus : Atqui sancto , nihil opus est (inquit) navi ; calcabit æquora multorum exemplo ; neque unquam exorari se passus est : sed magno ei stetit cavillus , & contumacia. Cùm enim Ignatius , inde per contemptum exclusus , facile obtinuisset iisdem deprecatoribus , ut in illam debilem gratis admitteretur : cùmque simul omnia navigia vento secundo solvissent ; repente cooritur atrox adò ac sæva tempestas , ut Turcica navis , in omnium conspectu , miserandum in modum fluctibus hausta , nullo prorsus evadente , perierit ; Veneta verò , in scopulos illisa , naufragium fecerit , salvis tamen hominibus : tertia tantùm , qua vehebatur Ignatius , minimè valida , ventis ac fluctibus , diù multùmque agitata , altero denique mense , in Apuliam lacera ac valde fessa pervenit : quo ex loco ipse deinde Venetias petiit , tam longa & periculosa navigatione mirè vexatus. Etenim studio paupertatis , quæ fuit illi semper omnibus commodis & emolumentis antiquior , nudis cruribus , hyeme sæviente conscenderat , femoralibus tantùm , è tela , concisâque ad humeros aploide , ac scissili tunica brevior , semiamictus : cùm è cælo densa caderet

nix, ac tristi gelu cuncta inhorrescerent: atque, ad has cæli injurias accedebant quotidiana vitæ discrimina, vigiliæque, & cætera maris incommoda, quibus ille penè confectus cùm venetias pervenisset, Januario mense, anni M. D. X X I V. ab hospite Cantabro clementer acceptus, nummisque aliquot ad iter faciendum, atque ad fovendum stomachum nimio frigore languentem, panni quodam frusto donatus, Ferrariam venit. Ibi, maximum urbis templum ingressus, dum religiosè numen adorat, mendicus quidam ex iis qui sacrarum ædium vestibula conterunt, precationi apprimè intentum intuitus, confestim ad illum accedit, manumque ad stipem porrigit supplex: cui cùm Ignatius, ex ea quàm habebat pecunia, nummulum hilari vultu dedisset, atque is, (ut fit) rem ad cæteros pauperes detulisset; alius, aliusque deinceps ad Ignatium accurrere: quos ille, cùm se per Christum obsecrantes, frustrari fas esse vix duceret, à minoribus nummis, ad majores paulatim progressus; brevi totam crumenam ita penitùs exhausit, ut sibi deinde, ad cibum illo die capiendum, ostiatim emendicare necesse fuerit; quam rem pauperes iidem mox conspicati, & maxima quadam admiratione correpti,

sanctum illico exclamant; quibus plausibus, vocibusque nequaquam inflatus ipse cum uno bonæ conscientiae testimonio niteretur, Genuam¹ inde sine ulla cunctatione profectus est. Grave, per id tempus, inter Christianos Reges, vigeat bellum; & præcipua quæque Cisalpinæ Galliæ loca, vel Hispanicis, vel Gallicis præsidiis tenebantur: cumque ob id ipsum, valde infesta caedibus ac latrociniis itinera esse constaret; admonitus à bonis quibusdam viris, Ignatius est; ut per occultos tramites, à via regia declinaret; nec cum ingenti vitæ periculo, in manus militum vellet incidere. At ille, quem ardens odium sui & amor imitandæ Christi patientiæ, intrepidum redderet, rectè nihilominus ire perrexit; neque ita multum viæ processerat, cum ad oppidum nescio quod, in stationes circumfidentium Hispanorum incurrit, qui tam periculoso ac suspicioso tempore, exploratorem sine dubio rati, comprehensum Ignarium, & in domunculam quandam seductum, blandè primùm interrogant; deinde omni vestimento, & ipsis denique calceis, ferociter exuunt, singulas partes protervè simul & curiosè pertractant, num quid ad obsessos, vel nuntii vel literarum afferat, diligenter exquirunt; cum


nihil eorum, quæ putaverant, nec percunctando elicerent, neque perscrutando invenirent; irâ commoti: Atqui te Præfecto sistemus, inquit, & confessionem, quam pertinaciter suppressis, exprimeamus: cùm nihil recusaret Ignatius, ac tantummodò peteret, ut sua se tunica testum incedere paterentur; illi verò, ludibrii & ignominia causa, brachatum per media castra, vulgo inspectante atque irridente, perducunt; quam ille tam insignem contumeliam excepit ac subiit alacer, cum aliis nominibus, tùm præcipuè, quòd interea sibi, species quædam est objecta Christi Domini, cùm à Pilato, per mediam urbem, ad Herodis tribunalia missus esset, ab eo per summam injuriam atque indignitatem, spreti & illusi, & universo irridente, ac sibilante populo, per hominum ora semel iterumque traducti; cujus opprobrij, se quoque factum esse utcumque participem, mirificè lætabatur: sed ubi, ad Præfecti diversorium appropinquavit, repentino quodam timore perfusus, cœpit subitò cogitare apud se, quonam modo ipsum alloqueretur. Etenim Ignatius, quòd olim in regia, sermonis flosculos, & verborum elegantiam, nimium studiosè captasset; ad eam vanitatem expiandam, consultò, post con-

versionem instituerat, rudi & agresti sermone cum ipsis quoque dynastis ac principibus agere; & quò magis vulgo contemneretur, omne liberalioris educationis & nobilitatis indicium, studiosè celare. Tum igitur, subiit illius animum, expediretne, tali tempore, quidpiam de suscepta, seu tarditate seu rusticitate deponere. Sed, cùm rem totam accuratiùs intuens, ab humano timore profectam, animadvertisset; usque adeò in semetipsum animo concitatus est, ut nulla habita ratione periculi, non modò mutata consuetudine, ad orationis lenocinia non descendere; sed nullum prorsus, neque gestus, neque verborum honorem habere Præfecto, decreverit. Quæ res, cuipiam fortasse temeritatis potius, quàm consilii videatur esse: sed utique, servorum Dei, præsertim in ipso fervore pœnitentiæ, facta vel dicta, ad communem sensum, ac normam exigenda non sunt. Cùm igitur coram illo stetisset; ut erat seminudus & squalidus, ne aperto quidem capite, oculos humi defigit: multa ac varia sciscitanti, nullam omnino reddit vocem, tantùm ad illam interrogationem: Esne speculator? non esse, respondit, idque ob eam causam, ne, si nihil contradixisset, silentio ipso, quòd aiunt, rem affirmas-

se, & meritò quæsitorem, in suam perniciem efferasse, videretur. Tum ille, infanum ratus Ignatium, acriter milites increpat; quòd in conspectum suum, non bene cognita re, dementem abduxerint; & simul, Abigite hunc, inquit, liberumque dimittite. Qua reprehensione, magis magisque irritati, cùm adversus Ducem, hiscere non auderent; sui doloris pœnas, ab innocente Ignatio repetunt; nec modò jurgia, & probra certatim ingerere, sed etiam impetu factò, pugnis, cubitis, calcibus, hominis latera faciemque contundere, mirabiliter in ipso verberum dolore lætantis, quòd aliquid innoxio sibi, ad Christi exemplum perpeti contigisset. Cumque verberando & convitiando, fessi denique destitissent; miseratus alius quidam miles excepit exanimem, ac fovit; ciboque recreatum insequenti luce, tutum abire permisit. Sed antequàm Genuam accederet, rursus in stativa Gallorum incidit, verùm evētu admodum dispari, siquidem Dux, ut eum in Guipuzcoa natum audivit, Vasco ipse eidem regioni finitimus, quasi popularem clementer agnovit, ac benignè tractari à militibus jussum, postridie dimisit incolumem. Inde cùm Genuam pervenisset, Rhetoricum Portundum ibi offendit Cā-

S. IGNATII VITÆ

abrum, Hispaniensi classi præpositum, in Ferdinandi quondam regia, sibi notum; cujus beneficio, dum Barcinonem trajicitur, nihilo pacatiori usus est mari, quàm terrâ paulo ante, usus fuerat. Etenim à piratis conspecta navis, qui valida per eos dies classe, infestum habebant mare Ligusticum, ingenti nautarum labore metuque, manus insectantium effugit.



*Barcinone ad studia litterarum
aggreditur.*

C A P. XVI.



INTEREA Ignatium; Hierosolymitana commoratione prohibitum, gravis coquebat cura, quid ageret, quodnam potissimum vitæ genus eligeret; ac multa secum agitati venerat illi dudum in mentem, cœnobium aliquod ingredi maximè dissolutum, ut ibi, dum lapsam religionis disciplinam, & verbo & exemplo, conatur ad veterum instituta redigere; & cæteris aliqua re prodesset, & ipse interea (quod necessario futurum videbat) ab iis, qui

restringi se nollent, multa pro Christi nomine pateretur. Sed incertus, num id maximè ad Dei Gloriam pertineret, quam videlicet unam in omni actione spectare consueverat; multa ac diligenti prece & jejunio explorat Numinis voluntatem: ac diu perplexus, in eam denique mentem sese divinitus planè sensit impelli, ut sine dubitatione statueret, primùm operam suam, qualis qualis esset, nequaquam intra unius familiæ cancellos includere: deinde, quò latius pateret utilitas ac fructus animorum, ejusdem consilii ac propositi idoneos aliquot adlegere focios atque adjuutores: postremò, ut sine hominum admiratione versari in adjuvandis hominibus posset, ad sancti Spiritus unctionem, doctrinæ quoque subsidium ac literarum cognitionem adjungere; præsertim quòd ea commendatione, facultatem etiam repetendæ atque obtinendæ Hierosolymitanæ provinciæ, (cujus illi cura vivebat in pectore) facilè ab Ecclesiasticis magistratibus, aliquando impetraturum sperabat. Et quidem, quòd ad literarum studia pertinet, cum nondum intelligeret, quàm illa sibi totum hominem ferè vindicent, ratus posse interim se animis quoque adjuvandis vacare; Minorem illam, ad gregem illum suum

reverti decreverat ; ubi & sparsa in hominum mentibus , pietatis virtutisque semina , ad bonam Hugem perducere , & Cisterciensis cujusdam Monachi , spectatæ sanctitatis ac doctrinæ viri , tum consuetudine perfrui , tum industriâ erudiri , magnopere cupiebat. Sed cum illum , contrâ quàm putarat , demortuum reperisset ; Barcinonem , sibi studiorum idoneam sedem , putavit fore , propter eam maximè causam , quod cum paupertatem perpetuò colere , nihilque ab domo sua & cognatis accipere decrevisset ; in ea urbe , multos habebat spirituali necessitudine sibi conjunctos : in iis , Ardebalum quendam , peritum , ut locis ac temporibus illis , Ludimagistrum ; & Elisabetham Rosellam , primariam fœminam ; quorum alter , operam illi gratuitam in docendo ; altera in quotidianos usus , quidquid opus esset , benignè detulerat. Ut igitur Barcinonem revertit , seque Ardebalo dedit in disciplinam , repuerascere in gratiam Christi , maturâ jam ætate vir (quippe tertium circiter ac trigesimum agebat annum) & elementarius propemodum fieri non erubuit. Cæterum , ad illa spinosa rudimenta grammaticæ capienda , edicendasque verborum inflexiones & nominum , cum alia erant ei impedimento , tum illud præ-

cipuè, quòd animum ad rerum cœlestium
 sensa concipienda, longo iam usu prom-
 ptum & agilem, si, *amandi*, vocabulum,
 vel alia quæpiam ejusmodi vox, admo-
 nuisset eorum quæ, piè ac religiosè cogi-
 tare & commentari consueverat, subitò
 penè abstractus à sensibus, in contempla-
 tionem divinæ caritatis ac sempiternæ
 beatitudinis, tota mente raperetur. Ex
 quo fiebat, non solùm ut nihil novi, man-
 dare memoriæ posset, sed etiam, ut si quid
 antea impressum esset, id ipsum concursu
 novarum & præstantiorum imaginum, il-
 licò deleretur. Quam ipsam rem, quasi fu-
 tura præsagiens, pro sua parte adjuvabat
 etiam vafer humani generis inimicus; eò
 maximè tempore, crebra intelligentiæ lu-
 mina eidem offerens, & recondita patefa-
 ciens scripturæ sacræ mysteria. Quod ille
 cùm cerneret, cùmque adhibito sæpe co-
 natu, evagationem hanc frustra cohi-
 bere tentasset, pro ea discretionem spirituum,
 quâ diuturna exercitatione paraverat, fa-
 cilè sensit diaboli fraudem, sese à literarum
 studio revocare conantis; ac, quo consi-
 lio, Barcinonem sese contulerat, id ipsum
 labore ac diligentia, consequi, majorem
 in modum exoptans, hanc iniit rationem,
 ejus abigendæ molestiæ. Templum erat
 beatæ Virginis, cui à Mari cognomen est,

gymnasio proximum : in id templum fu-
 sis ritè ad Deum , eandemque Virgineam
 precibus : Ardebalum pro amicitia accer-
 sit ; rem illi totam , ut erat , exponit ; de-
 inde, se ad pedes abjicit homini, etiam at-
 que etiam obtestans , ne ab incepto desi-
 stat ; se utique , modò sibi panis & aqua
 non desit , in proximum biennium , & eò
 amplius , si opus fuerit , ad scholas fre-
 quentem esse venturum , sedulòque datu-
 rum operam literis : petere & rogare, ut ab
 se quotidie non minùs , quàm à cæteris
 pensum exigat ; cessantem, quasi quemlibet
 unum è grege puerorum , arbitrato suo ,
 & verbis, & plagis accipiat. Miratus viri
 humilitatem ac probitatem Ardebalus ,
 bonum animum jubet habere , suamque
 illi operam denuò pollicetur. Atque hac
 submissione victus denique Dæmon ab-
 scessit , & importunis illustrationibus ,
 Dei beneficio , recedentibus, operæ pre-
 tium Ignatius facere, & liberiùs in gram-
 maticæ cognitione , cœpit excurrere. In-
 terea discendi mirabiliter avido, & omnia
 studiorum compendia perquirenti, suàsere
 nonnulli , ad pietatem videlicet , cum
 elegantiore doctrina jungendam, ut Eras-
 mi Roterodami , qui ea tempestate Lati-
 nitatis auctor idoneus habebatur, Enchi-
 ridion Militis Christiani, studiosè perle-

geret ; quod ille facere cùm cœpisset , celeriter sensit, ea lectione , spiritus fervorem, in se , quasi frigidâ superfusâ , restingui : consultoque per preces Deo , ita librum illum abiecit , ut neque in manus postea sumpserit ipse, & multo pòst , Generalis creatus , omnia Scriptoris illius opera, in Societate Jesu, legi vetuerit ; non, quòd singula hæretico veneno infecta putaret ; sed ne quis fortè captus facetiis ac dicacitate viri ; sensum, ut fit, ab incorruptis, ad vitiosa descenderet. Nec tamen, eo tempore Ignatius , quamquam studio literarum adeò intentus , consueta caritatis officia, & studium pœnitentiæ omisit ; Quinimò, cùm Barcinonem, valentiore, quàm inde abierat , stomacho revertisset ; non ille quidem ad saccum rediit , neque orationi ita multum temporis tribuit ; sed tamen vestitu admodum vili , usus est ; & calceos , ad ostentationem vitandam , ita perforavit , ut soleis paulatim magis magisque discerptis , hyeme jam sæviente, nudis humi plantis incederet : atque etiam subsecivis operis , erepto è scholasticis exercitationibus tempore , institit , pia passim colloquia serere ; plebem infimam, doctrinæ Christianæ præceptis imbueri ; quosdam etiam spiritualibus exercitiis , ad virtutem ac perfectionem informare. Qua-

rum rerum admiratione permoti , præ
cæteris viri quatuor , sese ad Ignatij du-
ctum atque institutum aggregarunt,
(quibus tamen , ut suo loco videbimus,
in proposito constantia defuit) Callistus
quidam , qui auctore Ignatio , peregrina-
tionem Hierosolymitanam nuper obie-
rat ; alterum , Artiagam , cognomento
appellabant ; tertius fuit è Gotholaniæ
Proregis familia , nomine Gazeres : ad
quos , ultimo loco , Joannes adolescens,
natione Gallus , accessit. His ille sociis
auctus ; tametsi studiorum metam , quàm
primùm attingere optabat , quò liberius,
omnem curam atque operam , in homi-
num salute consumeret ; tamen, quòd sibi,
nondum sat firma grammaticæ fundamen-
ta jecisse videbatur , nunquam adduci po-
tuit , ut ab Ardebali disciplina discederet,
(quamvis ad superiores Artes , vulgò
idoneus haberetur) quoad insignis qui-
dam Theologiæ doctor , cui sese excu-
riendum examinandumque tradiderat ; fa-
cto periculo , ad reliquorum sententiam
accessit. Cujus auctoritatem , & judicium,
ne contemnere videretur , licèt ipse sibi
haud sanè placeret , ad graviora studia,
Complutum unà cum sociis, abiit.

*Ejusdem commoratio Complutensis.*

CAP. XVII.

IB I , cùm ad publicum xenodochium , suo more divertisset ; Artium , ut appellant , curriculum iniit , non admodum felici successu : quippe qui eâdem illâ præproperâ festinatione incitatus , nullo pænè servato , vel ordine , vel discrimine disciplinæ , multa & varia , uno eodemque tempore aggressus est ; & in Logicis , Terminos , quos appellant ; in Physicis , Albertum ; in Theologia , Magistrum sententiarum (qui maximè libri tum in Hispania terebantur) evolvere , & plures quotidie in scholis audire cœpit interpretes ; quæ res in speciem utilis & compendiarîa , vel maximo , ei , in idipsum , quò properabat , impedimento fuit. Etenim , (quod in rebus humanis ferè fit) cùm avidè sequeretur omnia , nihil propemodum assequebatur : & ipsa varietas ac multitudo rerum , tum intelligentiæ tenebras , tum verò memoriæ perturbationem & confusio-

nem afferebat. Ad hæc , illud etiam accedebat incommodi, quòd in summa paupertate , non solum ex emendicato vivebat ipse cum suis , verum etiam , aliorum inopiam ac difficultates , conquisitis undique eleemosynis , magno labore , & corporis, & animi, sublevabat. Præterea, quod ejus cursum vel maximè retardavit in literis , tanta cupiditate ardebat , errantes animas ad bonam mentem , atque ad legem Evangelicam , revocandi ; ut se, quamvis alieno tum tempore , continere non posset , quo minùs & in scholasticorum circulis , de vera virtute ac pietate sermones injiceret ; & in triviis , pueros, plebemque , fidei Christianæ præceptionibus erudiret ; & omnium ordinum homines, passim ad cultum Dei , studiumque religionis , acri ac vehementi oratione incitaret. Quibus adhortationibus commoti multi, cum ad sanitatem & officium redirent, & crebris altisque suspiriis , veram cordis contritionem ac pœnitentiam testarentur ; ab imperitis quibusdam , Ignatius , in suspicionem & crimen veneficij vocari est cœptus ; quasi homines oratione sua , cardiacos redderet. Cumque insignes quædam , in populo , repentè morum ac vitæ mutationes existerent, & major in dies hominum concursus , ad Igna-

tium fieret ; brevi rem , ad sacros Inquisi-
tores , Toletum pertulit rumor. Glisce-
bat, eo maximè tempore, apud Germanos
Lutherana pestis , manabatque malum
quotidie latius. Quin etiam , in Hispania
ipsa, infani conatus eorum , qui sese Illu-
minatos ferebant , paulò antè , Magistra-
tum diligentia , oppressi fuerant. Quo-
circa, sacri Quæsitores , in omne ejusmo-
di contagionis periculum , excubantes
animo , atque ex hac hominum frequen-
tia, & inusitato agendi genere , veriti , ne
quod novum incendium existeret , Com-
plutum celeriter advolant , in Ignatij do-
ctrinam , ac mores , diligenter æquè , ac
dissimulanter inquirunt ; cùm nihil ne-
que in dictis , neque in factis , à recta fide
alienum invenirent , Ignatium , ne appel-
lant quidem ; tota re delegata Vicario
Archiepiscopi, Joanni Figheroæ, qui dein-
de Regio consilio præfuit ; Toletum,
ipsi, ad sua tribunalia revertuntur. Ne-
que ita multo pòst , Vicarius ipse , magis
usurpandi juris causâ , quam quòd , rem
ulla animadversione dignam putaret , ad
Ignatij diversorium adit quietè , & pau-
ca quædam ab eo percunctatus ; ad extre-
mum exponit ; inquisitum, in ipsius & so-
ciorum vitam , esse acriter ; neque inven-
tum quidpiam vitiosum : proinde , more

suo, animarum saluti operam darent, cum eo tamen, ut non uno, eodemque omnes habitu, incederent; ne, tali tempore, novam aliquam sectam inducere viderentur. Nativi coloris, lanca veste, cuncti utebantur: jussit ille, Ignatium & Artiangam nigro, Callistum & Cazerem, rufo colore, distingui; adolescentem Gallum, nihil mutare; nec recusavit Ignatius, ut erat Magistratibus apprimè obediens. Interjecto deinde, quatuor ferè mensium spatio, cum nihil de instituta docendi ratione remitterent, nec persuadere sibi Vicarius posset, homines idiotas, in iis tractandis, quæ ad Christianæ fidei dogmata perrinent, nusquam labi; rursus in eos, clam institit quærere, sed cum nihilominus sana cuncta reperisset, rem totam, sine ullo judicij tumultu, suppressit. Nec tamen ita multo post, Vicarius idem, tertiam in Ignatium quæstionem exercuit, quorundam calumniis ac suspitione compulsus. Confluebat, ad novum Doctorem audiendum, ut diximus, populi turba promiscua; in iis fœminæ duæ honesto loco natæ, grandis natu mater, & filia forma eleganti; Hæ, publicis Ignatij adhortationibus incitatæ, ut est sexus ad pietatem propensus, adeò exarsere; ut cuncta Hispaniæ valetudinaria peragrarè.

& in Christi Domini gratiam, toto vitæ suæ tempore, pauperibus ministrare decreverint. Hoc animi propositum, Ignatio cùm aperuissent; dissuasit ille magnopere, cùm alias ob causas, tùm, ne cujus oculos animumque sollicitaret aspectus adolescentulæ; non deesse Compluti pauperes, quos officij causâ, si vellent, inviserent; posse etiam, operam dare sacro Eucharistiæ ferculo prosequendo, & alia id genus obire permulta, utriusque sexui, alterius etiam ætati, magis congruentia. Quibus rationibus, & simul auctoritate viri deterritæ, cogitatam quidem illæ deposuere provinciam; veruntamen eâdem agitatæ spiritus vi, temperare sibi postea nequiverunt, quo minùs, inconsulto atque inscio prorsùs Ignatio, pedibus, ac mendicantium specie, aliud genus peregrinationis, longæ difficilisque, susciperent. Giennium in Bætica est urbs, quam nonnulli, Mentefam Oretanorum, falsò putarunt, sacro Sudario in primis visenda, in quo crucem sibimet bajulantis expressa, Christi Domini adoratur effigies. Ad id Sudarium venerandum, pedibus, ut dictum est, paucis admodum conficiis, profectæ, duodecim fermè dierum itinere; cùm in urbe non apparerent, admiratio primùm affinium ac vicinorum

orta: deinde, ubi, à familiaribus cognitum est, peregrinantium habitu, petiisse Giennium, variè pro suo quisque sensu rem interpretari, nonnulli probare factum, plerique reprehendere; quòd eo loco fœminæ, sine comitibus, nullo apparatu, se in iter periculosum dedissent. Doctor verò Cirolius, cujus in tutela erant mulieres, auctorem ejus consilij suspicatus Ignatium, vehementer excanduit, facinus indignum exclamans, hominem externum & ignotum, in aliena patria, suis concionibus cuncta miscere, & ipsas matres familias, à cura domesticarum rerum avocare; nobiles verò puellas, in pudicitia discrimen adducere. Atque his querimoniis, Vicarium perpulit, ut Ignatium in carcerem, misso repentè viatore, conjiceret. Erat æstivum anni tempus, & satis laxa custodia, itaque ad eum, totis iam illis finibus celebrem, vel spectandi, vel audiendi causâ, plurimi ventitabant: Quibus ille securitate mirabili tum Christianæ doctrinæ rudimenta, tum etiam, ubi res exigeret, spiritualium exercitationum præcepta, more suo tradebat. Georgius quidem Naverius, insignis ea tempestate doctor, & magnâ, apud Carolum Cæsarem, gratiâ, cùm ad eum visendum accessisset; animi magnitudinem & dicendi vim admiratus,

ut primum, ad suos domum revertit, hodierna die, vidi Paulum (inquit) in vinculis. Jamque septimum decimum diem, ibi transegerat, non solum innoxius, verum etiam prorsus ignarus, cujus criminis nomine accerferetur; cum ejus interrogandi gratia (multa quippe ad eum, ab iniquis delata fuerant) Vicarius ipse, cum scriba publico, in carcerem venit. Ac primum (ut fit) variis quaestionibus versat in omnes partes, Ignatij animum: dein sciscitatur ex eodem, observet ne Sabbata? cui ille: Utique, in honorem beatæ MARIE Virginis, inquit, nam cæteroquin & Judaicos ritus ignoro, & verò Judæum, patria mea fert nullum. Postremò nostin', ait, mulieres quasdam duas, matrem & filiam? Cum Ignatius annuisset; Nunquid auctor illis fuisti (adjungit) peregrinandi Gienium? Nihil verò minùs, ait Ignatius: quin imò, credas mihi jurato velim, ejusmodi concursationes, & itinera, in universum, utique dissuasisse me: &, si profectæ sunt, me ignaro, atque adeò invito, profectas. Tum hilari vultu Vicarius, humeros Ignatij leniter apprehendens: Atqui ob id ipsum, inquit, in custodiam, te scito fuisse conjectum. His ita peractis, ac tota serie quaestionis, per scribam in commentarios relata, Vicarius abiit. Interea, peregrina-

tione confecta , secundo & quadragesimo denique postquam abierant die , mulieres revertuntur , è quibus Ignatij innocentia , clarè perspectâ ; venit in carcerem Scriba , & Vicarij sententiam Ignatio recitat : qua primùm jubebatur ipse cum sociis , cæterorum scholasticorum habitu incedere , deinde quadriennij præfiniebatur spatium , sacrae Theologiæ cognoscendæ , ante quod exactum spatium , de fidei Christianæ mysteriis , ad populum , verba ne facerent . Quibus auditis , quod ad habitum pertinet , nihil sanè recusabat Ignatius ; dummodò , in idipsum , egenti sibi necessaria præberentur : illam verò temporis finitionem , ægre admodum tulit ; quod , ea re sibi viam , ad procurandam animorum salutem , obstrui cerneret . Itaque , sine ulla dubitatione , Salmanticam , ad sua prosequenda studia , migrare constituit , cùm sesquiannum circiter Compluti moratus , inter eas ipsas difficultates & occupationes , nonnihil tamen è Logicis , Physicisque , & ex ipsis Theologiæ fontibus degustasset . Sed interim , ad gloriam Dei , ne quid in doctrina moribusque suis , resideret infamiae , Toletanum Archiepiscopum (cujus in diœcesi Complutum est) sibi ex itinere adeundum , totamque ei rem gestam , & omnem consiliorum suorum rationem explicandam existimavit . Is erat

Alfonſus Fonſeca, morabaturque eo tempore Pintia: à quo benignè acceptus, animatusque ad cœpta ſtrenuè promovenda, nec non inſtructus viatico, Salmanticam venit, quò comites, jam antè pæceſſerant; quorum ille diverſorium ignorans, primum omnium, ſacram ædem ingreditur; ubi, orantem conſpicata pia quædam mulier, inſtinctu videlicet Numinis, ultro ad eum acceſſit, & ſciſcitata nomen, ad ſocios jam ſibi notos, læta perduxit. Verùm Ignatio, ne Salmanticæ quidem, quieto eſſe, diutiùs licuit. Cùm enim quod ſupererat à ſtudiis, otij; in cohortandis, ad virtutem ac pietatem, & privatim, & publicè, non modò plebeiis, verum etiam principibus viris, inſumeret; neque verò, adjuvante Domino, fruſtrà operam collocaret, omnium in ſe oculos, repentè convertit, urbemque totam, celeriter ejus nominis fama pervafit. Erat omninò inuſitata res, & ipſa novitate valde mirabilis; laicos homines, & externa re nulla differentes à cæteris, (etenim eos Figheroa, ſuo ſumptu, Compluti, ſcholasticorum veſtimentis ornarat) Apoſtolico ac paſtorali propemodum munere fungi palam, & Sacerdotes ipſos, ad partes ſuas ritè obeundas, accendere. Et cùm ejusmodi vitæ genus valde proba-

rent, suspicerentque permulti; tum verè non deerant, qui totam rem secùs interpretarentur, ac diligentius, cautiùsque examinandam putarent. In iis Dominicani Fratres, è divi Stephani præclaro cœnobio, quamquam eorum, pro potestate non erat, ejusmodi quæstio; tamen, quo erant caritatis ardore, sat suum rati, quod communem ad rem totius Ecclesiæ pertineret; Ignatium noscere, spiritumque ipsius, & doctrinæ genus, & vitæ institutum expendere, omnino constituunt. Interim ignarus hujusce consilij Ignatius, confessarium ex ipso cœnobio sibi delegerat. Is igitur confessorius, advenam, jussu Vicarij (nam Prior, seu Cœnobiarcha, tum aberat) in proximum Dominicum diem, ad prandium invitat; nec renuenti, Fac (inquit) paratus accedas; quærenda ex re non pauca. Ac nihilominus, ubi dies advenit, sine cunctatione promissa fecit Ignatius. Exceptus est, cum uno è comitibus, Callisto, comiter. Sublati deinde mensis, utrumque Vicarius cum eodem confessario, & alio è fratribus, in sacellum quoddam seducit, confident omnes. Tum blando vultu Vicarius Ignatium intuens, gaudere se admodum, inquit, ac valdè probare, quòd ille cum sociis, Apostolicum in morem, peregrinando populos doceat,

beat, atque ad cultum Dei, ac studium pietatis impellat: Verumtamen, avere se nosse, quibus maximè literis, operam dederint. Cùm, id quod erat, Ignatius, minimè doctos, fateretur esse: Quid igitur, inquit, expertes doctrinæ, conciones de rebus divinis, habetis? Nos verò, nequaquam concionamur, ait Ignatius; verùm de virtutis pulchritudine, de vitij scèditate, cùm occasio, sese dat, familiariter & ex æquo loco differimus, atque homines ad odium peccatorum, amoremque probitatis hortamur. Ad ea Vicarius: Sed utique de virtutibus, vitiisque, sine liberaliùm artium cognitione, disputari non potest, vel à magistris & libris accepta, vel infusa divinitus: vos verò, neque literis, neque doctoribus operam dedistis, ut ipsi fatemini; restat igitur ut à Spiritu sancto vobis hæc tradita fiat. Tum Ignatius, ut peti se vidit repentino dilemmate, cùm aliquantulùm substitisset: De his, inquit, hætenus. Cùm nihilominus, instaret ille, ac Spiritus sancti verbo, hominem urgeret, oppressus Ignatius, tam perseveranti interrogatione, in eodem tamen gradu constantiæ perstitit, seque nihil præterea responsurum affirmavit, nisi quibus legitimè interrogandi jus esset. Quo loco Vicarius: Itane verò? in-


quit. Cùm novæ impostorum sectæ quotidie pullulent, & in errorem ac fraudem ita multos inducant; vos in reddenda vestræ doctrinæ ratione tergiversamini? Atqui efficiam, ut omnino reddatis. Triduum deinde, intra sacros cœnobij fines, detinentur, atque humanissimè tractantur à fratribus. Eo spatio exacto, ecce tibi, à Baccalaureo Fria, Vicario Salmanticensis Episcopi Notarius ambos perducit in carcerem, includitque, separato à reliqua reorum turba conclavi, mirum in modum squalido ac pervetusto, odorisque teterri-
mi: cuius tectum medium stipes ligneus fulciebat, ac stipiti ferrea catena erat affixa, dodrantium longitudine, circiter novem, bifidâ ad extremum serie: Huic ergo catenæ, altero utrumque pede adstriungunt, sic, ut nusquam alter sine altero progredi, aut loco penè movere se posset. Igitur, tota ea nocte, per summum corporis incommodum, nulla capta quiete, in hymnis & canticis perstiteret. Postridie, ut per urbem vulgata res est, continuò boni viri complures, cum stragulis, culcitrisque, & ciborum apparatu adfuerunt, quorum benignitate recreatus Ignatius, ac paulo clementiùs haberi deinde, in ea custodia, cœptus est. Itaque ut antè Compluti, sic eo tempore concursus ingens hominum, ad eum fieri;

ad quos ille, admirabili tranquillitate, de contemptu rerum humanarum, de futuro extremo judicio, deque sempiternis præmiis atque suppliciis differebat. In iis, Francisco Mendozæ (qui postea S. R. E. Cardinalis & Episcopus Burgenfis, est mortuus) miseranti casum ipsius, & amicè ex eo quaerenti, graviterne ferret custodiam & vincula? Tantumne malum, tibi videretur esse carcer? inquit Ignatius: Atqui, scito, urbe Salmantica tota, non ita multas esse compedes; manicasve; quin ego plures, Christi Domini causâ, vehementer exoptem: Interea, Baccalauteus Frias, ad carcerem accedit, Ignatium & Callistum, diversos interrogat, ac variis percontationibus, quales haberi à iudicibus solent, utriusque sensûs & animum diligenter explorat. Cum illi congruentia responderent, nec modò sibi, sed etiam inter se mirè constarent; denique librum Exercitiorum, de quo inaudierat, poscit; nec recusat Ignatius: quin etiam, sibi præterea esse tres in eadem urbe socios aperit, editque diversorij nomen, ac notas, quibus inveniri sine errore possint: neque verò superseedit ille, missis Licitoribus, eos in carcerem tradere inferiorem; ne quod iis colloquium, cum Ignatio, neu qua communicatio consiliorum esset. Post hæc, ablatum Exercitiorum Li-

bium, & ipsemet accuratè perlegit, & examinandum præterea tradidit, tribus Theologiae doctoribus: qui dum singula diligenter expendunt, accedit interea res, ad innocentiam Ignatii, & Sociorum declarandam, non levis momenti. Cùm enim cæteri, qui in vinculis tenebantur, per negligentiam custodum, effracto carcere, omnes repenti dilapsi essent; Ignatius, comitesque soli, in summa fugiendi licentia, postridie ibidem inventi sunt, & cunctis admirantibus, approbantibusque, confestim in amplam domum, & commodam, inde Magistratum jussu, traducti. Citatus præterea Ignatius, ad Baccalaureum, & reliquos libri sui Recognitores; cùm & de Exercitiorum ratione, & de præcipuis fidei Christianæ mysteriis, multa ex eo quærentur, paucis ac demissè præfatus, neque se vacasse admodum litteris, & quæcumque sentiret, diceretve, Ecclesiastico judicio, & censuræ cuncta submittere; ad singulas quæstiones de sanctissima Trinitate, de Incarnatione Domini, de Sacramento Eucharistiæ, aliasque complures, ita respondit, ut Judices ipsi penè obstupescerent. Præterea, è Jure canonico, proponitur ei difficilis quidam nodus, quem ipse, cùm item responsa Doctorum, se ignorare dixisset, illicò solvit egregiè. Postremò

iustus, primum Decalogi præceptum, uti
 consueverat ad populum, sic ibidem re-
 pentè explicare; in eam sententiam, usque
 adeò variè & copiosè dixit, ut omnem illis
 præterea interrogandi cupiditatem exe-
 merit. His rebus ita peractis, cùm dies
 vinculorum esset secundus jam & vigesi-
 mus, unâ cum sociis evocatur, ad iudicum
 sententiam audiendam; cujus erat summa,
 innoxios eos, & ab omni hæretica labe in-
 tactos, videri; ac proinde, posse arbitratu
 suo, in adjuvandos homines ac plebem
 erudiendam incumbere: tantùm, ne intra
 quadriennium in Theologiæ studio exa-
 ctum, quæ cogitatio, lethali; quæ, veniali
 crimine teneretur, (qui locus in toto penè
 Jure Pontificio ac Theologia difficilissimus
 est) auderent ipsi per se definire atque sta-
 tuere. Id autem, propterea quòd, in Exerci-
 tiorum libro, signa quædam tradita vide-
 rant Iudices, ad peccata capitalia, à veniali-
 bus dignoscenda: Quæ tamen, quòd nihil
 continerent à recta fide alienum, nomina-
 tim improbare non audebant. Recitatâ
 sententiâ; cùm honorificè tractatum ab se
 Ignatium, putarent Iudices; ille verò suis
 rebus, è conscientia apprimè confidens, ve-
 hementer indoluit, ab iis, quos veræ & Ca-
 tholicæ fidei tutores ac præfides agnosce-
 bat, nullo in suis neque dictis, neque scri-

ptis, deprehenso vitio; tamen in re tanta, tamque necessaria, sibi silentium imponi; atque iter, ad excolendos, ac pro viribus adjuvandos homines, impediri. Quæ ipsa res inclinatum jam antè animum ejus impulit, uti satius judicaret ex hisce difficultatibus, quas in Hispania objici sibi subinde videbat, ad scholas Parisienses, in Galliam ultrò sese transferre: ubi tum ob suam novitatem, & ejus linguæ inscitiam, sibi minùs interim negotij putabat fore; tum propter illius Academiae celebritatem atque frequentiam, non defuturos deinde, quos ad suum institutum, atque ad Apostolica vestigia sectanda pelliceret.



Lutetiam proficiscitur.


C A P. XVIII.

ET quoniam, ad iter adeò longinquum & anceps, non idem erat sociis animus: atque etiam, ut maximè incolumes eò pervenissent, incertum erat, apud ignotas nationes, quam copiam in studiis litterarum degendi, essent habituri; communicato cum iis con-

filio, statuit Ignatius antecedere solus ipse Lutetiam: & si quidem res facultatem habitura videretur, ut eos ibidem alere posset, ipsos evocare per literas; sin minùs, tota de re facere certiores; ut quamquam diversis locis, eadem tamen conjunctione animorum, emenso interim Philosophiæ ac Theologiæ curriculo, intermissam ad tempus consuetudinem, Deo volente deinde repeterent. Rebus igitur ita compositis, quamquam è præcipua Salmanticensi nobilitate, multis ægre ferentibus, ac majorem in modum renitentibus, vigesimo circiter die, quàm è custodia exierat, in viam se dedit Ignatius; onustum libris asellum, præ se agens; ac Barcinonem devenit. Hic verò, ut inter veteres amicos ac familiares, omni ope certandum illi fuit, ut se à lachrymis atque à complexu carorum avelleret, etiam atque etiam deprecantium, ne patriam, cum externa regione mutaret, neu se tali tempore, in manifestum vitæ periculum, ultrò dmitteret. Vigebat adhuc bellum, inter Hispanos Gallosque; & circa regni utriusque præcipuè limites, infesta latrociniiis loca, & recentes multorum cædes ad metum proponebantur. Sed ille, nec terrore nec precibus, de suscepto consilio dimoveri se passus, certè illud recusare non po-

ruit, quo minùs, tum ad sumptus itineris, tum ad necessaria Parisiis comparanda, nummorum aliquid, partim in numero, partim in nominibus, ab Elisabetha Rosella, & aliis quibusdam amicis acciperet. Quibus ille subsidiis, ac præcipuè divinæ Bonitatis ope munitus, hyeme summa, pedibus, ut solebat, nullo duce vel comite, inde profectus est, sub initium anni M. D. XXVIII. cumque Januarium totum, in itinere posuisset; Februario mense Lutetiam, sospes introiit. Ibi, quod ad studia pertinet, respiciens perexiguum præteriti temporis fructum, rationibus suis accuratè subductis, ad Dei gloriam statuit, in litteras toto pectore incumbere; cumque experiendo jam cognovisset, eam esse humanæ mentis imbecillitatem, ut in plura, uno eodemque tempore, vix atque ægrè sufficiat; damnata priorè festinatione, in posterum, compendiis omissis, regiâ viâ procedere, & studiorum suorum novum initium ordiri decrevit. Igitur, ad Montis acuti collegium itare quotidie, ibique inter procacium puerorum greges, matura jam ætate vir, grammaticæ rudimenta repetere non dedignatus est. Simul etiam de stato precationis tempore, & vexatione corpusculi, quo plus otij ac vigiliæ, studio superesset, multùm immi-

auit ; sic tamen , ut illa præcipuè tria nunquam omiserit : primum , ut quotidie Sacrificio Missæ religiosè interesset : alterum , ut octavo quoque die post Pœnitentiæ Sacramentum , cælesti Pane sese reficeret : extremum , ut bis quotidie sua ejus diei dicta , facta , cogitata quam diligentissimè recognosceret ; conferensque hodiernum cum hesterno die , hebdomadam cum hebdomada , mensēque cum mense , suos in spiritu , vel progressus vel regressus perquàm accuratè exploraret atque perpenderet. Procurationem quoque alienæ salutis , & institutam consuetudinem agendi cum proximis , tantisper dum literis , ac præsertim Philosophiæ vacaret , aliqua ex parte remisit , nunquam tamen omnino deposuit.



Extrema inopiæ incommoda superat.

[C A P. XIX.

IAM verò satis usū ipso edoctus , quantum detrimentum studiis afferat mendicitas , & cura tolerantiæ in singulos dies vitæ ; & nihilominus

optans Christi Domini, & Apostolorum exemplo, nihil prorsus in hoc sæculo possidere; piorum benignitate ac facultatibus, totam rem ita moderari constituit, ut neque in diem, ut antea, precario victitaret, & nihil idcirco, de voluntariæ paupertatis proposito meritoque deperderet. Sed ea res primis utique mensibus minimè cessit illi è sententia. Cùm enim sese in Hispanorum aliquot contubernium contulisset, qui plurimi Parisiis ipso belli tempore versabantur, & exactam è syngrapha Barcinonensi pecuniam, cuidam ex eadem natione custodiendam dedisset, eam ille clàm suos in usus non optima fide convertit; cumque postea reddendo non esset, reliquis jam nummis insumptis Ignatius, & à locupletibus amicis, quorum ope adjuvari posset, longo intervallo disjunctus; tantâ subitò rerum omnium inopiâ oppressus est, ut ei cibum ostiatim quæritare quotidie, & in hospitalem sancti Jacobi domum, infimis precibus exorato ejus loci præfecto, demigrare necesse fuerit gravi sanè incommodo. Quippe Lutetia Parisiorum, urbs in primis Europæ rotius & magnitudine & celebritate visenda, trifariam est divisa: partem unam, quàm Sequana fluvius insulam efficit, regia veteri, foro, & tribunalibus nobilem, vul-

gò Civitatem appellant; altera, quæ novam Regiam continet, Oppidum dicitur; tertia pars, jam inde à Carolo Magno dicata Musis, Universitas nominatur. In hac, præter ceteram incolarum turbam, scholastici maximè inhabitant, ac numerantur ibi collegia permulta libero aditu, cum suis unumquodque, liberalium artium discipulis, & doctoribus, & præfecto collegij, quem Primarium vocant. Igitur, ex ea vicinitate in sancti Jacobi hospitium, quod procul inde est in suburbio, extrema necessitate compulsus Ignatius, in tanto locorum intervallo, cum aliis afflictabatur incommodis, tum verò, quòd cum ante lucem in academia inciperent scholæ, nec nisi nocte desinerent; ipse, illius hospitij legibus, nec manè, ante solis ortum egredi poterat, & vespere ante occasum, regredi cogebatur; sic, ut inter eundum & redeundum, quamvis industriò, ac vigilantì discipulo, multum & de magistri dictatis & de tota scholarum exercitatione deperiret. Cui tanto detrimento, cum in præsentia, nullum aliud remedium occurreret, consilium cepit, more scholasticorum egentium, ea conditione, locandi operam suam alicui ex academix Primariis, Doctoribusve; ut, quod sibi à rebus domesticis otij superes-

set, id totum in scholastica disciplina studiisque doctrinæ consumeret. Sed magis magisque probante Deo constantiam & patientiam viri, conditionem ejusmodi, quamvis magnâ adhiberâ diligentia, nactus est nullam. Itaque dejectus hac spe, cum id ærumnosæ vitæ genus aliquandiu tolerasset; & quos in Hispania reliquerat socios, de statu rerum suarum per literas monuisset; hortatus, ut ibidem ex condicto circulum studiorum absolverent; rationem inivit multo commodiorem, ut indictis vacationum feriis, in Belgium, atque interdum etiam in Angliam, sive Britanniam, ad Hispanos negotiatores excurreret: quorum benignitate, cum facile obtinuisset annuam pecuniæ summam, Lutetiæ, toto studiorum tempore, certis pensionibus exigendam, commodiùs multò cœpit, in liberalium disciplinarum cognitione versari. Cumque octodecim ferè menses, Latinæ linguæ tribuisset in Montis acuti collegio; in collegium, cui à sancta Barbara, nomen est, ad Philosophiæ studia transiit, alacritate mirabili: ac primum occurrentes denuò rerum cælestium importunas imagines, quamquam eximia cum animi delectatione conjunctas, eandem spiritus constantia, qua superiores illas, iterum ab se rejecit ac repulit; dein-

de magistris attentè audiendis, multa ac diligenti eorum, quæ audierat commutatione, quotidianis denique gymnasij exercitationibus, triennio & mensibus sex (quod spatium temporis, curriculo Philosophiæ, in academia illa tribuitur) ita profecit, ut honorifico Magistri iudicio ac testimonio, (is erat Joannes Penna Philosophus) post consueta certamina, ritu solemni, laurea cæterisque doctrinæ insignibus decoratus sit. Post hæc, in cœnobij Dominicanæ gymnasio, sacram Theologiam aggressus est, ingenti sanè labore & industria, cum præter cæteras lucubrationes, hyeme sæviente, quotidie manè ante lucem ad scholas, quæ illâ circiter horâ, ibi habebantur, accederet; atque ex eo studio, tantum Deo adjuvante percepit, quod satis esset, ad fidei doctrinæque suæ rationem, sine suspitione ulla novitatis, ex Patrum decretis atque auctoritate reddendam.





Varie propter Christum exercetur.

C A P. X X.

NEQUE verò, quamvis interim à plebis cathechesi, atque à publicis actionibus abstineret, idcirco tamen, quoad per scholas licitum est, ab adjungendis ad Christum hominibus, animandisque ad studium veræ laudis & gloriæ destitit; quâ propter, multi nec infimæ sortis viri, privatis ipsius colloquiis ac monitis incitati, partim, castigato vetere luxu, Christianæ disciplinæ severitatem induerunt; partim etiam, solemnî voto, varia religiosorum instituta professi sunt; partim denique, ingenti academîæ totius admiratione, in Christi gratiam, pecuniâ egentibus distributâ, pauperem vitam agere, atque adeò ad conculcandum penitus omnem sæculi fastum, & expianda superbîæ crimina, palam per vicos & compita, manum ad stipem ipsi porrigere, victumque palam emendicare cœperunt. Quos tamen amici, rem indignè ferentes, cum neque pre-

cibus neque minis , à proposito revocare
 valuissent , facta manu denique , ab hospi-
 tali domo sancti Jacobi , quò sese contu-
 lerant , vi armisque , in pristinum acade-
 miæ diversorium , ad sua prosequenda
 studia retraxerunt. Ignatius verò tantam
 ejusmodi rerum invidiam subiit , ut præ-
 ter cæteras injurias & maledicta , falsis
 etiam criminationibus , ad sacrum Inqui-
 sitorem , semel ac iterum delatus sit. Is
 erat , ea tempestate , Matthæus Ori , ex
 Dominicana familia , Theologiæ magi-
 ster , tum eruditione , tum præbitate con-
 spicius ; qui accusatorum fraude com-
 perta , Ignatium non absolvit modò , sed
 etiam miris ornavit laudibus , ipsumque
 Exercitiorum librum , qui præcipuè in
 suspicionem crimenque vocabatur , tan-
 tùm abfuit , ut damnaret ; ut etiam sibi
 ejusdem exemplum , Ignatij permissu , de-
 sumperit : Præterea absolutionis ac sen-
 tentiæ formulam , publici Scribæ chiro-
 grapho & signo munitam , quam , contra
 iniquorum calumnias , quodocunque
 opus esset , proferret , tametsi minùs gra-
 tum id , potentibus quibusdam viris fore ,
 videbat , Ignatio petenti concessit. Neque
 verò pro Christi nomine solùm hac falsæ
 accusationis procella defunctus Ignatius
 est ; sed eorum ipsorum opera , qui illum

deinde vel maximè dilexerunt, virgarum quoque publicè periculum adiit. Mos est Porisii, in scholasticos improbos ac seditiosos, ad sancendam academix disciplinam, in hunc ferè modum animadvertere. Dissimulato consilio, ad condictam diem, in aulam collegij, Primarius, Magistrique, nodosa instructi virga conveniunt, comprehensumque repente noxium, & in medio confessu nudatum, certo plagarum numero, singuli afficiunt. Id supplicij genus, cum ad sensum corporis peracerbum est, tum verò ad ignominiam ac dedecus, longè turpissimum, deque ipsius loci nomine, Aula vulgò appellatur. Hunc igitur cruciatum ac notam maleficis constitutam, Ignatio infonti, quòd condiscipulos, festis præcipuè diebus, à schola ad oratorium & sacramysteria Confessionis, Altariſque traduceret, vehementer iratus magister ipse Joannes Penna paraverat, Jacobo Govea Lusitano, Collegij Primario, in suam sententiam facilè adducto; quippe qui, jam antè privatim erat infensus Ignatio, quòd familiarem quendam suum, Amatorem nomine, severioris vitæ præceptionibus imbuisſet, atque (ut pietatem ferè interpretantur homines) infatuasset, abductum à curis inanibus, & jucundo convictu.


amicorum, atque à pristina consuetudine. Ut igitur dicta supplicio dies illuxit, adventans jam ad scholas, ab amico fidei maturè monetur Ignatius, ne intra collegij septa, utique illo die, inferat pedem; concitatos in eum esse omnium animos; pœnas Aulæ daturum extemplo, nuncaveat. Ad cujus rei nuntium, ancipiti deliberatione distractus Ignatius, quòd & pro Christi nomine verbera, & contumelias perpeti, mirificè optabat; & supplicij apud homines adeò turpis infamiam metuebat, ne complures à juventute, ipsius operâ, jam ad meliora conversos, nec dum in bono stabiles, à sua consuetudine atque auctoritate avocaret, iterque sibi ad alios etiam deinceps Christo lucrificandos abrumperet; totam rem, ad ipsius Goveæ arbitrium, judiciumque rejicere statuit: quod ille, re cognita decrevisset, id ex divina maximè gloria & voluntate futurum; neque de ejusmodi sententia, ullis amici denuntiationibus precibusve dimoveri se passus, quamquam horrenti pœnæ imminentis acerbicatem, & renitenti carni, vim fortiter intulit: ingressusque collegium & rectà Goveam petens, nondum è cubiculo egressum, placido ac sereno vultu, & altam animi pacem ac securitatem

indicante : *Simeæ mihi* (inquit) *existi-*
mationis & incolumitatis , quàm divi-
næ gloriæ salutisque animorum cura prior
esset ac potior ; nequaquam hodierno die
pedem , intra fines hujusce collegij posuis-
sem ; neque enim antequam huc veni-
rem , ignarus eram , GORVÆ , quantum
è vestra omnium indignatione dedecoris ,
quàm acerba tormenta me maneant. Sed
quoniam , nihil omnino mihi , vel ad me-
ritum optabilius , vel ad veram dignita-
tem præclarius ducō , quàm Christi Domini
causâ , tam gravia tamque multa pro me
perfuncti ; vicissim probra , plagas , mor-
tem denique perpeti ; idcirco nimirum , ad
scholas accessi , & ultro memet in tantum
& corporis & famæ discrimen objeci. Verum
enim verò , mihi non modò , quid votis
meis ac desiderio ; sed etiam , quid proxi-
morum rationibus & sempiternæ salutis con-
ducat , charitatis lege considerandum est.
Multos habeo adolescentes , Dei beneficio
nuper è cæno flagitiorum emersos , ac vix
dum avulsos ab improborum pestilenti con-
sortio ; hos ego vereor , ne si me in tam
honesto conventu publicè vapulasse consti-
terit , à meo sermone , congressuque pro-
tinùs avocet infamia metus ; ac proin-
dè , ut sunt flexibiles hominum volunta-
tes , ad eadem illa saxa , quibus paulò

antè adhaerant , ingenti Damonum gaudio , & fervor aetatis , & prava consuetudinis astus abripiat. Simul etiam , (verum ut fatear) tui me Govea , doctorisque mei Penna miseret , qui Christianam pietatem ac fidem , Sacramentis professi , ceterisque ad exemplum justitiae , virtutisque praepositi ; CHRISTI famulum , CHRISTI causam agentem , addò acerbè insectamini ; & qui , quâ poenâ lex affici jubet eos , qui scholasticos depravare , magistris illudere , seditiones conflare voluerint ; eâdem dignum judicatis eum , qui juventutem à viriis , doctores à jurgiis , academiam à tumultibus vindicare conatur : quæ , quoniam mecum ipse reputans , non levis momenti ducebam esse , quamquam cupidus inimicorum odij , vel meo sanguine explendi , tamen pro nostra necessitudine deesse nolui , quominus , eadem tibi quoque , integrâ etiamnum re , considerata proponerem. Mihi , ut dixi , pro Christi nomine vexari ac torqueri optatissimum est : jamque si videtur , sponte ad patibulum pergo : Tu , Lutetia Parisiorum , in Sanctæ Barbara collegio , in ejusmodi causâ , tale documentum vel pietatis , vel aequitatis , dari an expediat , pro tua sapientia ac religione constitue. Vixdum Ignatius dixerat , cum Govea , vir & , ni concitaretur aliunde , suo-

pte mitis ingenio, & tum instinctu divi-
no valde compunctus, illicò cœpta dam-
navit, ac majorem in modum detestatus
est; apprehensumque amicissimè Ignatium deduxit in aulam, quò jam collegæ
cum reliqua turba parati convenerant.
Ibi silentio indicto, repentè contra om-
nium expectationem, de Ignatij laudibus
orationem instituit; viri fortitudinem,
innocentiam, charitatem extollens; se
ipsum & cæteros, qui innoxio periculum
struxerant, vehementer accusans; quam in-
sententiam cùm multa dolenter, graviter-
que dixisset, ad extremum obortis lacry-
mis, ad Ignatij genua procidit, precatus-
que delicti veniam, & apud cæteros, il-
lum in admirationem gratiamque resti-
ruit, & ipse in omni deinde vita, Ignatium
& socios, præcipuo amore, studioque com-
plexus est.





De sociis ad Ignatium adjunctis.

C A P. XXI.

H A S C E igitur, aliasque ejusmodi insectationes atque pericula, Ignatius, Christi causâ contraxit; attamen idem plurimorum quoque sibi gratiam ac benevolentiam, optimis artibus peperit. Fuit enim in illo, præter divinitus infusa charismata, mirum etiam, atque efficax ingenium, & studium ad animos hominum demerendos. In Principum amicitias opportunè insinuare sese, easdemque obsequio & submissione tueri; pares, facilitate ac suavitate morum allicere; inferioribus & egentibus, auctoritate, operâ, necnon è suis angustiis, etiam pecuniâ præstò esse; morbo aliquo laborantes, vel cum valetudinis & contagionis periculo, adire, solarique amantissimè; eorum, quibuscum viveret, ageretve, vel difficultatem naturæ, & arrogantiam perpeti; vel ineptias ac stultitiam, quoad ita res ferret, exorbêre, dissimulatione mirabili; ad aliorum atbi-

trium ac voluntatem , quibuscunque rebus honestè posset, semper accommodare se ac flectere ; omnibus denique , in Christi gratiam , omnia fieri : ubi penitus in hominum sensus , ac voluntates irrepererat, tum demùm, officiis ac benevolentia comprehensos occupatosque , pro suo quenque captu , sensim & cautè progrediens , Christianæ religionis & officij præceptionibus excolebat. Atque his fermè artibus, & simul, sanctimonix ac frugalitatis exemplo , multos , ut diximus, à turpi ac flagitiosa vita , non modò ad sobrietatem & continentiam , sed etiam ad contemptum rerum mortalium , atque ad salutaria consilia Christi convertit. Complures præterea Hæreticos, grassante jam tum peste Lutherana, tempestivis disputationibus , monitisque convictos , ad sacra Quæditorum tribunalia volentes adduxit ; & cum sancta Romana Ecclesia, in gratiam , secreta abjuratione restituit. Jam verò , quod ei, vel in primis propositum initio fuerat , ut aliquos , ingenio doctrinaque præstantes , ad suum institutum ac vitæ rationem aggregaret ; in id ipsum , per Theologiæ maximè tempus incubuit : adjunxitque sibi , Deo bene juvante , Juvenes novem , ex academia universa lectissimos ; quorum primus fuit Pe-

trus Faber Allobrox, pago Villareto, Genevensis diœcesis, humili natus loco, sed egregiè pius, quippe qui duodecimo ætatis anno, per summum sanctimonix studium, virginitatem Deo voverat; idemque, ad literas à vita pastoralis traductus, tantum ingenio industriâque profecerat, ut eum in locis Aristotelis difficilioribus, magister ipse Penna consuleret. Hunc igitur Ignatius, & studiorum, & contubernij communione sibi conjunctum, licet socium gloriosi operis, ipso initio destinasset, non tamen continuò illi rem aperuit, neque ad tantam perfectionem impellere confestim aggressus est; sed conscientiam excutere, & in se ipsum quotidie diligenter inquirere, primum edocuit; deinde ad totius anteaactæ vitæ noxas, per sacram confessionem expiandas adduxit; postremò, cum jam Philosophiæ curriculum exegisset, spiritualibus exercitationibus perpolivit; adeò propensum ad pœnitentiam, tantoque animi ardore succensum, ut hyeme summa, concretum glacie flumen Sequanam, plaustris impunè prementibus; in separata Jacobæi vici domuncula, propositas meditationes, & quidem insidens nivi, sub dio peregerit, sexque ipsos dies, omni prorsus cibo potuque abstinerit; in ediam longiùs uti-

que protracturus, nisi eum, re animad-
 versa, consultoque suppliciter Deo, ve-
 tuisset Ignatius; & sanè respondit operi
 fructus. Cum enim antea, in eligendo
 certo vitæ genere, Faber mira animi soli-
 citudine variisque scrupulorum molestiis,
 adeò torqueretur, ut præ nimio angore,
 sese in avias abdere solitudines, ibique
 radicibus herbarum victitare penè decer-
 neret; ex hac spirituali exercitatione vo-
 cari se, unà cum Ignatio, ad animorum
 subsidium, non dubiè sentiens, tantam
 est pacem ac tranquillitatem conscientiae
 consequutus, ut ex vehementissima tan-
 quam agitatione ac salo, placidum tu-
 tumque portum se denique nactum esse
 profiteretur. Ex eodem contubernio, Fran-
 ciscus quoque Xaverius, nobilis Can-
 taber, idemque non vulgari eruditione;
 quippe qui, laurea magistrali donatus,
 Lutetiae postmodum publicus Aristo-
 telis Interpres exstiterit; quamquam
 principio, ita non studiosus Ignatij, ut
 ejus pietatem (ut fit) etiam procaciter
 irrideret; tamen viri tum patientiâ; tum
 obsequiis adeò delinitus est, ut ad illius du-
 ctum arbitriumque, sese omninò contu-
 lerit. Hunc & divitiarum affluentia, &
 vivido ingenio, & viribus corporis præfe-
 rocem, admirabili prudentia, ac lenitate

mansuefecit Ignatius ; in eamque rerum humanarum despicientiam & charitatis ardorem paulatim adduxit , ut inter ipsa Exercitia spiritualia, tum ad carnis macerationem quatuor dies jejunus omninò transegerit ; tum verò , quòd inter juvenum greges desultor eximius , corporis agilitate , sibi nimium placuisset : ad ejus piaculum vanitatis , membris valido fune perstrictis, non sine acri sensu doloris, dies aliquot, in commentandi orandique labore atque attentione perstiterit. Hic est Xaverius ille , qui non multò deinde post, Joannis Lusitaniæ Regis rogatu, ex auctoritate Pontificis Romani, missus in orientem , plenus Apostolico spiritu , totâ Indiâ maritimâ , summis laboribus ac periculis , peragrâtâ , in ultimas Japoniorum terras , Evangelij lumen primus intulit, atque ingenti infidelium numero ad CHRISTUM adjuncto , multis clarus miraculis , in ipso aditu Sinarum , excessit è vita. Porro Xaverium & Fabrum imitati sunt , Jacobus Laines Seguntinus, qui deinde Societati nostræ, proximus ab Ignatio præfuit ; vir de Christiana republica in primis optimè meritus ; & Alfonsus Salmeron Toletanus , Græcis & Latinis literis admodum eruditus : uterque confecto Compluti , Philosophiæ curri-

culo ; Parisiosque, partim Theologiæ cau-
 sâ , partim , etiam Ignatij noscendi gra-
 tiâ , profecti , cujus de laudibus , jam
 tum in Hispania , constanti hominum
 sermone , multa cognoverunt. Accessit
 ad hos etiam , Nicolaus Bobadilla , Pa-
 lentius , doctus juvenis , & Philosophiam
 publicè professus in oppido Hispaniæ,
 Pintia : itemque præstanti indole , Simon
 Roderigius Lusitanus , & post aliquan-
 tû , Claudius Jaicus , Gebennensis ; &
 Joannes Codurius , Ebredunensis ; Pas-
 chasiusque Broëtus , Ambianensis , Fabri
 præcipuè (cujus jam erat nomen Parisiis
 celebre) monitis & exemplo permoti. Hi
 omnes impulsu planè divino , cùm alter
 alterius consilium ignorarent , post ex-
 actissimam totius vitæ confessionem , spi-
 ritualibus exercitiis , ab Ignatio perquam
 diligenter exculti , vehementi quadam
 spiritus motione , sese non quidem in um-
 bram ac solitudinem , sed in solem ac pul-
 verem evocari , ad prælia Domini prælian-
 da senserunt. Nec fuit , è novem ullus fe-
 rè , quin ad propitiandum cœleste numen,
 ejusque voluntatem suppliciter exquiren-
 dam , præter cæteram abstinentiam , &
 incommoda voluntaria , tridui , ut mini-
 mum , totius inediam , sponte pertulerit,
 nimis audaci fortassè consilio ; nisi eos , &

multorum exempla, & fervor simul ætatis, ac pietatis excuset. Hosce igitur socios, Dei beneficio nactus Ignatius, (quorum tres erant superstites, hæc scribente me, Salmeron, Roderigius, & Bobadilla) quòd jam diu moliebatur & agitabat animo, re ipsa aggredi primo quoque tempore statuit; ut Hierosolymam, Pontificis maximi permissu repeteret, gentesque finitimas Christiana quondam religione præstantes, deinde Mahometis nefaria superstitione deceptas, vel à miserabili errore, ad veritatem Evangelij revocaret, vel certè (quod erat proximum) sanguinem ac vitam, in causa tam pia tamque gloriosa, profunderet. Neque sanè difficile fuit, cæteros jam sponte currentes, & Dei amore incensos, in eandem sententiam & propositum adducere: Et quia plerique Theologiæ studia, nondum absolverant; ne interim conceptus ardor animi refrigesceret; & simul, ut ipsorum, eò gratius divinæ Majestati obsequium esset, quò majorem sibi met ipsi necessitatem servitutis ac religionis imposuissent; implorato beatissimæ Virginis patrocinio, ac sancti Dionisij Areopagitæ, cujus in tutela, Parisij sunt; in Æde suburbana, quæ Mons Martyrum, dicitur; sub Confessionis & Eucharistiæ mysteria, sese voto obstrin-

xere singuli , emensis Theologiæ spatiis, continuò mortalibus rebus nuntium remittendi , atque in paupertate perpetua, serviendi gloriæ divinæ, salutique animorum : ac nominatim, ad constitutam diem, Hierosolymam, eo consilio navigandi ; ut in conversionem infidelium toto pectore incumberent , palmamque martyrij , studiosè captarent : id consilium , si qua re impediretur, anni circumacto spatio, denique Romam adirent , suamque operam summo Pontifici, Christi Vicario , ad spirituale proximorum auxilium, sine ulla vel præmij pactione, vel temporum aut locorum exceptione, deferrent. Id votum, in eo templo, vovêre ingenti consensu & alacritate , anno post Christum natum M. D. X X X I V. decimo octavo Kalendas Septembris , quo die , Assumptionis Mariæ Virginis anniversaria gratulatio celebratur ; idemque votum , eodem loco dieque pariter , anno proximo , ac tertio renovarunt : Atque ea res , tum ad conspirationem ac vinculum animorum, tum ad confirmandas in suscepto consilio mentes omnium, mirificè valuit. Incendebat præterea studium alter alterius , omni genere officij & charitatis, duce ac moderatore simul Ignatio , quem omnes ut parentem eundem & unicè diligebant, & valde reve-

tebantur ; ac primùm spirituales modò apud hunc , modò apud illum agitare cœtus ; ibique suavissima de rebus divinis habere colloquia, & sese mutuò ad Christianam laudem & decus hortari ; deinde , in studiorum difficultatibus, locisque obscurioribus adjuvare inter se ; & lucubrationes quisque suas , lumenque doctrinæ & ingenij, cùm res exigeret , in commune conferre : præterea, invicem sibi, omnibus in rebus , adesse certatim ; denique à frequenti Sacramentorum usu , & assiduitate precandi meditandique , nullo pacto recedere. Quibus rebus & varias Dæmonum insidias tentationesque, conantium eos ab incepto revocare, vicerunt : & brevi, tantâ coaluère concordia, ut quanquam è diversis , nec non infensis inter se orti nationibus, gratia tamen superante naturam, intra eosdem alti parietes , atque adeò , ex uno propemodum omnes utero , in lucem editi viderentur.

LIBRI PRIMI FINIS.



SANCTI
IGNATII
VITÆ
LIBER SECUNDUS.

Ager Hispaniam repetit.

CAPUT I.



INTEREA Ignatius, gravi morbo, partim è maximis laboribus vigiliisque, partim etiam è Parisiensis cœli gravitate contracto, vexatusque subinde stomachi jam pridem affecti do-

loribus acerbissimis ; post multa remedia incassum adhibita , jubetur à medicis, ad patrium solum , & incunabula se referre ; quod unum ad inveteratas corporis ægri- tudines, certissimum perfugium, vulgò ar- bitrantur. Nec recusavit ille ; non tam vale- tudinis ratione, vel desiderio suorum addu- ctus , quàm duabus aliis maximè causis : primum , ut quibus olim in regionibus, malo publico , juvenilis licentiæ ac vani- tatis ipsemet specimen existitisset ; ibidem, ad spirituales ædificationem , vicissim aliqua Christianæ humilitatis atque mo- destiæ documenta præberet ; populares- que suos , & verbo , & exemplo , ad stu- dium pœnitentiæ salutaris accenderet : deinde , ut , quoniam sociis aliquæ erant in Hispania rei familiaris tricæ ; eas , eo- dem itinere atque opera , ipse expediret ; neque per eam causam , illi vel avocaren- tur à studiis , vel recenti etiam tum voca- tione , & expeditionis tam arduæ tamque laboriosæ consilio , patriæ dulcedinis ac domesticæ tentationis, quâ nulla ferè pe- riculosior est , aleam subire cogerentur. Simul etiam , è relictis olim in Hispania sociis , cogitabat , si quem in proposito constantem inveniret ; secum in eandem expeditionem educere. Cæterum , ne quid è suo discessu, res Parisiensis caperet detri-

menti, primùm commilitones ad perseverentiam ac fidem, paucis adhortatus; Petrum Fabrum, & annis & vocatione antiquissimum, illis præposuit; cui interim obtemperarent, quem Parentis ducerent loco: deinde tempus certum edixit, iisdem approbantibus; quo tempore, cunctis, rebus omnibus præter viaticum & necessaria scripta, ex voto abdicatis, navigaturi Hierosolymas Italiam peterent, sequæ jam antegressum Venetias, convenirent. Dicta profectiioni dies est octavo Kalendas Februarij, anno M. D. XXXVII. ineunte, qua die Apostoli Pauli Conversio beata recolitur. His ita constitutis, anno M. D. XXXV. per autumnus tempus, ipse non sine lachrymis, mutique amoris magna significatione, singulos indigressu complexus, cùm vellet de more pedibus, quamquam ægro corpore, proficisci; coëmpto à sociis equo uti coactus est: brevique, partim ex ipsa vectione, locorumque mutatione; partim etiam, è studiorum intermissione, morbo levatus, Pyrenæo superato, Guipuzcoam Provinciam atrigit. Ejus de adventu, propinqui festinè præmoniti, ab iis qui hominem ad Aquas Angustas, quàm hodie Bajonam appellant, in transitu agnorant; ~~exemplò~~, quòd regni limes latrociniis in-

festus esset , armatos homines ad eum excipiendum , tuendumque dimiserant : atque hos primum Ignatius , in Guipuzcoæ finibus , deinde etiam , quæ jam tum erat fama de sanctitate viri , clericos omnes , agmine composito , ad oppidum Aspeithiam , honoris causâ obvios habuit . Cumque ab iis , & ingenti præterea gratulationum turba deduceretur ad ædes paternæ ; ille , ut ostenderet , quantopere ab ejusmodi fastu , pompæque abhorreret ; ut primum potuit , ex eo comitatu sese proripiens , ad publicam hospitalet domum divertit , victumque continuò emendicare ostiatim cœpit ; frementibus videlicet cognatis , eamque rem (ut ferè depravata sunt Christianorum quoque judicia , & pauci ex animo crucem amplexantur) summi dedecoris atque ignominie loco , sibi ducentibus . Deinde , quanquam invitis iisdem , institit plebem Christianæ doctrinæ rudimentis imbuere , privatisque colloquiis , eos qui ad se ventitabant , à peccatorum veterne excitare ; festis verò diebus , etiam conciones habere , tantâ hominum frequentia , ut cum eos templa non caperent , in agrum prodire necessario cogerentur , vulgòque arbores , audiendi causâ conscenderent . Et sanè , operæ fructus egregius , Dei beneficio , constitit .

Complures ad virtutem ac Dei cultum à vitæ pravitate conversi, multæ sublatae discordiæ, & odia inveterata restincta; contra aleatores lata publicè lex pœnæque propositæ: institutum præterea, ut preces pro salute, quotidie funderentur, eorum omnium, quibus lethalis noxæ piaculo obstrictis, in singula momenta, exitialis exitus immineret: itemque, ut ex Ecclesiæ Romanæ consuetudine, salutationis Angelicæ signum daretur manè, meridie, & vespere. Jam verò gravia quædam vitia, quæ non in populum modò, sed etiam in Sacerdotes irrepsent, magna ex parte correctæ; denique morbo incurabili affectis, & extremâ pressis inopia; ne, vel oppido errarent, vel strati passim in compitis, cœlum miserabili questu complerent publico sumptu consultum. Atque hæc leges moreque custodiendi, ne (quod ferè fit) bene cœpta propediem obsolescerent, curam & munus Loïoleia familia, placata postmodum Ignatio, sibi desumpsit, qui cùm in eo xenodochio aliquandiu ita versatus esset, ut satis appareret, ipsum exemplo Christi Domini laboribus & paupertate multò magis, quàm otio & rerum affluentia delectari; ad extremum, quotidianis propinquorum precibus exoratus, ne cognationi, aut nihil omninò dedisse, aut

etiam inimicitias palàm denuntiassè videretur, in paternam domum, ex hospitali se transtulit ; ibique aliquot moratus dies, restitutâ domesticâ disciplinâ, cunctis ad officium ac pietatem animatis, valentior multò, quàm Lutetiâ discesserat, ad sociorum expedienda negotia proficisci constituit. Atque hîc, novum ecce tibi certamen, Ignatium inter & cognatos exoritur; cùm ille pauperis habitu prorsùs, & pedes, iter facere destinasset animò; illi contrà, quoniam quidem eum apud se diutiùs retinere non possent, certè non nisi bene comitatum, & pecuniâ instructum abire permetterent. Verùm certaminis denique is fuit exitus, ut Ignatius, ne frustrâ diutiùs tenderet, ad viâ modicum, in speciem, deduci se passus, brevi domum, & famulos, & cætera cuncta remiserit, pedibusque porrò perrexerit; Gallicano equo, Ministris valetudinarij, jam antè relicto, quem illi deinde, in Ignatij memoriam, veluti sacrum & immunem ab opere, vagari in pascuis, ad extremum usque senium permisere. Ignatius igitur Navarrâ primùm, deinde Castellâ peragratâ, mandatisque recensium sociorum exhaustis, de veterum statu ac voluntate cognoscere, nequaquam omisit: verùm, illi partim expectationis ac moræ tadio victi, partim etiam aspero

virtutis itinere fatigati, in alia ferè omnia, dudum abierant. Joannes tantùm Gallus, ne de animi salute periclitaretur, monasticæ se addixerat vitæ. Callistus, ab animorum cura, ad pecuniæ lucrum studio repente converso, in Indiam navigaverat, unde aliquantò post, benè nummatus ingenti omnium admiratione, qui eum antea norant, Salmanticam rediit. Cazeres cùm Segoviam patriam petiisset, mollioris vitæ commodis, & domesticorum consuetudine delinitus, otio ac voluptati sese dediderat. Artiaga verò, curriculum honoris & ambitionis ingressus, & è Commendatario, factus Episcopus, cùm aliquandiù in eo dignitatis gradu vixisset, ad extremum ægrotus, epôta per imprudentiam, veneni laguncula, (cum duæ starent, altera salubris aquæ, altera sublimati, quod appellatur, medicamenti) miserabili genere lethi, defunctus est,

•••••

Venetias ingenti labore contendit.

C A P. II.

IG N A T I U S ergo , cū in Ita-
liam properaret , & hosce quos
dixi socios , tam longè latèque disper-
sos , in unum redigendi atque ad pristina
revocandi consilia , spes nulla se ostende-
ret ; occulta Dei judicia secum expendens,
fufis pro ipsorum salute , ad superos pre-
cibus , Valentiam venit , ubi videlicet,
navem stare paratam audierat. Ibi, dissua-
dentibus multis , ne se tali tempore, mari
committeret , quòd præter cæteras diffi-
cultates, etiam nobilis archipirata Æno-
barbus, loca opportuna & littorum flexus,
valida obsideret classe; nullis terroribus de-
sententia decessit Ignatius ; & navis, præ-
dones quidem effugit; veruntamen fœdis-
sima tempestate coorta , clavo distracto,
fufisque armamentis , cū jam de salute,
vectores nautæque omnino desperassent,
lacera & quassata fluctibus , Genuensem
portum ægerrimè tenuit. Atque hæc tanta
maris incommoda, non sanè levius terre-


stris itineris discrimen, excepit. Cùm enim solus, ignarusque regionum Ignatius, per Apennini tramites Æmiliam peteret; viam ingressus initio spatiosam, sed in arctum deinde magis magisque coëuntem; studio procedendi, sensim in eas pentravit angustias, unde sese expedire humana ope vix posset. Primò igitur sollicitè vestigium facere, deinde cùm neque progredi, neque jam regredi tutum esset, in exilitate salebrosa & horrenda crepidine, torrente rapido minaciter subterfluente, hæsit aliquantisper stupenti similis, ubi repentè sese tot periculis cinctum animadvertit. Sed ad extremum, fidenter implorato divino auxilio, quod unum reliquum esse videbatur, humi procubuit; & genibus manibusque reptando, quadrupedis instar, ac prominentia modò saxa, modò è saxis enata virgulta prensando, tandem evasit labore, quos ad eam diem pertulisset, omnium maximo. Inde per immensæ altitudinis invias rupes ac solitudines, diù errabundus, cùm ad radices montium denique devenisset, omnia rursùs offendit, partim nivium tabe, partim etiam hybernis imbribus impedita. Cumque nihilominus urgeret progrediendi necessitas, viâ teterri-
mâ, (& est mollis & cretosus ager, ac semitæ per horum temporum incuriam, exi-

quo munimento, nec ullis ut olim, stratae lapidibus) cum profundo ac tenaci limo diu multumque luctatus, ad Bononiæ portas, tandem aliquando pervenit. Atque hic, ne quid deesset ad probandam æquitatem ac patientiam viri, ad cæteras misérias, illud etiam ludibrium accessit; ut in ipso urbis introitu, è ponticulo in fossam, limo cœnoso, margine lubricante, decideret, emerfusque, luto deformatus ac madidus, ab iis qui tum aderant, non sine joco & facetiis (ut sunt procacia in alienis malis hominum ingenia) rideretur. Sed ille nimirum, identidem exerceri se à Patre cœlesti, prudenter intelligens, & in gratiarum actione persistens, sole siccatis utcunque vestibibus, lassitudine ac fame confectus, cum urbis magnam partem, frustra emendicando perambulasset, in collegium Hispanicæ nationis demùm exceptus, ibique dies aliquot clementer est habitus. Inde cum itinere jam facili & certo, Venetias pervenisset, exactâ pecuniâ, quam illi per trapezitas, eadem Elizabetha Rosella benigne curaverat; interea dum socios, è Gallia præstolatur, in varia pietatis opera, ex insulato cœpit incumbere. Nec sanè frustra: siquidem complures omnium ordinum homines, partim Christianæ doctrinæ præceptionibus imbuit, partim ab iis

pura & flagitiosa vita , ad castum Dei timorem studiumque virtutis , eodem Deo adjuvante convertit. Quibusdam etiam primariis viris, tum patritiis indidem, tum externis , prava animi affectione ac vicio laborantibus , non sine copioso fructu, Spiritualium Exercitiorum , expertæ virtutis medicinam, adhibuit. In iis Dida- cum Guiam & Stephanum , germanos fratres, è præcipua nobilitate Cantabriæ, sibi quondam Compluti familiariter notos, ac tum Hierosolymis redeuntes , earumdem commentationum beneficio , tantam ad rerum divinarum intelligentiam, & humanarum contemptum adduxit , ut omnibus divitiis & honoribus abdicatis, CHRISTI consilia omnino sequi decreverint. Atque hos imitatus est postmodum Baccalaureus Hozius , item Hispanus , Theologiæ peritus : qui cum ad easdem commentationes peragendus valdè propensus esset, veruntamen ex quibusdam iniquorum sermonibus haberet suspectam Ignatij doctrinam ac dogmata ; demùm se Ignatio exercendum atque colendum ita commisit , ut multos in cubiculum , quò secessit, secum afferret libros , quibus Ignatij dicta scriptaque , ad Sanctorum Patrum & Conciliorum trutinam , expenderet. Sed ubi, appositas ab Ignatio epulas degusta-

vit; tantum abfuit, ut in iis veneni deprehenderit quidquam, ut etiam ardenti quodam rerum cœlestium amore inflammatus, mortalibus commodis nuntium sponte remiserit, atque ultrò, ad Ignatij voluntatem & vitæ rationes adhæserit. Ex Veneta verò nobilitate, in primis eo secessu ac meditatione profecit, Petrus Contarenius, Zachariæ filius; is, qui multò post, magna cum integritate ac sanctimonie laude, Paphensium Episcopatum administravit. Sed & aliorum ex Ignatij consuetudine, insignis vitæ morumque mutatio est consecuta. Quæ quoniam, nec ab obscuris hominibus & incolis celeberrimæ civitatis fiebant, brevi, ut aliis locis antea, sic tum Venetiis, Ignatij pietas in crimen invidiamque vocari cœpta, non ferente Diabolo, tantam sibi prædam è faucibus eripi: statimque vulgatum ab ejusdem emissariis est, Ignatium pravitatis hæreticæ, semel iterumque convictum in Hispania, elapsum è custodia, in Galliam profugisse; ac proinde ejus effigiem, ab Hispanis Inquisitoribus, ignominie causâ, publicè concrematam: Eundem Parisiis, novas molientem res, insufficientemque perniciosæ doctrinæ labe scholasticos; ubi delatum suum nomen ad sacra tribunalia odoratus fuisset, fuga prævertisse licetorum manus,

130 S. IGNATII VITÆ
& consilia magistratuum. Quas criminationes Ignatius, cum non modò in vulgus, iniquorum operâ sparsas, verùm etiam ad Legatum Apostolicum, Hieronymum Verrallum, qui deinde S. R. E. Cardinalis fuit, delatas inaudisset ; non tam de sua, quàm de Sociorum existimatione sollicitus, ultro ad Legatum adiit, & acriter institit, ut eorum criminum quæstio exerceretur: Quod ita factum, & veritate comperta, honorificè à Legato est absolutus, incumbente in ejus causæ cognitionem, Gaspare Docto, legati affecla ; qui ex eo tempore Ignatium unicè dilexit, ac sacratissimæ domui Lauretanæ deinde præpositus, in Societatem universam, plurima egregiæ voluntatis officia contulit.



Venetias, ad Ignatium, socij veniunt.

C A P. I I I.

UM hæc in Italia gerit Ignatius, interim bello inter Christianos ingruesscente Reges, cum exercitu formidabili, Cæsar per Insubrum & Allobrogum fines, in Galliam irruperat. Ea fuit sociis

Ignatij, causa & profectiois maturandæ, & itineris per Thuringiam, seu Lotharingiam atque Germaniam, sanè incommodo anni tempore faciendi. Igitur pecunia, rebusque omnibus, præter viaticum & scripta, in Christi Domini gratiam distributis; mense Novembri, anno circiter post discessum Ignatij, suo quisque baculo innixi, pedites viam capeſſunt, & quidem tanta cum alacritate ac fervore spiritus, ut ne à Jacobo quidem Laine, viribus nondum è recenti morbo recuperatis, extorqueri potuerit, quò minùs, & pedibus ambularet ut reliqui, & inter ambulandum, in super invalida membra discrucia- ret, hispido in primis & horrenti cilicio. Vestitus erat omnium, ut peregrinorum & pauperum, nequaquam elaboratus & ad modestiam, submissionemque compositus. Pendebat è scapulis mantica ex corio, in qua sacra Biblia & breviarium asservabantur, & scripta, quæ diximus. Rosaria verò, ad catholicam fidem, vel inter ipsos hæreticos profitendam, palàm gestabant è collo suspensa. Hospitium ingressi, primum omnium, nullo adstantium respectu, nixi omnes genibus, Deo gratias agebant; eundem in egressu pariter sibi propitium precabantur. Sobria & frugalis erat mensa; oratio ac meditatio non solum in di-

versoriiis, verùm etiam in ipso itinere plurima, Sacerdotibus, qui tres erant, sacrificantibus, cæteri quotidie, Cælesti reficiebantur Pane. Sermo, nisi de rebus divinis aut necessariis, ferè nullus; in decernendo, si quid in deliberationem incideret, mira concordia: in superandis viarum difficultatibus periculisque, summa constantia & æquitas animi. Autumnales pluvias, totâ ferè Galliâ pertulerunt: occurrere mox Alpes penè obstructæ nivibus. Multa fuisse subinde famis, frigoris, defatigationis incommoda subeunda: nihil se illis objecit tam arduum, aut tam extimescendum, quod eorum quenquam, à concepta religione, officioque deduceret. Atque hac disciplinæ, pacisque custodia, cùm omnibus, per quorum fines transierant, populis, bonus odor in Christo fuissent, cunctis non catholicis modò, sed etiam hæreticis, novum ac religiosum agmen, magna cum approbatione mirantibus, ad tertium Idus Januarias, anni, M.D.XXXVII. Venetias, ingenti omnium gaudio & mutua gratulatione sospites, ad Ignatium pervenerunt. Atque ubi paululùm, è longa contentione, ac lassitudine, quietis est captum, statim Hierosolymitanæ provinciæ consilia renovantur. Primùm omnium, rati, gratiora Superis fore sua studia, si ad ea sum-

LIBER SECUNDUS. 13


mi totius Ecclesiæ Pastoris auctoritas & consensus accederet, simul atque hyems remitteret, tunc vel maximè sæva, Romam ire constituunt, & à Pontifice maximo jus, tum ad sacros ordines, titulo voluntariæ paupertatis; tum, ad mansionem Hierosolymitanam, & prædicationem Evangelij, sine ullo interdicti metu, suppliciter petere. Interea, Venetiis ne cessarent, atque adeò, ut quædam quasi rudimenta futuræ militiæ ponerent; publicis valetudinariis inter se distributis, ægrotos ac pauperes, omni ope adjuvare instituerunt; Confessionis & Eucharistiæ Sacramenta, gratis ministrare, qui per Sacerdotium poterant: cæteri, solari jacentes, afflictos mœrentesque, spe cælestium bonorum erigere, adesse animam agentibus, cunctos denique ad patientiam fidemque adhortari: nec modò spiritualibus officiis fungi certatim, sed ne vilissima quidem ac servilia, corporibus pauperum curandis, defugere ministeria; sternere lectulos; evertere sordes; purgare scaphia; cadavera defunctorum ritè curata, humi condere; interdiù pariter, noctùque omnibus præstò esse, tanta cum alacritate ac diligentia, ut cuncti obstupescerent, vulgatoque rumore, principes etiam viri, ad spectaculum convenirent. Quibus in officiis, cum aliorum omnium, tum Xaverij præ-

cipue charitas ac virtus enituit. Is, cum in quendam incidisset, morbo Gallico misere deformatum ; atque ad ejus aspectum exhorruisset ; ut ea re, infringi ac debilitari sensit charitatem in proximum, ita repente in semetipsum excanduit egregius Christi miles, ut manantem sanient ex ulceribus purulentis, (cujus rei, vel mentionem, aures delicatæ refugiant (obfirmato animo, semel iterumque non dubitarit exsugere: qua re non modò se ipsum in præsentia præclarè vicit, sed etiam in omne tempus, propriam quamdam atque perpetuam in elephantiacos atque ulcerosos, clementiam & misericordiam, est consecutus ; quam deinde, ubicumque terrarum fuit, quotiescumque se dedit occasio, diligenter exercuit. Quidam etiam, è sociorum numero, pauperem leprà, toto corpore, coopertum, cum Præfectus nosocomij non admitteret, in suum lectum accepit ipse; cumque manè surrexisset, cunctis ingemiscantibus, eâdem ipse quoque morbi fœditate correptus, postridiè, non sine miraculo, prorsus illæsus atque intactus apparuit. Hæc & alia ejusmodi, veræ pietatis & officij documenta, cum in ea urbe dedissent, (quorum ibi grata in multos annos deinde memoria viguit) appetente jam vere, uti condixerant, Romam cuncti fere, præ-

ter Ignatium, discessere. Ipse, tum ad parta in Domino retinenda, tum ad expedienda, quæ ad navigationem pertinerent, ibidem interea substitit. Atque illi quidem, eadem ferè disciplinâ, quam suprâ diximus, iisdemque imbrium difficultatibus, iter ingressi, ad superiorem parsimoniam ac frugalitatem, illud etiam addidere, ut neque ullo prorsus viatico, divinæ tantum providentiæ bonitatisque fiduciâ, Romam usque contenderent: & quia, tum Cineralium, seu Quadragesimæ tempus erat, quotidie, quanquam in tantis laboribus, ritu catholico jejunarent. Nec sanè defuit illis & exercendæ spei, & Christi Domini inopiam ac perseverantiam, aliqua saltem ex parte imitandi, materies: acciditque aliquando, ut cum panis duntaxat frustulum, singuli manè sumpsisset, imbre densissimo, stagnantibus latè campis, ut alicubi pectore tenus, aqua pertingeret, nullo præterea cibo, millia passuum ferme triginta, nudis pedibus, uno die peregerint, & quidem incredibili non modò tranquillitate animi, sed etiam hilaritate psallentes. Diversioriis verò, cum propter inopiam excluderentur, & ad publica xenodochia, de more confugerent, quamvis oppidò lassī, tamen iis, quæ supra diximus, charitatis muneribus fungebantur: seque ipsi

domare ac vincere , magis magisque nitentur in dies. Sane, Ravennæ , quidam ex iis , cum hospitalis lectuli sordes , ac manantia tabe stragula , nauseabundus vitasset , quæ prima deinde occasio data est, fuimet puniendi, non prætermisit. In pago, nescio quo, pauper phthiriasi consumptus, è vitâ migraverat ; cum in eum pagum Nostri venissent, distributisque cubilibus, nullum jam superesset, nisi quod phthiriacum foverat ; Pater ille , amissam nuper palmam, recuperare vehementer exoptans, nudus illicò, per summum animi ardorem, easdem subiit lodes, ibique sese identidem versans , cum ingentes animalium greges, ea tota pavisset nocte; ad sudorem usque defatigatus, non leves ab se, prioris fastidij ac deliciarum pœnas exegit. Denique sanctam Urbem ingressi, ut sacra Apostolorum limina & præcipuæ religionis templa castè obierunt , à Petro Ortizio Hispano , Cæsaris procuratore, ad Pontificem maximum introducuntur. Is erat, eo tempore, Paulus III. è gente Farnesia, cujus nomini , plurimùm utique nostra Societas debet. Consueverat autem , super mensam, non fabulatores aut mimos inducere, sed præstantes philosophos atque Theologos ; & ipsemet, veritatis indagandæ atque illustrandæ causâ, ponere, de quo
inter

inter se disputarent ; ea erat gravissimi Senis & prudentissimi Principis oblectatio. Ad has ergo disputationes , post pedum oscula, Patres adhibiti, cum egregium, quæ Christianæ humilitatis atque modestiæ, quæ eruditionis & ingenij specimen præbuisent ; non modò, quæ volebant de Sacerdotio , deque Hierosolymitana provincia , libente atque approbante Pontifice, impetrarunt ; sed insuper , pecuniâ ab eodem instructi , & fausta cum prece dimissi sunt. Ad quam deinde pecuniam, cum è nationis maximè Hispanicæ collatione accessisset, quod aurorum amplius ducentorum summam expleret ; Socij , ne quid ex eo viatico , præterquam in usum votivæ navigationis attingerent, apud men- sarios pecunia omni deposita , & Romæ victum emendicantes , admirabile dedere spectaculum iis , qui coram Pontifice differentes illos audierant : Et deinde, quemadmodum venerant, sic Venetias, prorsus egentes ac vacui, reverterunt.



*Sacris initatur Ignatius : & de rebus
ab eodem & Sociis , in Veneta
ditione gestis.*

C A P. I V.

P O S T hæc , diligenti adhibita præparatione, cum ad ejusdem Legati Veralli pedes , perpetuæ paupertatis & castimonie nuncupassent vota, divini amoris igne succensi, mirante ac majorem in modum approbante populo, sese denuò , ad pristinos illos labores & assidua pauperum ministeria retulerunt. Deinde, in exitu mensis Junij, Divi Joannis Baptistæ die natali, Ignatius & reliqui laici, per omnes ordinum gradus , ad apicem Sacerdotij , à Vincentio Negosantio Fanensi, Arbensium Episcopo, evecti sunt, tantà non modo ipsorum, sed etiam ipsius Episcopi lætitiâ , & animi voluptate , ut sese inter ejusmodi cæmonias , nihil unquam simile sensisse affirmaret. Interea Patribus, neque in eam diem ulla fuerat in Palæstinam transmittendi facultas ; & eo ipso tempore, cum grave bellum, ex fœdere Christianorum Principum , Venetos

inter & Solymanum Turcam exarsisset, sublato repente commercio, omnis non modò peregrinorum, sed etiam institutorum navigatio conquievit; ut satis appareat, cæleste Numen iratum gentibus iis, quæ creditum sibi regnum Dei, per summum olim scelus negligentiamque amisere; Apostolicum hunc, devotumque sibi manipulum, in alias longè nationes atque provincias justo jam antè judicio destinasse. Itaque propter eam quam dixi causam, spe trajiciendi sublatâ, quamquam voti religione soluti videri propemodùm poterant, tamen ne quis omnino scrupulus animis insiderat, finem anni vertentis, uti Parisiis, antè decreverant, prorsùs expectare, seque interim, tum ad Sacerdotij primitias Divinæ Majestati libandas, omni diligentia comparare; tum etiam, post multam precationem & abstinentioniam, proximis operam ex instituto navare constituunt. Id, quò liberiùs atque commodiùs facerent, è tantæ urbis celebritate ac frequentia, in finitima ejusdem ditionis oppida, aliò atque aliò recepêre sese; ut si fortè (quod tamen in præsentia vix fieri poterat) bello sedato, præter opinionem, transitus paruiisset; è propinquo, Venetias cuncti simul accurrerent. Franciscus ergo Xaverius, & Salmeron, ad montem Cel-


sum (id vico nomen , ab urbe Patavio ,
millibus passuum ferè quindecim (secesse-
re ; Joannes Codurius , & Hozius, Tarvi-
sium ; Claudius Jaius , & Simon Roderi-
gius , Bassanum , oppidum agri Patavini ;
Paschasius & Bobadilla, Veronam ; Igna-
tius verò, Faber, & Laines , cùm Vicetiam
petiissent, hanc vitæ rationem iniere. Erat
extra urbem domuncula ruinosa & deser-
ta , nullis foribus aut fenestrarum obici-
bus , vento cuilibet pervia : Id sibi diver-
sorium, ne cui molestiam exhiberent , at-
que , ut ab urbano strepitu remoti , libe-
riùs uni Deo vacarent , memores insuper
stabuli , quod Regem ipsum Angelorum,
nostrâ causâ nascentem olim exceperat,
unanimes delegerunt , quotidianis mune-
ribus , ita inter se distributis ; ut unus ad
custodiam diversorij , & paucula victus
ministeria remaneret , (qui fermè erat
Ignatius , quod propter nimiam lacryma-
rum copiam, graviter ex oculis laboraret)
reliqui duo, urbem ingressi , cibum in sin-
gulos dies emendicarent ; quod, ab ea fun-
ctione, superesset otij , totum id, omnes
cœlestium rerum contemplationi tribue-
rent. In hoc vitæ genere cùm quadragin-
ta jam dies, non minori cœlestium dono-
rum copia, & animorum voluptate, quàm
corporum vexatione, & carnis incommo-

modo perstitissent ; quanto nimirum spatio temporis , Christum ipsum Dominum ac Magistrum, antequam turbæ sese committeret, abstinuisse cibo , & in eremo cum bestiis latitasse meminerant ; ad eos revivendos, Tarvisio repentè Codurius adfuit, cujus accessu læti, cùm spiritus vehementiam , ex ea solitudine, assiduitate precandi , jejuniisque conceptam, diutiùs cohibere non possent ; ad CHRISTI gloriam, ex umbra in arenam prodire , & quæ divinitùs acceperant bona , cùm proximis communicare constituunt. Nec mora: Vicetiam ingressi , descriptis inter se celeberrimis oppidi partibus , eâdem omnes horâ, de rebus divinis ad populum dicere incipiunt, nullo prorsùs, aut loci apparatu; aut pompâ verborum. In triviis plateisve, prout cuique locus obtigerat , desumpto ex aliqua fortè officina scamno pro suggestu utebantur ; populum clara voce , & in gyrum actò supra verticem pileo , ad concionem invitabant ; sermo, ut peregrinorum & hospitem , ex variis linguis ferè mistus , ac minimè proprius : Verumtamen, is erat orationis impetus, adeò graves ac veræ sententiæ, tanta in omni gestu atque habitu pietas , denique is ardor in oculis emicabat , ut peritissimus quisque rerum æstimator , hos demùm esse Chri-

stianos concionatores, germanosque præcones Evangelij dictitaret : multi etiam, qui rei novitate illecti, cum cæteris, initio per jocum lasciviamque ludibundi confluerant, prudentissimis eorum præceptis, & dicendi gravitate permoti, depositâ paulatim petulantia, longè alij atque accesserant, dimissâ concione recederent. Quòd si quis deinde, seorsum ad Patres adiret, veritatis & officij studiosior; hunc verò humanissimè acceptum, pro ipsius ingenio, privatis institutionibus, ad omnem virtutem ac religionem informabant. Illud verò præcipuè rem adjuvabat, quòd neque inanes plausus, ut diximus, fucata oratione captarent; neque inter ipsam concionem, aut ubi peroratum esset, quanquam in summa rerum omnium inopia, quidquam à circumfusa multitudi-
ne vel peterent ipsi, vel etiam ultro delatum acciperent : brevi-
que constare cœpit, paupere tecto ciboque contentos, ab omni avaritia & vanitate abhorrentes non aures populi scalpere, sed vulneribus omni ratione mederi; nec suum potiùs, quàm Dei proximorumque negotium agere. Atque haud sanè dissimilis fuit cæterorum Patrum, in sua cujusque provincia, probitas & industria; ut etiam aliqui, ex magnis laboribus & incommodis, extremum

adierint vitæ discrimen. Neque ita multò
 pòst, cùm evocati ab Ignatio, ut de rebus
 communibus agerent, cuncti Vicetiam
 convenissent, tanta animorum inclinatio
 ac benevolentia populi Vicetini erga pe-
 regrinos apparuit, ut qua nuper in urbe,
 tribus duntaxat, cibarij panis, ac fere mu-
 cidi, quotidiana vix circuitione colligeba-
 tur, quod satis esset ad vitam ægerimè
 tolerandam; in eadem, ipsis jam undecim,
 ex voluntariis civium eleemosynis, omnia
 ad victum cultumque necessaria largè ac
 benignè suppeterent. Ibidem igitur, pri-
 mas Divinæ Majestati hostias immolave-
 re novi Sacerdotes, uno Ignatio excepto,
 quippe qui, ad se comparandum, ampliùs
 adhuc temporis sibi sumpserat, & Romæ
 postea sacrificandi fecit initium, ad ipsum
 Præsepe, & incunabula Christi Domini,
 quæ in æde sacratissima Beatae Mariæ ad
 Nives, religione coluntur.





*Ignatio Romam appropinquanti, Christus apparet : & unde Societati
JESU nomen inditum fuerit.*

C A P. V.


ET quoniam expeditioni transma-
rinæ præfinitum anni spatium erat
in exitu , & infestum adhuc classi-
bus mare ; quid proinde agendum esset,
Patres inter se deliberant: nec dubium fuit,
quin, ut Luretiæ voverant , cuncti sese ad
fidei Catholicæ propagationem , & ani-
marum auxilium , Sedis Apostolicæ cul-
tui , & Romani Pontificis obsequio man-
ciparent. Cujus officij procuratio (quo-
nam satis id esse videbatur) Ignatio &
duobus primariis patribus, Fabro & Laini
mandata est, Romam adirent, & (quod be-
ne verteret) CHRISTI Vicario, hæc socio-
rum studia ac vota , quàm primùm expo-
nerent. Interea reliqui , ne conceptus è
diuturna meditatione & sacrificiis fervor
ac spiritus evanescerent , non modò se ipsi
diligentissimè custodire , sed etiam præsi-
dij divini fiduciâ , proximis omni ratio-
ne opitulari decernunt : Ac præcipuis ur-

hibus inter se descriptis, præsertim in quibus litterarum studia florere, & frequentissimam juventutem versari cognoverant, Codurius, Hoziusque, Patavium; Roderigius & Jaius, Ferrariam; Xaverius & Bobadilla, Bononiam; Paschasius & Salmeron, Senas profecti; eadem fermè ratione, quam paulo antè Vicetiæ adhibitam diximus, privatim, & publicè cum hominibus agere, eosque è lethali flagitiorum veterno excitare, atque ad contemptum rerum mortalium, & cogitationem futuri sæculi, omni conatu atque artificio impellere, atque adhortari cœperunt. Cumque ipsa novitate rei, omnium in se oculos atque ora vertissent, paucis mensibus, Deo aspirante, non modò id effecere, quòd maximè optabant, ut magni animorum motus, & insignes ad Christum conversiones existerent; sed etiam, quod minimè laborabant, ut ipsorum nomen ac fama, Italiam ferè totam, ingenti cum admurmuratione pervaderet. At Ignatius, Romam, duobus quos dixi comitibus, rectâ contendens, & ab eorum altero, quotidie corpus CHRISTI religiosè castèque suscipiens; MARIA virgine potissimum præside, atque adjutrice, sese ad sacrum suo tempore faciendum, ac multa pro Christi nomine secunda, dies

noctesque, simul intentâ quadam animi curâ, simul inæstimabili spiritus dulcedine, & novâ divini luminis copiâ præparabat. Etenim, ex quo primùm Hierosolymis rediens, ad litterarum studia, in Christi gratiam, animum adjecerat, de rerum cœlestium contemplatione, ut diximus, non sine magna difficultate, remiserat multum, seque ipse Domini charitate, spirituali consolationi, deliciisque sponte subduxerat. Sed studiorum exacto curriculo, deinceps & Venetiis, & in Vicetino secessu, & in hoc, de quo dicebamus itinere, tam crebra divinitus lumina, tam liquidas animi voluptates, eadem scilicet Virgine favente, percepit; ut in antiquum statum illum Minorellanum (quem postea ob singularem & eximiam illius temporis, in se Dei benignitatem, religioso joco, primitivam suam Ecclesiam, appellare consueverat) non solum ex integro, sed etiam cum fœnore sibi restitutus esse videretur. Sed præter cætera, quæ, quòd mortalem naturam exsuperant, verbis exsequi difficillimum est; quo die, Romam accessit, res ei contigit, vel ad memoriam posteritatis, insignis; vel ad confirmandum in proposito Ignatium cæterosque, haud mediocriter efficax. Etenim, orandi causâ, non longè ab Urbe templum in-

gresso , qualia passim imposita militari
 viæ cernuntur, statimque, ut sæpe solebat,
 abstracto è sensibus , atque alta quadam
 animi contemplatione defixo , clarissima
 in luce , per speciem , illi , sese Deus Pater
 ostendit , Jesu filio bajulanti crucem , &
 crudelissimis affecto suppliciis , præsentem
 Ignatium Sociosque commendans ; quos
 ille, cùm in fidem , ac patrocinium liben-
 tissimè recepisset , ad Ignatium placido &
 sereno vultu conversus, hæc ipsa effari ver-
 ba dignatus est : EGO VOBIS ROMÆ,
 PROPITIUS ERO. Quo tanto, tam-
 que divino solatio , mirum in modum ere-
 ctus & confirmatus Ignatius , ac Socios
 deinde compellans : Quid nobis , ait, Ro-
 mæ futurum sit, fratres ; in crucemne , an
 in rotam , agi nos velit Deus, ignoro:
 unum scio , quidquid eveniat , Jesum
 Christum nobis propitium fore ; ac simul,
 totius visionis ordinem exposuit. Quæ res
 non in præsentia tantùm , illos insolitâ
 quâdam lætitiâ, & voluptate perfudit ; sed
 etiam in posterum , contra omnes diffi-
 cultates atque pericula , magnopere cor-
 roboravit ac muniit : Atque id ipsum vel
 in primis fuit causæ , cur Ignatius , con-
 firmatæ post modum Societati , salutare
 potissimum Jesu Nomen, indiderit : quam
 tamen deinde , verbo scriptoque, mini-

nam vocare solitus est, quòd reliquis religiosorum familiis (quas item Societates Iesu, licet optimo jure appellare) cunctis omninò, tum de splendore, tum de antiquitate concederet,



Ignatius Romæ, Christianæ rei dat operam: In Cassinati monte, animum Hozij, cælum intrantem videt.

C A P. V I.

IGITUR tam secundâ Numinis voluntate, tamque liberali promisso, mirum in modum læti, sic tamen, ut non sine mysterio, Christum Dominum, crucifixi maximè habitu, apparuisse apud se reputarent, cum gratiarum actione ac prece, sanctam Urbem ingressi, nihil antiquius habuere, quàm ut viatici nomine sibi numeratam anno priore pecuniam, quoniam quidem navigationis consilia in irritum cecidissent, prorsùs ad nummum, iisdem à quibus acceperant, redderent; quæ utpore sacra, in alios pietatis usus & opera expendere tur. Deinde, quemadmodum antè convenerat, suam & reliquorum operam, Pontifici maximo, in Apostolicis.


præcipuè functionibus, citra honoris titulos & dignitatis insignia, detulere. Neque aspernatus est pia Patrum studia, Christi Vicarius: atque in præsentia, donec ejusmodi aliqua sese offerret occasio, jussi Faber & Laines, in almo Sapientiæ Gymnasio, sacras literas profiteri: Quo munere, dum alter in bibliis explicandis, alter in scholastica Theologia, ut appellant, paricum eruditionis ac pietatis laude, perfunguntur, atque etiam sæpe coram ipso Pontifice, de gravibus rerum divinarum quaestionibus, disputant; interim Ignatius proximorum salutem, de more operam navabat, cum aliis artibus, tum verò Spiritualibus præsertim Exercitationibus; quippe, ad curandas perturbationes admodum efficaci, virtutisque jam pridem expertæ, remedio; quibus ille per eos dies, præter cæteram turbam, insignes aliquot viros diligenter excoluit. In iis, Gasparem Contarenum Cardinalem, gravissimum Senatorem, eundemque temporibus illis (quod ejus varia monimenta præclare testantur) ingenij & doctrinæ facilè principem. Is, Ignatij prudentia & consuetudine usque adeo captus est, tantumque ejus præceptis consiliisque profecit, ut qualem dudum optaverat, animi regendi moderandique magistrum, denique sese Dei beneficio nactum esse.

affirmaret. Idemque, tradita sibi Exercitia (quod exemplum, apud hæredes hodieque asservari perhibent) sua ipse manu perquam accuratè descripsit. Hunc imitatus Cæsaris procurator, (de quo suprà dictum est) Petrus Ortizius, Theologiæ doctor insignis, easdem exercitationes ad Christi Domini gloriam & suam salutem omninò experiri constituit. Id, quò liberius simul & fructuosius faceret, procuratione interim vicariis delegata, cum paucis quotidianæ vitæ administris, & Ignatio præceptore, in montem Cassinatem secessit, quo in monte, antiquissimum & nobilissimum cernitur sancti Benedicti cœnobium. Ibi, remotis arbitris, maximâ diligentia, dies ipsos quadraginta, piæ meditationi ex Ignatii præscripto vacavit; idque, tanto cum animi fructu, tantrâque accessione virtutis, ut quanquam Christianam Philosophiam multò antè professus, tamen se tum demùm verè Philosophari cœpisse, fateretur; ac parùm abfuit, quin grandis jam natus vir, & Imperatoris Legatus, illico mortalibus rebus abjectis, magno animo sese, ad laboriosum Ignatii vitæ genus, adjungeret; sed cum id, neque per ætatem liceret, neque per suscepta negotia: certè quod proximum fuit, egregiè præstitit, ut & sanctimoniam, ac

pietatis exemplo , in posterum sui ordinis hominibus præluceret , & Societatem deinde nostram , quibuscumque posset rebus , perquam studiosè ornaret atque defenderet. Non omittenda videtur , hoc loco res memorabilis, quæ Ignatio, in illa Cassinati commoratione divinitus accidit. Dum enim pro salute Baccalaurei Hozij, quem graviter ægrotare cognorat, Domino supplicat;repentè vidit in spiritu (quod ipsum ibidem D.Benedictò, fertur olim in obitu Germani Episcopi contigisse) animam Socij, luce clarissima radiantem , deducantibus Angelis in sublimè ferri , atque ipsa demùm cœli beatissima regna conscendere ; eidemque Ignatio, paulò post , dum ad rem divinam accedit, in ipso Missæ introitu , Sanctis omnibus ritè appellandis , lucidissimum Cœlestium agmen subitò apparuit, sic, ut in iis , Hozium eximio fulgore micantem , sine ulla dubitatione dignosceret. Qua ex utraque visione , tanto est gaudio delibutus , ut multos dies præ dulcedine, lacrymis temperare nequiverit. Huic Hozio, Patavium (ut diximus) provincia, nuper obtigerat, ubi dum in officio , singulari cum industria & fide versatur , ex ipsa rei novitate suspectus , & conjectus in carcerem , ab Antistite Patavino , moxque ab eodem

dimissus perhonorificè fuerat. Cumque acriùs denuò, in proximorum salutem incubuisset, è magnis diurnis nocturnisque laboribus, lethali morbo correptus, ex hac vita migraverat, cùm aliis miræ cujusdam sanctimonix relictis indiciis, tum verò, quòd, qui ante obitum subniger fuisset, ac vultu deformior, in ejusdem demortui facie, tantus repentè nitor ac venustas apparuit, ut eo spectaculo Codurius, consors provincix, animum exsaturare & præ lætitia fletum cohibere non posset. Hujus igitur tam felici exitu, majorem in modum gavisus Ignatius, è Cassinate Romam, unà cum Ortizio, peracta commentatione, regrediens, obvium habuit in itinere Franciscum Stradam Hispanum, præclaræ indolis juvenem, sibi antea non ignotum: qui cùm è cujusdam principis viri familia, pertractatus aulicæ vitæ, militandi causa Neapolim peteret, uno Ignatij congressu atque sermone (quæ hominis erat in dicendo vis) à sæculi stipendiis, ad Christi vexilla, facili negotio traduci se passus est: ac variis deinde locis, ejusdem Ignatij missu, & Societati nostræ & rei Christianæ universæ concionator egregius, haud mediocriter profuit. Hoc igitur auctus commilitone, Romam Ignatius revertit: ad quem deinceps aliquot etiam alij, rebus gerendis ido-

LIBER SECUNDUS. 153
nei, divino impulsu, paucis diebus adjan-
cti sunt.




*Romam, Patres universi conveniunt:
veterum plebis erudienda morem,
& frequentem usum Confessionis &
Eucharistia restitunt.*

C A P. V I I.

QUÆ, dum ardens Christi amore
diligenter agit Ignatius, interim
Patres cæteri, suâ quisque pro-
vincia bene gestâ, Romam, (uti decreve-
rant) circa mediam Quadragesimam con-
venere. Is fuit annus, post Christum na-
tum, M. D. XXXVIIII. Tecto recepti
sunt à Quirino Garzonio cive Romano, ad
villam, Minimorum fratrum cœnobio pro-
ximam. Ibi, in summa omnes egestate pre-
cariò victitantes, communi consilio ad rem
Christianam pro viribus adjuvandum ag-
gressi, permissuque Antistitum, varia Urbis
templa sortiti, concionibus primùm civi-
tatem ad omne officium, atque virtutem
vehementer accendere; deinde etiam ve-
teri Ecclesiæ instituto, plebem puerosque,
Christiana catechesi (quæ jamdiu obsole-

verat) vicatim erudire instituerunt. Ac licet piis eorum studiis, Dæmon omni conatu se opponeret; tamen partim exemplo vitæ, partim assiduitate dicendi hortandique, cum alia multa propediem assecuti sunt, tum verò præcipuè, ut faciæ Confessionis & Eucharistiæ frequens usus, (quo nihil est humano generi salutarius) Diaboli fraude jampridem extinctus, magno utique Christianæ Reipub. commodo, in principe, magistraque orbis terrarum Ecclesia revivisceret. Ex quo deindè paulatim effectum est, iisdem scilicet adiutoribus, non solum ut in Italia, Gallia, Hispania, cæterisque Catholicis Europæ regionibus, verum etiam, ut in ipsa India, atque adeò in ultimis terris, ubi paulò antè ferales Dæmonum dapes, & nefaria sacra viguerant; jam nunc, ingenti bonorum gaudio, per pœnitentiæ Sacramentum frequenter elutis animi sordibus, divina passim convivia celebrentur.





Falsis criminibus circumvenitur Ignatius, & absolvitur.

C A P. VIII.

QUÆ nimirum Satanas futura præ-
sagens, ipsis rerum initiis per
se suosque satellites obviam ire
non destitit. Augustinus quidam erat
ex Eremitana familia concionator, prorsus indignus eo nomine atque ordine. Is, Lutheri impij sectator occultus, per ambages identidem pernicioſa dogmata spargebat è pulpito: ac miris artibus auditores à recta in Deum fide atque à Romani Pontificis auctoritate sensim abducere conabatur. Id autem eò fidentiùs, quòd per eos fortè dies Pontifex aberat, maximis de rebus, quæ ad salutem Ecclesiæ pertinebant, in fines Galliæ Narbonensis, Nicæam usque profectus. Hanc rem odorati è Patribus quidam; ne ad perniciem animorum latiùs manaret, communi consilio totam ipsi cognoscere atque investigare non dubitant. Ad eum concionatorem audiendum, cum cætera multitudine semel iterumque conveniunt; quæ ratio disputandi sit, qui scopus totius ora-

tionis diligenter attendunt : Neque verò peritos dogmatum , quæ per id tempus in controversiam vocabantur , diabolici ministri fefellit astus, ac latens lupi, sub ovis pelle, rapacitas. Itaque satis jam comperta atque explorata re , primùm ex Evangelij præceptis privatim ad hominem adeunt; quid ad se delatum , quid auribus ipsimet suis deinde perceperint, iis potissimùm verbis exponunt , quibus non de populi modò salute sese , verùm etiam de ipsius, qui populum pestifera contagione inficeret, pro Christiana charitate sollicitos esse demonstrent : rogant , hortantur , denuntiant , prava dogmata corrigat , ambiguè dicta, quæque ad contemptum Sedis Apostolicæ & Ecclesiasticarum traditionum ac rituum facilè trahi possint, ad conciliorum decreta normamque sinceræ fidei quamprimùm interpretetur : utique à depravanda Romana civitate, atque à perturbando ipso veritatis fonte, in posterum abstineat. Ille (qui fastus hæreticorum est) homines nimirum idiotas ex habitu ratus, eorum dicta primò elevare & eludere ; deinde ubi se variis urgeri ac premi argumentis & rationibus vidit , versante animum simul irâ metuque, pauca præfatus quæ ad occultandam in præsentia improbitatem valerent, cum inanibus promissis , Dei fa-

mulos ab se dimisit. Deinde ut se è timore collegit, diabolicis actus furiis, & amicorum opibus fretus, quos ille sibi multos potentesque paraverat, ad institutam agendi consuetudinem pari scelere atque impudentia rediit. Quod ubi sensere Patres, in re tam atroci tamque periculosa, nequaquam lenibus rati opus esse remediis, consilium cepere dignum hominibus divinæ gloriæ studiosis, dignum sacrae Theologiæ doctores; ut improbi concionatoris mendacia, palàm & ex superiore loco, suis ipsi concionibus refutarent. Id ergo cum facere instituissent, bonis majorem in modum approbantibus, cognita re, Lutheranus vehementer excaudit; vocatisque ad se confestim amicis, rabiem doloremque suum impertiit; etiam atque etiam obtestans, ne tantam ac tam insignem injuriam, inultam esse paterentur. Illi, & eadem laborantes opinionum insaniâ, & magistri ignominiâ valde commoti, facta conspiratione, Ignatium & socios omni dolo per fas ac nefas evertere, nec modo famâ, sed etiam si res procedat, vitâ spoliare constituunt. Primum igitur tota Urbe, fictis criminibus dissipant, Ignatium sociosque omni scelerum genere coopertos, tum in Hispania, tum in Gallia; quin etiam nuper Venetiis,

falsæ religionis & probri flagitiique damnatos , & elapsos è iudicum manibus , ad corrumpendam juventutem specie pietatis Romam se contulisse ; ibi, quod bonis artibus nequeant, id, alios criminando accusandoque , per summam injuriam quærere , ut sibi apud imperitum vulgus , famam sanctitatis eruditionisque conciliant. Cùm, aures nacti secundas , hæc & alia id genus quàm appositissimè ad veritatis imaginem , & per se ipsi, & per emissarios oppido sererent ; tantam in invidiam & odium brevi servos Dei adduxerunt, ut eos multi jam , quasi facinorosos ac fugitivos horrerent; ipsorumque congressum & consuetudinem vulgò refugerent. Cùmque jam res è sententia flueret , læti successu adversarij , præterea promissis ingentibus onerant subornantque , qui iisdem ferè nominibus , quæ sparsa in vulgus fuerant , apud Urbis Præfectam insontes accusent. Has verò partes , inexpiabili scelere sibi desumpsit Michaël Hispanus quidam , qui jam ante Parisiis in Ignatium debacchatus , ac deinde singularibus ab eodem Ignatio , lucrandi fratris mirabiliter cupido , provocatus officiis , egregiam viri beneficentiam (ut ferè fit) minimè vulgari perfidia atque impietate rependit ; atque ut Ignatium & socios fa-

miliariter noverat, confectis quam maxime ad similitudinem veri criminibus, apud Præfectum, sanè magnam in suspicionem cunctos adduxit. Omnino res erat insigni infamia; nec modò in urbe vulgi sermonibus terebatur, sed apud exteras quoque nationes atque provincias, adversariorum nuntiis ac litteris percrebuerat, Ignatianos cum suo capite, denique manifestorum scelerum hæresisque convictos teneri: videlicet, ut quas noxij variis locis effugissent pœnas, eas justo Dei iudicio, Romæ in celeberrimo totius orbis terræ theatro persolverent. Interea Ignatius, totius machinationis nequaquam ignarus, fretusque tum præclaro conscientiae testimonio, tum etiam Christi promissis, qui se illi Romæ propitium sponponderat fore, omnes inimicorum imperus, totamque belli procellam invicto animo sustinebat, Deumque unà cum sociis, pro adversariorum salute precabatur assidue. Jamque causæ dicendæ tempus appropinquarebat; cum incidit in ejus manus epistola, quam antea Michaël, recentibus quibusdam Ignatij meritis delinitus, (quippe vel ferrea pectora, interdum patientiâ & charitate flectuntur) ad amicum nescio quem, summa cum Ignatij & sociotum laude perscripserat. Ea videlicet epistola,

delatoris causam ingulavit, namque ubi
 judicij advenit dies; citato ad tribunal
 Ignatio, multa in ejus vitam ac mores
 improbè mentitus est Michaël. Ad quæ,
 dum Ignatius admodum sedatè respondis-
 set, prolatâ ad extremum epistolâ ac re-
 citatâ, institit ab adversario quærere, nun-
 quid earum rerum meminisset? num chi-
 rographum agnosceret? Tum ille reino-
 pinata perculsus, victusque conscientiâ, re-
 pente pallefcere, titubare, frigido sudore
 perfluere. Quod ubi animadvertit Præ-
 fectus (is erat Benedictus Conversinus, vir
 prudens, & in causis cognoscendis, appri-
 mē versatus) confestim suspicatus coitio-
 nem ac dolum, datâ operâ Michaëlem di-
 ligenter interrogat; cumque non obscuris
 vestigiis, ad ipsa fraudis cubilia perve-
 nisset, severum calumniæ vindicem sese
 præbuit: ac multis verbis increpitum ca-
 lumniatorem (quamquam Ignatio pro
 ipsius periculo deprecante) insuper multa-
 vit exilio. Post hæc Ignatius flagitare &
 urgere, uti conspiracyonis nefariæ princi-
 pes, quæ privatim in circulis, cœtibusque
 jactarant, eadem coram Præfecto palam
 ac legitimè exponerent, ut sibi diluendi
 crimina, & se sociosque purgandi copiam
 fieret. Misso igitur viatore, vadimonium
 obire coguntur. At illi, veteratores & cal-
 lidi,

lidi, & cùm in foro, judiciisque, diu multumque versati, tum etiam recenti Michaélis malo facti cautiores, ubi ad tribunal adfuère, per summam dissimulationem, se de Ignatio ac Sociis & sentire quàm optimè, & ad eam diem sensisse respondent: neque ullum esse crimen, quod ipsi quidem in eorum vitam moresque conjiciant. Atque hæc & alia ejusmodi coram Judice: rati nimirum fore ut Ignatius præclarè secum actum existimans, quod imminens calumniæ periculum evasisset; tam illustri præsertim accepta satisfactione, proinde quiesceret. At ille multa ac magna, quæ ad juvandam Ecclesiam pertinerent, mente ac cogitatione complexus; veritusque ne si quid suspicionis incommodæ, aut si qua dedecoris nota, nascenti Societati adhæresceret, vel omnes in posterum ipsius conatus irritos redderet, vellentè magnum rebus gerendis impedimentum afferret; à Præfecto etiam atque etiam postulare, ne fictæ adversariorum palinodiæ fidem haberent: eos quippe alia, tum sermonibus, tum per epistolas longè latèque vulgasse, ac quæ tunc ad tempus accommodata, judicij metu perterriti, dixerint; quæ, nisi à magistratibus ritè cognita & quæsitæ publicè coarguantur malo videlicet publico, pel summum nefas

hæsuram in Societate magnam infamiam;
proinde, jure se postulare, ut in sua dicta,
vitamque omnem diligenter inquirat; se
suosque ad causam usque cognitam, in
vinculis habeat, ac prout re ipsa compe-
rerit, ita pronuntiet. Hæc igitur, & alia
id genus, Ignatius. Contra adversarij, ve-
riti ne si quæstio perageretur, ingenti suo
periculo ac damno paterent ipsorum artes
atque mendacia, per se suosque omni ope
contendere ac niti, ut Præfectus ab institu-
ta cognitione desisteret. Jamque, utpote
qui plurimum opibus & gratia poterant,
in suam sententiam non modò Præfectum,
sed Legatum etiam, qui Urbi pro Pontifice,
summo cum imperio præerat, Cardina-
lem Neapolitanum adduxerunt: Quin
etiam ex ipsismet Ignatij sociis non de-
erant, qui adversariis jam à suscepta actio-
ne deterritis, & sponte cedentibus, non ul-
trà instandum, vitandas lites, paci & quieti
consulendum esse censerent. At verò Igna-
tius in posterum longè prospiciens, eoque
judicio, non tam suam, quam Christi Do-
mini causam agi, prudenter animadver-
tens; nullis neque minis, neque promissis,
nec suasionibus, de sententia deduci se
passus est: cumque omni ad eam rem cona-
tu non semel adhibito, propter adversa-
riorum gratiam atque potentiam, nihil


planè proficeret ; non dubitavit, consulto per sacrificia precesque Deo , ad ipsiusmet Pontificis maximi fidem opemque confugere, qui Nicæâ, per eos dies, adultâ jam ætate , redierat , & in Tusculano secessu valetudinis causa morabatur. Facili ergo ad Principem aditu, quo die venit, admis-
sus Ignâtius, Latino sermone (quippe qui nondum satis Italicè nosset) eidem ex fide retulit, quo consilio à militari vita, se-
se ad animorum auxilium, atque ad literarum studia transtulisset: ac dum rem Christianam pro virili parte administrat , quoties , quot locis , quibusve nominibus accusatus, & absolutus fuisset. Nuper etiam ab Hierosolymitana peregrinatione, bello prohibitum (quod Pontifex ipse non ignoraret) se, ceterosque ejusdem instituti laborisque socios, qui se vitamque suam ad Christianæ religionis amplificationem, Sedi Apostolicæ mancipassent, cum maxime, in urbe Roma , populum docere instunt , paratique in omnem quamvis arduam atque longinquam expeditionem, ejusdem Pontificis reditum nutumque avidè præstolantur ; circumventos repentè iniquorum insidiis , & summam in invidiam non modò in urbe, sed etiam apud remotas nationes adductos , ne id quidem à magistratibus obtinere possent, ut jacta in

suos mores vitamque crimina, in cognitionem vocentur. Sibi quidem propriæ utilitatis & nominis rationem (quamvis ea per se negligenda non sit) minùs antiquam esse: sed quoniam, eodem iudiciò & ipsorum existimatio, & animarum salus agatur, (omnium enim, qui ad rem publicam accedant, rationes, non veritate solùm, sed etiam famâ niti) petere se, & orare, ne gravetur pro sua sapientia ac potestate perficere, ut Præfectus Urbis, inchoatam quæstionem, primo quoque tempore peragat, ne in Urbe totius æquitatis parente, contra paucorum factionem opesque, nullum inopiæ ac solitudini præsidium fuisse videatur. Sub hæc audita, Pontifex bono esse animo jubet Ignatium; & collaudatâ (quod antea fecerat) ipsius & Sociorum industriâ & pietate. Præfecto per codicillos imperat, iudicium utique reddat Ignatio, causam ritè cognoscat, feratque pro veritate sententiam. Et quidem hoc loco adesse mihi animis velim eos, qui Deum res humanas negligentem, circa cæli cardines otiosi non minùs ineptè quàm impiè fabulantur; ex iis quippe quæ consequuta sunt, nemo sanus paternam cælestis Numinis curam ac providentiam in suos non clarè perspiciat. Cùm enim tota adversariorum actio, eâ maximè calumniâ

mitteretur ; Ignatium sociosque variis locis
 jure damnatos, ambustosque judicij flam-
 mâ, per dolum effugisse ; cumque longum
 & operosum esset ; nemine præsertim, ne-
 cessaria in eam rem impendia subeunte, ex
 tam remotis disjunctisque provinciis , rei
 gestæ seriem literis consignatam, testibus-
 que firmatam , ex forensi formula petere ;
 planè divinitus factum est, ut quotquot in
 Italia, Gallia, Hispania, Ignatij Judices ex-
 titissent, sub ipsum ferendæ sententiæ tem-
 pus, Romam fere omnes, alius alia de cau-
 sa convenerint. Joannes Figheroa , quon-
 dam Archiepiscopi Toletani Vicarius , is
 qui compluti primùm , de Ignatij fama
 capiteque cognorat , gravibus de causis,
 Neapolim à Cæsare missus, in reditu com-
 modùm Romæ substitit. Venerat eodem
 è Gallia Parisiensis Inquisitor Matthæus
 Ori, Dominicanus , apud quem Ignatius,
 ut suprâ dictum est, semel iterumque ab
 improbis fuerat accusatus. Denique in
 tempore, Gaspar etiam Doctus, à Venetiis
 adfuit , qui habitæ in ea urbe in Ignatium
 quæstioni præfuerat. Hi omnes, in judi-
 cium adducti , adversariorum commenta
 detexere, cum summa testificatione virtu-
 tis, ac pietatis Ignatij. Præterea literæ civi-
 ratum , apud quas Italiâ totâ Patres ali-
 quandiù vixerunt, per idem tempus allatæ

magnum pondus , ad illustranda ipsorum merita , & refellendas iniquorum calumnias attulere. Jam verò, Hercules quoque, secundus hoc nomine, Dux Ferrariensium, qui Patribus familiariter usus , iisdemque peccata ritu Christiano confessus , ex eorum etiam manibus, corpus Domini sumpserat ; libentissimè fecit non modò, ut per epistolam, sed etiam ut per Legatum, perspectæ ipsorum innocentiae ac sanctitati debitum testimonium laudesque tribueret. Quibus rebus adductus , Urbis Præfectus, urgente præsertim Pontificis jussu, quamquam adversariis omni studio contrà nitentibus, denique suâ sententiâ Ignatium & Socios, omni nò modò culpa, sed etiam culpæ suspitione liberavit verbis amplissimis, ejusque sententiæ, ad vindicandum infantium famam, varias in provincias, testato descripta exempla dimissa : Quibus ex rebus, dici vix potest, quantum Patribus ubique honoris & existimationis accesserit. Atque hac maximè ratione , diu suppressa atque occultata veritas extulit aliquando sese, ac malitiâ superatâ, processit in medium; quæque machinamenta Diabolus , ad teneram adhuc Societatem deformandam, atque adeò præfocandum, artificiosè paraverat , ea ipsa , moderante rem Numine , in ejus maximè decus & incre-

menta cessere. At verò insidiatorum longè dissimilis fuit exitus. Namque administer consceleratae calumniae Michaël, fraude patefacta (quemadmodum dicebamus) in exilium actus est: E ducibus verò (quos nominare hoc loco necesse non est) unus paulò post iudicium, gravi correptus morbo, semet acriter ac dolenter incusans, cum insigni facinoris detestatione, diem obiit; alter, cum deinde manifestis hæreticarum opinionum indiciis teneretur, maturè sibi fugâ consuluit, effigiemque suam, pro se iudicibus cremandam reliquit; tertius, eodem nomine comprehensus, & cognitâ causâ, perpetuo addictus carceri, ad extremum tandem, morte jam imminente resistit, eidemque animam agenti, quidam è Societate, ad ultimum usque spiritum assedit; quæque illi temporì tribui solent, pietatis & charitatis officia præstitit. Porro Lutheranus ille concionator, qui totam conspirationem scelusque conflarat, intra catholicorum castra, per fraudem aliquandiu versatus, cum religionis ac pudicitiae simulationem ultra sustinere non posset, larvâ depositâ, palam fidei & continentiae bellum indixit, atque ad optata hæreticorum lustra popinasque se contulit.



*Ignatius & ceteri Patres , de consti-
tuenda Societate deliberant.*

C A P. I X.


HA c igitur falsæ accusationis pro-
cellâ, Ignatius, Sociique defuncti,
primùm omnium (ut æquum
erat) ingentes & universi communiter, &
singuli privatim, egere divinæ Clementiæ
gratias : Deinde, partim, quòd aliqui sub-
inde ad Ignatij institutum aggregabantur;
partim etiam, quòd inaudierant, aliquot è
suo numero varias in urbes atque provin-
cias jam tùm rogatu Principum, à sum-
mo Pontifice destinari; visum est facien-
dum, uti de stabilienda quàm maximè ad
Dei gloriam salutemque animarum So-
cietate, primo quoque tempore, inter se
consulerent; ad eam quippe diem, communi
tantùm officio ac pietate ducti, sine certis
& propriis legibus ac magistratibus vixe-
rant. Ergo precationibus, jejniis, & sa-
crificiis in eam rem quàm accuratissimè
adhibitis, quotidianæ vitæ munera labo-
resque ita partiti sunt, ut diurna tempo-
ra Dei verbo, consuetisque functionibus;
nocturna verò privatis inter se colloquiis,

& necessariæ consultationi darent. Prima igitur nocte quaesitum est, verum Pontificis jussu digressi, prout se daret occasio, suam quisque sine aliorum consensu, vel respectu, rem agere; an potius, quanquam corporibus locisque disjuncti, animorum tamen conspiratione, & meritorum communione, ut adhuc fuerant, sic in posterum conjuncti esse deberent. Dictisque sine variatione sententiis, nullum fuit dubium, quin tam suavis tamque arcta societas, Dei prorsus munere, ex tam diversis moribus, linguisque coalita, omni conatu studioque retinenda foret, tum ne qua Spiritu sancto injuria fieret, à quo divinitus fuerant, in eam consensionem adducti; tum verò, ne concordia atque unitatis bonum amitteretur, quo nihil est ad res magnas atque arduas moliendas, & obstantia quæque perumpenda, valentius. Cum hæc & alia multa, in eam sententiam ingenti alacritate & gaudio spirituali, pro se quisque dixisset, magnopere incensis ad mutuam charitatem & benevolentiam animis, cætus ille dimittitur. Proximo deinde consensu de Religione relatum est, placeretne, ad vota duo, Paupertatis Castitatisque ritè suscepta, tertium perpetuæ item Obedientiæ adjungere, & è suo corpore eligere, qui cæteris ampla cum potestate

præflet. In eam rem, quòd majoris momenti videbatur esse, diem proferri placuit, spatiumque seorsim singulis ad deliberandum dari, atque interim instauratis precationibus & sacrificiis, divinæ Sapientiæ lumen opemque diligenter exposci. Ut igitur ejus consultationis dies advenit, omnium in unum congruere sententiæ, quandoquidem Christum Dominum ac Magistrum, sibi pro viribus imitandum, cuncti susceperant, quoniam ille sese perfectum atque integrum holocaustum Deo Parenti, pro salute humani generis obtulisset, prorsus oportere, ut ipsi quoque pro suo modulo Christum effingerent: ac quemadmodum singulorum corporis bona, per voluntariam inopiam, corpus ipsum per castimoniam Deo immolatum esset; sic animus quoque, ante cœlestes aras, per obedientiam, spiritualis victima caderet; præsertim cum hoc sacrificio nullum Divinæ Majestati gratius aut suavius esse constaret. Ergo, sine controversia diligendum videri, cui omnes in terris tanquam Christo parerent; cujus in verba jurarent; denique, cujus sibi nutum ac voluntatem, instar divini cujusdam oraculi, ducerent. Hisce ita constitutis, deinceps quæsitum, de hujus ipsius potestate, utrùm certo dierum spatium definitam, an verò perpetuam esse oportet.

teret. Perpetuam esse placuit omnibus; Id-
 que, cum alias ob causas, quas commemo-
 rare hoc loco necesse non est; tum verò ut
 negotia graviora, quæ ad conficiendum
 non modò plenæ libertatis, verùm etiam
 longi ferè temporis indigent, leniter & ex
 animi sui sententia, posset ad exitum sine
 ulla trepidatione perducere. Additum ad
 hæc, ut Societatis candidati, cum aliis ex-
 perimentis, tum verò præcipuè spirituali-
 bus exercitationibus, peregrinatione, & in-
 finis publici alicujus valetudinarij mini-
 steriis probarentur. Itemque, ut qui Socie-
 tatis instituta profiterentur; ij ad tria so-
 lemnia vota, quæ nobis cum aliis dicatis
 Deo familiis, ferè communia sunt; quar-
 tum nominatim adjungerent, quascunque
 ad fidelium vel infidelium terras, Christia-
 næ rei causa, Pontifici maximo, ipsos mit-
 tere placuisset, eò sine ulla tergiversatione,
 atque adeò sine ulla non modò mercede,
 sed ne viatici quidem petitione proficif-
 cendi: ac simul, conceptâ verborum for-
 mulâ sese obstringerent, puerili ætati per
 catechesim erudiendæ; quòd eo remedio,
 nullum fermè efficacius foret ad inteme-
 ratam fidem tuendam, ac praviæ religionis
 prohibenda contagia. Hæc igitur & alia
 id genus nonnulla, per eos dies ab Ignatio
 patribusque decreta sunt: eidemque Igna-

rio negotium datum ut ea in summam redacta, Pontifici maximo, primùm Apostolica auctoritate sancienda, atque approbanda proponeret; deinde, ut eadem ipse postea, per otium, fusiùs explicaret, ordinaretque; & quàm accommodatissimas ad Societatis vocationem & spiritum leges, canonesque perscriberet.



*Patres, in varia loca, Pontificis
jussu discedunt.*

C A P. X.

SU B hæc ferme decreta, Pontifex maximus aliquot operarios, ab Ignatio, in varias agri Ecclesiastici vineas, postulavit. Id nostræ Societati fuit Apostolicæ peregrinationis exordium. Ennio Verulano, S.R.E. Cardinali, per eos dies, cum amplissima potestate legatio Permenis obvenerat. Huic, Pontificis jussu, legationis comites, & rerum spiritualium administri duo, Petrus Faber, & Jacobus Laines, ab Ignatio dati: Senas verò, in Etruriam Paschasius, ad instaurandam sacri cujusdam cenobij dis-

ciplinam, ab eodem Pontifice missus est: In Ænariam seu Inarimem insulam, pacificationis gratiâ non levis momenti, Nicolaus Bobadilla: Brixiam, in Cenomanos ditionis Venetæ, Claudius Jaius, gravibus item de causis abiit. Ac per idipsum tempus, etiam in extremas terras primum Societati paruit aditus. Brasiliâ oram, & præterea quidquid inter inaccessum olim Bonæ spei promontorium, ultimosque Sinas interjacet, maritimi tractus; Indo & Gange superato, Lusitani, armatis classibus, ante annos aliquot, ingenti ausu & labore, æquè fortiter ac feliciter aperuerant; neque Joannem, hoc nomine, tertium Lusitaniæ Regem, insigni virtute ac pietate virum, ulla magis angebat cura; quàm ut barbaras illas nationes, à misera Dæmonum servitute, ad unius veri Dei notitiam cultumque traduceret: atque ob idipsum, quos in ea mitteret loca, præcones Evangelij, & moribus & eruditione præstantes, totâ Europâ impendiò conquirebat. Ejus rei conscius Jacobus Govea, is, qui Parisiis, in ipso virgarum periculo, singularem Ignatij fidem virtutemque, ingenti cum admiratione cognorat, procul dubio statuit, illum & socios, ad Indicam expeditionem, fore quàm accommodatissimos, quoniam quidem abi-

Hierosolymæ accessu , bello impediti, quemadmodum audierat , in Italia substitissent. Neque tamen quidquam ejus consilij, ratus impertiendum Regi, antequàm ipsius Ignatij voluntatem explorasset ; pro amicitia ad illum scribit , quàm libentē Lusitaniæ Rege, quàm spatiosus bonorum industriæ pietatique campus in India pateat : sibi quidem , quando illum & socios ab Hierosolymitana curatione arceat bellum, sanctissimis ipsorum studiis , provinciam in primis aptam videri. Si conditio placeat , ultrò semet apud Regem , totius negotij forem interpretem, pollicetur. Ad ea , cum gratiarum actione rescripsit Ignatius , neque se, neque socios esse jam sui juris, quippe qui summo Christi Vicario semetipsi , perpetuo nexu Obedientiæ mancipassent ; proinde agendum esse, cum Romano Pontifice ; quidquid ille jussisset, id verò sine mora facturos. Quo accepto responso Govea , cùm facilè speraret à Pontifice impetrari posse, rem totam Regi suo per litteras aperit , ipsumque exemplar epistolæ Ignatij ad eum mittit, cum summis illius & sociorum laudibus, etiam atque etiam suadens , ut ejusmodi virorum operâ potissimùm utatur , ne tam præclaram occasionem elabi patiatur è manibus , cui similem fortasse nullam,

fit in posterum habiturus. Haud incassum
 adhibita hortatio ; quippe Rex & sua
 sponte jam incitatus, & Goveæ, talis viri
 monitis, & auctoritate permotus, confe-
 stim Petro Mascarenia, suo apud Pontifi-
 cem maximum Oratori, mandat, mox in
 Lusitaniam redituro ; det operam, ut
 quàm plurimos ex Ignatij disciplina se-
 cum deducat, Evangelij causa mittendos
 in Indiam, eaque de re, cum Ignatio quàm
 primùm agat : si res cum illo minùs pro-
 cedat, omni conatu, cum ipso Pontifice
 transigat ; utique, ne sine tali comitatu re-
 vertatur ad se. Hoc tam severo mandato
 Legatus accepto, sine cunctatione Ignatium
 convenit, ac pauca præfatus (ut fit)
 conciliandæ benevolentia, mandatum sui
 Regis exponit, Patresque minimum sex
 in missionem Indicam postulat. Ad quem
 ille, submissa oratione, tam honorifico
 Regis de se judicio gratias cum egisset,
 eadem ferme, quæ ad Goveam respondit:
 quod ab se petatur, totum id è summi
 Pontificis voluntate imperioque pendere;
 qui tamen, si quid ego sentiam quæris,
 (inquit Ignatius) unum aut alterum for-
 tasse tibi concesserit, plures vero, nequa-
 quam. At ille, cum nihilominus in eodem
 postulato persisteret, Dei fidem & homi-
 num testans, nusquam operam collocari

fructuosius posse ; tum Ignatius , quasi futura præfagiens , familiari ac placido vultu : Deus, inquit , meliora, Charissime Orator ; quippe si è tam exiguo numero, sex, unam duntaxat in provinciam demas, quantulum, quæso, reliquo terrarum orbi supererit ? Neque tamen idcirco ille ab incepto desistit ; & quoniam Ignatium flecti posse diffidebat, ad ipsum adit Pontificem , narrat quid sibi ab Rege mandatum sit , suppliciter etiam atque etiam obsecrans , ne in tam honesta causa , tamque pia, frustrari se Regemque suum, concepta peropportuni subsidij spe patiatur. Hic Pontifex, quamquam lætus ab urbe Roma potissimum , ut par erat , peti sacri Evangelij nuntios ; & insuper, tanto Regi tamque de Romana Ecclesia bene merito gratificari vehementer exoptans ; tamen , ut in tali negotio , ne videlicet servis Dei ad omne paratis obsequium abuti pro potestate videretur , (qua erat lenitate ac sapientia vir) audito Legato , rem ipsam probavit , de numero ad arbitrium rejecit Ignatij. Is proinde (sanè quàm ægrè ferente Mascarenia , neque tamen aspernante , quod datum est) post multas in eam rem fusas ad Superos preces , quemadmodum antea significaverat , duos duntaxat glorioso muneri destinavit , Simonem Ro-

terigium Lusitanum, & Nicolaum Bobadillam, qui cùm idcirco Romam evocatus, graviter ischiade laboraret, neque legatus Regius maturo jam reditu expectare diutiùs posset; ægro Bobadillæ, sibi que vicem ereptam dolenti, Franciscus Xaverius repentè sufficitur. Erat omninò laboriosa provincia, iterque longinquum, & cùm ferè nullam in spem reditus, tum verò in apertum penè quotidie vitæ discrimen. Sed, quæ alios ab ejusmodi consilio retardassent, ea ipsa incitamenta fuisse Patribus, cùm se quisque tali sorte præ cæteris beatum existimaret. Ac Simon quidem parata in Lusitaniam navis, celeriter antecessit: ac deinde Regis Lusitaniæ jussu, Procerumque rogatu, quamvis invitus, in eadem provincia substitit. Xaverius autem, ubi delatum ad eum est, confestim exiit gaudio, datoque sibi tempore, vix quod satis esset ad laceram, attritamque tunicam resarciendam, & salutandos fratres; cum Legato postera die profectus est, immortales agens Domino gratias, quòd se denique voti compotem effecisset. Perpetuas quippe ciades percuntium ex ignoratione Dei, in ultimis regionibus, animarum, jam antè miserari, & messis potissimùm Indicæ magnitudinem, crebris consueverat usurpare sermo-

nibus. Quin etiam, per quietem non semel erat sibi visus, Æthiopem in humeros sustulisse, usque adeò ponderosum, ut ipsa oneris magnitudine excitaretur è somno mirè defatigatus, membrisque omnibus dolens: continuóque rem omnem Jacobo Lami patefaciebat, ejusdem cubiculi socio: Hæc igitur fuere nostris hominibus, Pontificiæ missionis initia: Patresque in varia deinceps loca profecti, majorem in modum aucta Societate, institutisque, supplementi causa, totâ ferme Europâ, Collegiis Domibusve, res eas Deo duce atque adjutore gessere, quæ proprio & quidem justo volumine, ipsæ per se, ad enarrandum indigeant.

✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠

*Ignatius plebi fame periclitanti
succurrit.*


C A P. X I.

NEQUE verò Ignatio & cæteris, qui remanserant, Romæ, negotium defuit. Erat annus à Virginis partu M. D. XXXVIII. insignis annonæ caritate, ac per hyemem præcipuè tantâ frugum inopiâ, ut passim jacentes in publi-

to pauperes , frigore fameque confecti, miserandum in modum expirarent. Quo spectaculo commotus Ignatius, tantæ calamitati, sibi omni ope subveniendum putavit. Jamque è Garzonij villa, cum suis, in Urbis frequentiora loca migraverat, laxiore sibi ab amicis domo conductâ , ad Circum Flaminium , in ea regione quæ sancti Angeli , ad forum Piscarium hodie dicitur. In ejus igitur domus ampla cœnatione, fœno stagalisque dispositis , & in pauperum alimenta , eleemosynis undique corrogatis , in omnes partes dimisit, qui in id hospitium , ut quemque periclitantem extremâ inopiâ invenissent, vel inter manus, prout res ferret, vel gestatoriâ sellâ deveherent. Cum strenuè curaretur, adhibitis etiam, ubi opus esset, adjutoribus bajulisque; brevi numerus decumbentium ad quadringentos ascendit. Hîc verò , eodem Ignatio præside ac duce , Patrum fratrumque, sese charitas ac virtus exeruit. Diluculo quotidie linteati omnes , ad imperia accipienda præstò aderant. Inde ad sua quisque officia discurrere , sine ulla perturbatione vel tumultu ; alij recens itatos pauperes clementer exuere, & calida elutis corporum sordibus , in lectulo collocare ; alij assidere languentibus , eisdemque amicissimis consolari verbis ; hi

eibos aut domi excoquere diligenter, aut aliunde missos instruere: illi fercula inferre, & longâ inediâ propemodum egentis pretiosos liquores instillare: hi, cubilia sternere; illi, scopis pavimenta purgare: denique certatim omnes munere suo ita fungi, ut præclare testarentur, in minimis illis agnoscere se Regem regum, & Dominum dominantium. Neque verò corpora solum egentium, sed animi quoque eadem operâ curabantur. Plurimi quippe rudes, Christianæ doctrinæ præceptis probè instituti; multi, à turpi quæstu fraudibusque deterriti, & quod caput est, sacra omnes Confessione expiati, ac Pane cœlesti longo intervallo refecti sunt. Deinde, ut aliqui convaluerant, succedentibus invicem aliis, cum tegumentis ad frigus arcendum, & certo pecuniæ subsidio mittebantur. Ea res per Urbem vulgata, magnam populi benevolentiam conciliavit Ignatio; atque ad eam Christianæ humilitatis charitatisque officinam visendam, interdium promiscua turba, noctu verò, etiam viri principes ventitabant: ac tanta fuit exempli vis, ut quidam, cum præsentibus non suppetere sibi nummi, depositis illico in usus pauperum vestimentis, domum seminudi reverterent. Alij etiam, sancta æmulatione incitati, ejusdem con-

ditionis homines , quorum non deerat
passim copia , hospitio susceptos benignè
curarunt. Multi præterea procures, in glo-
riosis operis perfectionem , Ignatio , pecu-
niæ summam ultra retulere non leves.
Qua in re, Margaritæ Austriacæ Caroli V.
filix , Octavio Farnesio nuptæ , Placenti-
norum , & Parmensium hodie Duci, pie-
tas ac beneficentia vel in primis enituit.
Atque ejus pecuniæ , cùm Ignatiùs intel-
ligeret , se vel maximâ eorum qui contu-
lerant voluntate , partem aliquam in suas
& suorum necessitates erogare posse ; ta-
men tanta fuit religione vir, ut ne obolum
quidem , nisi in externorum pauperum
commoda, insumpserit , relatis in codicem
accuratè nominibus , ut omnium prorsùs
ratio constaret. Atque hunc maximè in
modum labor ad exactam usque hyemem,
secundâ civitatis admurmuratione perdu-
ctus ; ac vere demum ineunte , frumenta
partim ab iis qui suppresserant , sponte
prolata ; partim à magistratibus aliunde
confecta sunt. Ea re non mediocriter an-
nona laxavit ; graviq̃ue perfuncta pericu-
lo plebs, Deo adjuvante, ad solitos quæ-
stus & opificia rediit.



*Confirmatur à Pontifice maximo
Societas.*


C A P. X I I.



INTEREA, cùm ad Ignatium studio religionis, aliqui subinde se adjungerent; nequaquam immemor ille, quod ad Societatem confirmandam attinebat, negotij paulò ante suscepti; quidquid à publicis occupationibus otij datum est, in eam ipsam rem diligentissimè contulit. Ac primùm totius instituti formulam (fusiùs postea explicandam) ad certa capita dilucidè redegit ac breviter. Deinde nactus opportunitatem, quòd Pontifex maximus per autumnì ferias, è turbâ negotiisque, Tibur sese receperat, eam formulam auctoritate Apostolica sancendam, eidem Pontifici suppliciter obtulit, per Gasparem Contarenum Cardinalem, de quo suprâ dictum est, ob egregiam virtutem sapientiamque, Principi in primis acceptum, nostrique ordinis amicissimum: Quam ille ubi perlegit; confestim, Spiritus, inquit, Dei est hîc, ac multa præterea in eam sententiam

adjunxit; quare consideret recentem huiusce manipuli ardorem, tali tempore divinitus excitatum, afflictis Ecclesiæ rebus, non levi tum præsidio, tum ornamento futurum. Veruntamen, ut in tanta re, ne minus consultè quidpiam statuisse videretur, totum negotium delegavit tribus viris è sacro Collegio Cardinalium, apud quos minimum loci fore putavit gratiæ. In iis fuit Bartholomæus Guidicionius Lucensis, vir divini humanique juris apprimè peritus, idemque novarum Religionum adeò non amicus, ut de iis ad certum numerum redigendis, librum etiam conscripsisse dicatur. Is, præjudicatâ jam causâ, collegas nequaquam propensos in Ignatium, facile in suam sententiam adduxit; certamque propemodum confectamque rem, consilio & auctoritate sua penè discussit. Quod ubi sensit Ignatius, parum præsidij ratus in hominibus esse, ad opem divinam de more confugit, ac præter jejunia, supplicationes, cæteraque ad Numen propitiandum adhiberi solita, cælestes insuper hostias, eo tantum nomine, per se & per amicos immolavit, ad tria millia: Qua procuratone, intra finem anni vertentis, cum cæterorum, tum præcipuè Guidicionij ita immutata voluntas est, ut cum de multitudine Religionum cohibenda, idem quod au-

tea, omninò sentiret ; huic tamen refragari se ultrà negaret posse , divino videlicet monitu & occulta spiritus operatione vehementer instinctus. Ita, qui diu valde anxios habuerat Patres , eorumque spem, variis frustrationibus propemodum extinxerat, idem unè cum cæteris collegis repente placatus ac favens, rem ultrò suscepit , commendavitque Pontifici , Tibure denuò commoranti : qui libentissimo animo & Societatem ipsam , & Societati inditum Nomen, ritè sancteque approbavit, V. Non. Octobris , anno M. D. XL. idque testatum voluit esse publicis literis, eodem die locoque datis , cum eo tamen, ut in universum Socij , ne plures sexaginta numerarentur. Ea videlicet fuit novellæ Societatis quædam quasi probatio ; siquidem triennio pòst , cùm variis locis atque provinciis , Deo aspirante constaret egregius operæ fructus ; ab eodem Pontifice limes ille omninò sublatus est, liberumque Ignatio & successoribus relictum, cuilibet petenti Societatem dare : Quod item appareret diplomate dato , pridie Idus Martias, anno M. D. XLIII.



Præpositus Generalis creatur Ignatius.

C A P. XIII.

IGITUR post multas difficultates approbatâ denique Societate; gratiæ primùm (ut æquum erat) actæ Superis, quorum benignitate res bene feliciterque vertisset; deinde, quoniam in dies à Pontifice, missio Patribus imminabat; è suo corpore, Præpositum Generalem (sic enim qui cunctis præesset appellare placuerat) primo quoque tempore deligere visum est. Societatis autem status, per id tempus erat ejusmodi; Franciscus Xavierius, & Simon Roterigius, in Lusitaniam erant profecti. Petrum Fabrum, Cæsaris Legatus Ortizius ad Vormatiensem conventum, Pontificis permissu, in Germaniam adduxerat. Jacobus Laines Parmæ, Claudius Jaius Brixiae, Senis Paschasius agebant. In Brutios Nicolaus Bobadilla discesserat. Cum Ignatio Romæ, duo duntaxat è Patribus versabantur, Salmeron & Codurius: Tyrones verò qui nomen dederant Societati, partim apud Ignatium erant, partim studiorum causa, ab eodem Parisios

missi, uecessaria ad bellum spirituale arma enixè parabant: Quidam etiam, ad res domesticas componendas, in Hispaniam profecti; & concionibus jam tum & colloquiis, ingenti hominum approbatione, Societatis nomen longè latèquè vulgauerant. Hoc Societatis statu, cùm Præpositi eligendi tempus adesset, Patres, qui quidem in Italia erant, per literas moniti, quòd rei Christianæ commodo facere possent, creandi Præpositi causâ, ad Urbem accederent; sub initium Quadragesimæ, anni M. D. XLI. convenère omnes, uno dempto Bobadilla, quem in oppido Bisiniano tum maximè res gerentem abduci rursus ab opere Pontifex noluit. Is & cæteri qui longiùs aberant, suum quisque in schedula suffragium ritè obsignatum; partim in discessu reliquerant Romæ, partim deinde misère inclusum epistolis. Ac primum tridui supplicatio indicta, vetitumque inter ipsos de Præpositi electione colloquium est. Deinde coniectis in urnam schedulis, triduum insuper continuatæ preces: ac septimo denique die, legitimè extractis recitatisque suffragiis, Præpositus declaratur Ignatius, nemine præter ipsum Ignatium discrepante: namque is consultò, ne unum nominatim ex omnibus deligendo, cæteros quodammodo notasse vi-

deretur ; in scheda scripserat , se ad eum accedere , in quem plurima suffragia convenirent , uno se duntaxat excepto. Igitur explorata jam Numinis voluntate , ad Ignatium venerabundi accurrunt Patres. At ille, parendi nimirum longè quàm imperandi cupidior , severo vultu jubet eos absistere ; negatque , se munus viribus impar suis , ulla ratione subiturum : multa-que seriò disputat, cur alium potiùs quemlibet sibi sufficere debeant. Sed videlicet quibus rebus putabat voluntates Patrum aliò posse transferri, ex ipsæ vel maximè, studia eorum incendebant. Nihil enim ad conciliandos homines æquè valet , atque animi moderatio atque submissio : quod factum est , ut nihil eorum quæ ad munus detrectandum Ignatius afferebat, aliquandiu non modò animum admitterent , sed ne ad aures quidem. Sed post multam denique altercationem ægrè Ignatius tenuit, ut ampliùs in tertium diem obsecratione protracta, rursùs in suffragium iretur : Quo die, cùm idem prorsùs omnium consensus exstaret , nèque jam locus tergiversationi videretur esse ; tum Ignatius : *Quandoquidem , vos in me potissimum eligendo perstatitis , inquit ; ego autem mea conscius infirmitatis , vestro iudicio , salvâ religione assentiri nequeo ; reliquum est , ut*

hujusce controversiæ arbitrum diligamus eum, qui mihi à confessionibus est; quoque, ut scitis, utor divina voluntatis interprete.

(Is erat ante conditam Societatem, frater quidam Theodosius, ex ordine Minorum, cœnobij, quod ad sancti Petri in Monte aureo, qui fuit olim Janiculus, appellatur.)

Quod, ne frustra diutius tenderent Patres, eò facilius concessere, quod minimè dubitabant, quin ipsorum suffragij prærogativam, ille quoque sua sententia comprobaturus esset: neque eos fefellit opinio.

Cùm enim rem totam ad eum detulisset Ignatius, imbecillitatem suam corporis animique commemorans, dein etiam atque etiam obtestans, ut se tanto onere levatum vellet; ille cognita re tantum abfuit ut precibus Ignatij cederet, ut etiam objurgaverit hominem, quod, tam exploratâ divinâ voluntate, Spiritui sancto diutius resistisset: & simul, ne dissimulationi esset locus, ultrò adiit Patres, ac de suo responso certiores fecit. Quibus rebus denique victus Ignatius, omni spe in uno Deo rei bene gerendæ reposita, dedit manus, diemque constituit, x. Kal. Maij, quo die ad auxilium divinum implorandum præcipua septem Urbis templa simul omnes obirent, & in divi Pauli potissimum (quoniam ejus maximè Apostoli vestigia sequerentur) so-

lemni professione, suæ religionis vota susciperent. Ut igitur ea dies adfuit, in eo templo, ad sacellum beatæ Virginis, ubi tum Eucharistia custodiebatur, quod sacellum ad imos gradus est aræ maximæ, sub ipsam cœlestis Panis communionem, ipse primùm qui sacrificabat Ignatius, tum cæteri sua quisque vota, clarâ voce descripto, ex Apostolici diplomatis formula nuncuparunt. Deinde sumpto ex Ignatij manibus Corpore Domini, post gratiarum actionem, sacratissima ejus ædis loca religiosè cum adiissent; circa aram maximam, sub qua Petri & Pauli Apostolorum ossa condita sunt, cuncti consistunt, fœntesque præ gaudio, & suavissimè amplexantes inter se, gratulantur denuò Superis, quòd cœptis adfuerint, suamque Societatem arctiori vinculo colligarint: deinde reliqua templa, pari lætitia ac pietate circumeunt. Quibus rebus, ingenti omnium consensu & conspiratione peractis, magistratum Ignatius iniit. Ac primùm omnium, ad constituendam domesticam disciplinam adjecit animum, quæ digna tali instituto, digna Christianæ Philosophiæ professoribus haberetur. Itaque ad cæteros provocandos, atque ad jacienda in tyronum animis veræ humilitatis fundamenta, in sordidis culinæ ministeriis aliquandiù versatus est ipse,


tantâ cum alacritate ac diligentia, quasi
tum primum, ad suam ipsius emendatio-
nem, vitæ spiritualis curriculum esset in-
gressus; neque tamen interea gravioribus
negotiis deerat, temporibus ita distributis,
ut quantum liceret, utrique muneri satis-
faceret. Accedebat ad hæc, summus pau-
pertatis amor, summa in victu cultuque
frugalitas: præterea in singulorum offi-
ciis exigendis, erratisque puniendis, admi-
rabili mixta lenitate severitas: in suble-
vandis verò omnium & animi & corporis
necessitatibus, cura & vigilantia plusquam
paterna. Cumque ad ea charitatis officia,
prout res postulabat, opportunas insuper
adhortationes, & publicè & privatim ad-
hiberet; haud sanè difficile fuit, in ani-
mos, recentissimo tum Societatis spiritu
sponte incensos officio ac religione, eos
mores, eamque vivendi rationem induce-
re, ut (si cælestibus terrena comparare
fas est) intra illa tecta parietesque, An-
gelorum, in humanis corporibus, quidam
convictus videretur esse; nullæ tum que-
rimoniæ, nullæ detractiones, nulli susurri,
quibus incommodæ suspiciones excitan-
tur, & disjunguntur animi; sed acerrimum
sui cujusque deprimendi, submittendique
certamen; in superiorum jussis excipiendis,
exequendisque alacritas ingens; mirus, in

communicando interpretandoque, candor atque simplicitas; oculorum ac sensuum intenta custodia; studium precationis ac solidæ virtutis ardens, quæque ex his rebus necessariò provenit, admirabilis in magna nationum, ætatum, ingeniorum varietate concordia. Itaque conjectis, ut fit, omnium oculis in ordinem novum; brevî non ad nostros tantum, verum ad externos etiam, salutaris exempli manare utilitas cœpit. Adolescens quidam, egregiis naturæ adjumentis, è Septentrionali plaga Romam advenerat, non modò Lutherana tæbe infectus ipse, verum etiam mirè cupidus ejusdem longè latèque vulgandæ. Is cum ex occasione sese in hominum cœtus infereret, verbisque venenatis, clericorum vitam ac mores, summam in invidiam vocaret primùm, deinde abductis à Sacerdotum reverentia mentibus, prava dogmata sensim illustrare quotidie pergeret; patefacta re, jussu magistratuum comprehenditur, qui cum & ipsi per se, & sacre Theologiæ magistris adhibitis, illum ab opinionionum insania revocare frustra conati essent; ne quid intentatum relinquerent, ætatem & ingenium miserati, prius quàm in eum lege ageretur, accersito Ignatio eum totam exponunt: Quoniam ipsorum neque adhortationes, neque minæ proficiant, ha-

beat illum aliquandiū apud se, videat etiam atque etiam ut errantem oviculam ad Ecclesiæ caulas, aliqua ratione traducat. Ille clementer acceptum hæreticum domum adducit : neque verò sapientes iudices frustrata spes est; siquidem adolescens ab Ignatio sociisque amicissimè habitus; eorum dictis, factis, & institutis accuratè observandis paulatim affici atque immutari, Dei beneficio est cœptus; & quam antea respuerat medicinam, libentiùs in dies accipere; ac demum perseverantibus Patrum officiis, & diligentissima curatione, eò processit res, ut evulsis lethalium dogmatum fibris, priorem pertinaciam gembundus agnosceret: nec antea saluari in cœpto destitit, quàm voluntaria abjuratone detestatus errores, ingenti bonorum, tum admiratione, tum gaudio, cum Ecclesia sancta in gratiam rediit. Is deinde, quærentibus viris gravibus, cur qui antea tot machinis oppugnatus, pervicacissimè restitisset, Ignatij denique, & Patrum hospitio & consuetudine vinci se passus esset; sine cunctatione respondit, se illorum non tam disputationibus argumentisque (licet in eo quoque genere valerent plurimum) quàm spectatæ sanctitati, virtutique cessisse: quòd ita apud se propè necessariò statuisset, à tam incorruptis moribus, tanta

LIBER SEGUNDUS. 193

pace atque concordia, tam bonis operibus, rectam in Deum fidem abesse, nullo modo posse. Quæ res documento erit hominibus nostris; licet ad convertendas ad Christum animas, ingenij ac doctrinæ præsidia requirantur; tamen conspectû vitæ morumque innocentiam plus multò, quàm literis aut concertationibus profici. Alius quidam filiusfamilias, desertis liberalibus studiis, ac repudiatâ omni disciplinâ, prorsus indomitus & effrænis, cum neque à parentibus jam, neque à magistris regi ullo modo posset, Ignatio traditur, cujus lenitate, itemque cæterorum Patrum præceptis, atque institutis accuratissimè excultus, positâ paulatim ferociâ petulantiamque, cunctis admirantibus, ita pudicos modestosque induit mores, ut vix minimum in illo vitium reprehenderes. Multi præterea omnium ætatum atque ordinum, quos præceps in omnem licentiam natura cupiditasque compulerat, Ignatij consuetudine exemplisque incitati, collegere sese, atque ad bonam frugem Deo adjuvante redire.



Generalis Ignatius, denuò Catechistæ munere fungitur.

C A P. XIV.

PER eos dies nomen Societati dederat è Pontificia familia Petrus Codatius Laudensis, vir honoratus, & opulento Sacerdotio præditus. Is, divino prorsùs instinctu, divitiis & commodis omnibus propter Christum abdicatis, Marthæ munus in Societate sibi ultrò depoposcit, & egregiè præstitit; in alimenta Patrum (erat autem Urbe tota notissimus, & apud Principes graciosus) eleemosynis undique corrogandis: Quæ res, Ignatium & Socios magna molestia liberavit; quippe quos in spiritualem proximorum salutem omni studio intentos, temporariæ curæ, ad eam diem, valdè impedierant. Eiusdem Petri operâ, templum etiam proprium Societas nacta est sanctæ MARIÆ à Strata, non satis amplum illud quidem, aut commodum; sed tamen in celeberrima urbis regione, & ad Societatis functiones in primis idonea: cujus loco, dum hæc scriberemus, Alexander Farnesius Cardinalis, Pauli I I I.


LIBER SECUNDUS. 125

Pontificis maximi nepos, Ædem nomini
JESU magnificentissimam regio sumptu
 exstruebat. Ei templo deinde adjuncta do-
 mus est, quam hoc tempore Patres inco-
 lunt, Philippi Archinti beneficio, Salassio-
 rum Episcopi, qui tum Pontificis vices in
 diœcesi Urbana gerebat, viri de Societate
 universa in primis optimè meriti. In eo
 igitur templo Ignatius, professionis lege,
 sex & quadraginta diebus Christianæ cate-
 chesi operam dedit è loco superiore, magnâ
 & assiduâ non modò plebis, verùm etiam
 præstantium virorum frequentîâ: prorsùs,
 ut quidam ex optimatibus palàm gloria-
 rentur, beatosque se ferrent, quòd nullam
 omnino ex Ignatij concionibus omisissent.
 Agendi autem rationem sequebatur ejus-
 modi: Fidei præcepta, & mysteria cogniti
 necessaria, primùm ad vulgi captum expla-
 nabat, iterabatque, ubi opus esset, eadem
 sæpius: deinde opportunis digressionibus
 certos interim locos tractabat fusiùs, non
 tam ad ingenij, vel doctrinæ ostentatio-
 nem, quàm ad pietatem excitandam popu-
 lumque permovendum accommodatos.
 Idque tam veris gravibusque sententiis,
 tam ardenti vultu oculisque, ut divini amo-
 ris ignem undique spirare videretur, mini-
 mè fucatæ eloquentiæ vir, nec in singulas
 voces numerosque sollicitæ, sed ingenti ani-

etissimas in regiones, civitatum Regumque
 invitatu, missæ coloniae; domusque vel
 collegia ingenti approbatione constituta:
 primum omnium in Lusitania, atque adeo
 in ipsamet India, sumptu ac munificentia
 Regum Lusitaniæ; tum aliorum pietate,
 in Hispania, Gallia, Germania, Italia. Sed
 cum aliæ pleræque nationes avidè Socie-
 tatem amplexæ sunt, tum verò Sicilia &
 invitavit perhonorificè, & permissu Ponti-
 ficis maximi acceptam, in primis copiosè
 ac benignè tractavit; adnitente præsertim
 Joanne Vega Hispano, (qui regnum illud
 pro Cæsare administrabat) præstanti non
 minùs religione quàm prudentiâ viro; cu-
 jus, etiam antea, dum Romæ Legatus Cæ-
 saris ageret, plurima & maxima in Ignatium & Socios, egregiæ cujusdam benevo-
 lentiae documenta constiterant. Itaque tam
 latè jam fusâ Societate, non modò colle-
 giis domibusve Rectores præficere, ut an-
 teà; sed etiam Provinciales Præpositos,
 quos appellant, cum ampla potestate in
 singulas nationes describere coactus Ignatius est. Ac primum Lusitaniæ præpo-
 suit Simonem Roterigium, deinde His-
 paniae Antonium Araozium Cantabrum,
 Italiae Jacobum Lainem, Indiae Francis-
 cum Xaverium, Germaniæ Petrum Cani-
 sium, Galliae Paschasium Broëtium, aliis-

que deinceps alios; Nam urbanam provinciam, nisi si quando graviore valetudine premeretur, ad extremum usque ipse administravit. Interea de Societatis universæ progressu mirè sollicitus, à singulis Provincialibus per literas pensum exigere; unicuique mandare diligentissimè, quæ è re communi essent: Romæ verò, præter domesticæ disciplinæ curam, de qua dictum est, cæterasque functiones, multa & gravia quæ ad incrementum ac defensionem Catholicæ fidei pertinerent, partim cum summo Pontifice, Cardinalibus, Legatisque Principum coràm, partim etiam cum ipsis Regibus atque Principibus, per epistolas interpretes agere. Accedebat ad hæc, sollicitudo ingens atque indefessus labor, in sublevandis pauperum difficultatibus; orborum, orbarumque educatione ac pudiciâ procurandâ tuendâque; & perditis mulierculis à turpi quæstu, ad frugem & continentiam traducendis.





*Varia in Ignatium tempestates
exerçantur.*


C A P. XVI.



U I B U S ille rebus , dum Christi causam agit intrepidè, multorum, ut fit, odia simulatesque contraxit. In iis, aulicus quidam (cujus nomini parcitur) eo tempore potens & gratiofus, cum abductam à se mulierculam, quam miserè deperibat, & in malè nuptarum, ut appellant cœnobio collocatâ ferre non posset; sæviore in dies concepta rabie, quam libido & amor incendebat, ita demum exarsit, ut penè furere videretur. Ac primùm, factâ manu, fenestras cœnobij lapidibus pertere, custodes infestare, minari: deinde in Ignatium auctorem & Socios, in circulis cœtibusque omnia maledicta cōferre; quin etiam ex occurſu probris & contumeliis eosdem incessere: denique ad eos funditus evertendos, improbiſſimas in ipsorum vitam calumnias dissipare: quæ domos primùm nobilium circumlatæ, celebratæque sermonibus (quos partim prona in deteriùs persuasio, partim vesani illius artificium dolorque exultabant) ad Cardinales etiam,

atque ad eò ad ipsum Pontificem pervenerunt. Igitur vulgus, ut est plumâ & folio levius, quos nuper summa cum approbatione suspexerat, eosdem repentè contemnere, & acerbiorè in dies odio execrari, & singulorum caput, dira imprecatione defigere; prorsus ut jam non modò cum proximis agere, sed ne pedem quidem januâ tutò efferre possent. Principes verò, licèt magna ex parte fictas criminationes putarent, tamen rati subesse profectò nescio quid, quod tantæ invidiæ flammam foveret; vel immutatâ, vel certè labefactatâ in Ignatium voluntate videbantur. At Ignatius, quamvis à sua suorumque consuetudine multos abduci, non sine rei Christianæ jactura cerneret; tamen ratus mitigari hominis ferociam posse, primò rem dissimulare, atque ad eò officiis cum improbitate certare: deinde, ubi malum serpere quotidie latiùs, & ipsâ patientiâ corroborari audaciam sensit; non tam privato dolore, quam reipublicæ detrimento permotus, ad Summum Pontificem adiit, ab eoque suppliciter impetravit, ut criminum, quæ sibi suisque denuò objicerentur, acre iudicium exerceretur ab Archinto Vicario, & Francisco Michaëlio, Urbis præfecto. Ij, citatis omnibus, ad quos criminum vel suspicio, vel conscientia pertinebat, ac per di-

ligentem inquisitionem , calumniatoris fraude comperta, Ignatium & Socios non modò abolverunt latâ sententiâ, sed etiam debitis laudibus & honore verborum extulerunt , increpito valdè adversario, pœnaque proposita non levi, nisi à petulantia maledictisq̃ue desisteret ; nam , ne graviùs in eum animadverteretur , Ignatio in primis deprecatore perfectum est: Ita, quæ antea semper , tum quoque Ignatij sanctitatem illustravit hominum injuria ; & Deo duce, virtus ac veritas, dum violatur, effulsi. Iisdem ferè insidiis postmodùm appetitus Ignatius est à Sacerdote quodam; qui cùm domum catechumenorum administraret , ferre non poterat in ea regenda familia , majorem à loci præsidibus Ignatij rationem haberi, quam sui: Sed miser, Ignatio silente ac pro eodem orante, brevi perfidiæ pœnas dedit; atrocibus enim antea vitæ sceleribus , justo Dei judicio patefactis , quæ ad eam usque diem astutè suppresserat , Sacerdotio spoliatus, & perpetuo carceri addictus est.




*Regimen Fœminarum , à Societate
depellit Ignatius.*

C A P. X V I I.

INTEREA Elisabetha Rosella Barcinonensis , quæ Ignatij prima literarum studia foverat, Societatis Jesu coalitæ & confirmatæ famâ commota, Romam ex Hispania contulit sese, partim ut Ignatium longo intervallo reviseret , partim etiam, ut unâ cum quibusdam aliis piis fœminis, ad normam illius atque præscriptæ, ageret vitam. Atque Ignatius quidem sospitem adventum mulieri de se optimè meritæ gratulatus est, & omnia officia detulit, quæ salvo religionis instituto præstare posset ; curam verò fœminarum suscipere sese negavit posse, plurimis gravissimisque occupationibus impeditum. At illa nihilominus instare; sanctissima veteris amicitia jura testari, postulati æquitatem obtédere: Denique ubi magis magisque obfirmatum vidit Ignatium, ad aulicas confugit artes; atque ut erat nobili nata loco , per viros principes facilè tenuit , ut Pontifex maxi-

mus Ignatio munus idipsum, quod recusat, injungeret. Sed ea res magnum in Societatis commodum vertit, præter spem; ac nostros non solum in præsens, verum etiã in posterum à tam periculosa provincia liberavit. Etenim Ignatius, Pontificis jussu, ea procuratione suscepta, paucis diebus tantam difficultatem ac laborẽ sensit, dum querimonias mulierum audire, superstitiones evellere, inanibus & curiosis quæstionibus respondere identidem cogitur; ut penè plus ei negotij paucæ feminae, quàm Societas universa faceretur. Itaque licet Elisabethæ, pro ejus in se promeritis, gratificari admodum cuperet; tamen reputans apud se, quantum ex hujusmodi tricus detrimenti respublica pateretur, simul etiam cogitans fore, ut harum exemplo, aliæ deinceps religiosæ mulieres virginæve, idem à Societate in posterum expeterent; nequaquam ignarus quàm periculosa & suspitionibus plena sit ea consuetudo; privati officij rationem posthabere communi utilitati, ac totum hoc genus administrationis, à Societate prohibere, omni ratione constituit. Igitur adhibita (quod in omnibus gravioribus causis faciebat) præparatione diligenti, imploratoque per iteratas preces & hostias cœlesti præsidio, ad Pontificem accessit, verbisque supplicibus demonstravit,

ex onere sibi nuper imposito, quàm exiguo cum fructu, quantum laboris ac molestiæ pertulisset; ea ipsa re monitum, quàm aliena sit à Societatis instituto, ejusmodi præfectura; petere se & orare, ut non ab illis modò, sed ab omnibus in perpetuum foeminarum collegiis gubernandis, immunem Societatem esse jubeat; non defuturos aliorum ordinum idoneos homines, qui id munus libenter & cum fide obeant: sibi quidem & suis provinciam videri minimè accommodatam: neque verò æquum esse, qui sese ad omnium gentium auxilium, sine ulla regionum aut locorum exceptione, CHRISTI Vicario mancipaverint, eorum operam & industriam, non sine gravi communis rei damno, paucis regendis mulierculis implicari. Quibus rationibus ita permotus est Pontifex, ut supplicanti, omnia largè ac prolixè concesserit. Itaque Societati ab ejusmodi munere vacatio in perpetuum data, ejusque vacationis auctoritas testata est trinis deinde literis Apostolicis, quæ tempore procedenti magno usui fuere nostris hominibus, ad ejus generis pericula & molestias abigendas.



*Honoribus in Societatem nostram
Ignatius aditum obstruit.*

C A P. XVIII.



ATQUE iis difficultatibus perfuncta Societas, prosperum Dei beneficio cursum tenere videbatur, cum nova rursus in eam coorta tempestas est, eò quidem gravior & periculosior, quò in speciem lenior blandiorque. In iis, qui per Germaniam variis locis Domini vineam excolebant, Claudius Jaius, è primis Patribus unus, virtutem & sanctitatem suam, cum genti universæ, tum Romanorum Regi Fernando, ita probaverat, ut eo Rex nullum prorsus ad curandas animas atque ad pastorale munus aptiorem existimaret. Is pro sua sapiëntia cum præclarè intelligeret, regni causam, cum causa religionis ita esse conjunctam, ut quantum de catholica religione detraheretur, tantum de obsequio multitudinis, & de imperij majestate decederet; contra sævientem eò maximè tempore Lutheranam pestem, velut unicum remedium, quàm optimos animarum pastores & Episcopos, omni diligentia con-

quirebat. Igitur vitâ functo per eos dies Tergestinorum Episcopo, quæ civitas est Istriæ, (cui tum provinciæ, quam dixi lues, propter vicinitatem Germaniæ, imminebat) circumspectis diligenter omnibus & personis & rebus, denique Ecclesiam illam Claudio Jaiio perspectæ sibi virtutis & doctrinæ viro, tradere ac demandare constituit. Sanè, ut vulgò expetitur huiusmodi Sacerdotia, minimæ timendum videbatur esse, ne delatum ultrò præsertim honorem, Claudius repudiaret: siquidem Tergestina cathedra, cum in primis ejus regionis ampla & honorifica est, tum verò (quod potissimum hodie quæri solet) vectigalibus haud sanè contemnendis instructa. Veruntamen Rex, ne quid inscio Claudio, cum Pontifice maximo ea de re transigeret; primum omnium literas ad ipsum Claudium dat, Tridenti, per id tempus rei Christianæ causâ commorantem, ac nihil cogitantem minùs; quarum erat sententia, Tergestinum gregem, orbem spirituali Custode, circumquaque frementibus lupis, in maximo versari discrimine; dignam esse vigiliam charitate Jaij, studioque hominum servandorum; petere se, ut si à Pontifice maximo, id ei muneris onerisve imponatur, ne recuset subire, & populo utilem, & sibi gratam operam vehementer fo-

re. Percussus inopinata re Jaius, primò e-
 horruit; non quòd detestandum quid sibi
 oblatum putaret; sed quòd Episcopus, quàm
 curam gerit animarum, divinam penè vir-
 tutem & omnibus numeris absolutam po-
 stulet sapientiam: quàm gradus honoris est
 (& quidem ad continendam in officio mul-
 titudinem ferme cum splendore opibusque
 conjunctus) à spiritu humilitatis, ac pau-
 pertatis, quem profitetur Societas J E S U,
 vehementer abhorreat. Deinde, ut sese ex
 pavore collegit; fusus in preces lacrymas-
 que, etiam atque etiam obtestatus est
 Deum, ut ab se tantum discrimen averte-
 ret; neu se primùm quasi janitorem, speciosos
 titulos honoresve in Societatem, ad id tē-
 pus intactam inveni sineret; tum rescripsit
 ad Regem, multis rationibus ei suadens,
 ut tam honorifico judicio decoraret alium
 digniorem; longè imparem suam imbecil-
 litatem esse, oneri: ac demùm ita conclusit
 epistolam, ut omissis ambagibus, quod pe-
 tebatur, præcisè negaret. Quæ res jam satis
 incensum studium Regis, multò vehemen-
 tiùs inflamnavit, quòd ita statueret, tan-
 tam in summa virtute & eruditione mode-
 stiam, nequaquam privatæ vitæ quasi tene-
 bris delitescere, sed in editissimo fastigio,
 ut luceret omnibus, collocari oportere. Er-
 go cum ex literis Claudij diffideret, ullis

aut precibus aut promissis flecti ejus animum posse ; per Pontificem ipsum, inconsulto ultrà Claudio, rem conficere statuit.

Ad eum igitur quàm accuratissimè scripsit, quanto in periculo Tergestina civitas versaretur Episcopo destituta : se quidem pro sua parte diligenter circumspexisse, quem nominaret aptum ei muneri, nec ullum invenisse aptiorem Claudio Jaio, Societatis Jesu Presbytero, cujus innocentiam doctrinamque exquisitam, plurimis rebus esset expertus ; sed frustrà per litteras tentasse ejus animum, in studio Christianæ humilitatis ita defixum, & ab honorum insignibus admittendis usque adeò alienum, ut nisi pro potestate cogatur, nulla sit spes laborantis illius Ecclesiæ tam opportuno præsidio sublevandæ ; Proinde suppliciter se etiam atque etiam orare & obsecrare, ut Claudium pro imperio jubeat, delata sibi gubernacula munusque sine tergiversatione recipere, quoniam ut quisque de se ipse minimè alta sentiat, ac proinde studiosè lateat, ita Ecclesiasticis functionibus & ipso Episcopatu dignissimus sit. Hæc igitur, & alia id genus multa, ad Pontificem, & simul Didaco Lasso mandat oratori suo, ut id ipsum & cum Pontifice, & cum quibus opus fuerit, quàm diligentissimè curet, prorsusque conficiat. Ejus rei fama cum
per

per aulicos quosdam ad Ignatium pervenisset ; primò haud ita sanè commotus est : nam & Claudij constantiæ & Pontificis æquitati ac sapientiæ confidebat , & ejusmodi petitiones jam antè Societas , Deo adjutore , non semel eluserat. Veruatamen, ut quid esset rei clariùs cerneret ; continuò Bernardinum Maffeiū (qui tunc erat Pōtifici ab epistolis, ac postea in Cardinalium numerum cooptatus est) ultrò convenit , ac totā de re familiariter promicitia sciscitatur. Ille haud sanè gravatè ipsam epistolam Regis ostendit, ad Pontificem summis cum Claudij laudibus & vehementi contentione perscriptam ; quā lectā confestim Ignatius eadem de causa, ad Regis oratorem Didacum Lassum adit, qui litteras item ad se propriè datas demonstrat, & quidem magna ex parte ipsius Regis chirographo, etiam atque etiam postulantis mandatisque, det operam, ut Episcopatus ab se in Claudium collati , primo quoque tempore, auctor fiat Pontifex maximus , ejusque auctoritatis diploma ritè confectum ad se transmittat. His cognitis Ignatius , ubi tam iniquo loco rem vidit esse, pertimuit ; sed ita, uti nequaquam animo caderet : ac licèt se talibus adversariis longè imparem sciret esse , tamen fiducia numinis , omni ope sibi contra vi-

tendum existimavit. Atque in præsentia Didaco suadere conatur, ut ab actione, rationi Societatis tam aliena desistat ipse, & simul ab ea mente Regem aliquo pacto deducat. Quibus verbis cum nihil proficeret, quin potiùs ab homine rideretur; domum regressus, quàm intentissimas preces & sacrificia de more suis indixit: deinde nactus opportunitatem, facilemque aditum, Pontifici demonstravit quanto res ea damno esset futura & Societati nostræ privatim, & Ecclesiæ universæ communiter. Non quòd dignitatis gradus ac tituli ipsi per se mali atque improbandi sint, quippe ad Ecclesiam regendam & ordinum discrimina retinenda inducti divinitus: sed quòd & perfectos viros requirant, quales pauci admodum omnibus sæculis extiterint, & insuper ab hujus minimæ Societatis instituto valde alieni esse videantur. Etenim quibus artibus, quoque spiritu excitata & conflata sit, eodem profecto alendam & cōservandam esse, non amplitudinis & splendoris nimirum, sed humilitatis & parcimonix. Quod si aditus in Societatem honoribus pateat; multum utique de vera charitate imminutum iri, quæ nihil omnino habet in vita propositum, nisi unius gloriam Dei. Nam (ut sunt hominum ingenia) & complures fortasse

ad hanc religionem accessuros, opum cupiditate magis, quam divini obsequij studio: & qui nuper adscripti sint, magnitudine laboris, & disciplinæ asperitate defatigatos, ut primum præsentis præmij cōmodum affulserit, mutato repente cursu, novæ spei valificaturos. Atque ut maximè in officio cuncti persistant; tamen nisi præsentij jacturæ eatur obviam, sine dubio Societati exitialem (quod Deus averteret) exitum imminere. Id adeo vel inde facile perspicui posse, quod paucis illis annis, quatuor viris ex ea familia præcipuis, totidem Episcopatus delati sint; quos nisi fortiter ab sese Patrum virtus & constantia rejecisset, videlicet alio deinceps atque alio dilabente, brevi miseram Societatem ipsis luminibus carituram fuisse. Atque hæc, quod privatim ad conservationem ipsius Religionis attinet. Jam, si communem spectemus utilitatem, nemini dubium esse, quantum ex ea re detrimenti, res publica perceptura sit. Nihil enim omnibus ætatibus æque deplorandum fuisse, atque in tanta messis copia, tantam operarum inopiam: atque ex ea ipsa paucitate, qui unicuique agro addicti affixique sint, longè minùs utique perficere, quàm qui Apostolico ritu soluti ac liberi, omnes Ecclesias pervagentur, ad eamque potissimum rei-

publicæ Christianæ partem sublevandam accurrant, quam maximè laborare cognoverint. Præterea, ad faciendam populis fidem, & animos permovendos, nihil esse efficacius vitæ ac morum exemplo. Itaque adhuc Societatem (absit verbo invidia) Ecclesiæ non mediocriter profuisse, propterea quod minimè ab ejus dictis facta dissenserint; nunc autem, si ad id fastigium extollantur Patres, quomodo fieri posset, ut apud multitudinem insciam arcanorum, ambitionis ac levitatis crimen effugiant? qua porrò fronte, quo vultu, repente aucti ac decorati ipsi honorum insignibus, de imitatione CHRISTI, de fugienda gloria, de voluntario sui contemptu ac submissione verba facturi sint? Hisce, aliisque de causis, Pontificem maximum etiam atque etiam obtestari atque obsecrare, ut quam Societatem primus auctoritate & benignitate sua confirmaverit, ornaverit, auxerit; eandem ab omni suspitione incommoda velit esse liberam, suæque in eam beneficia tam periculoso præsertim tempore tueatur. Audit Ignatium Pontifex perbenigne, ut solebat; sic tamen, ut integritatem hominis admiraretur potius, quàm consilium approbaret. Itaque collaudatâ initio, ipsius fide ac probitate, sensim flexit orationem; & contra senten-


tiam Ignatii, cum alia multa differuit, tum verò ex veteri oraculo : *Cor* , inquit, *Regis in manu Domini* : quasi diceret , in Claudio eligendo , tantam Fernandi Regis contentionem plane divinitus extitisse; ac proinde clariorem esse Numinis voluntatem, quàm ut obsisti ultrà oporteret. Quæ cum Ignatius graviter ac dolenter accipere videretur ; Pontifex , qua erat lenitate , ne Dei famulum, tristem ac mœrentem ab se dimitteret , ad extremum jubet illum super ea re ampliùs consultare , precesque ad Dominum fundere ; se quoque idem esse facturum. Interea Didacus Orator negotium urgebat acerrimè. Jamque instabat dies, quo die in Senatu de Tergestina Ecclesia referendum erat. Quare Ignatiùs cognitâ , confestim Cardinalium penè omnium domos, quarum erant multæ longis intervallis inter se disjunctæ, ingenti diurno & nocturno labore circumiit, singulis eadem illa fere proponens , quæ paulò antè Pontifici maximo. Sed videlicet eorum mentes jam ante occupaverat Orator. Itaque mirè obfirmatos offendit in Claudij electione approbanda ; partim quòd tanti Regis voluntati faverent; partim etiam quòd Vigiles & Custodes, Claudij maximè similes , tam formidoloso tempore, in Ecclesiæ propugnacu-

lis atque speculis ipsimet collocandos putarent. Hac quoque spe dejectus Ignatius, unum reliquum videbat esse remedium, si Fernandum ipsum Regem à suscepto consilio per litteras avocaret, quem pro ipsius pietate virtuteque, ita in se suosque animatum noverat, ut minimè dubitaret, quin cognita re, salutem Societatis, Tergestinarum rationibus antelaturus esset. Sed ne illa quidem ratio habebat exitum: quippe insequenti luce, de Tergestina cathedra Senatus erat futurus. Ignatius igitur exclusus angustiis temporis, nunquam intermissis ad Deum precibus, quasi ad extremum in rebus humanis perfugium, sese contulit ad Margaritam Austriacam Cæsaris filiam, de qua suprà dictum est, foeminam, per id maximè tempus, gratia & opibus florentissimam. Hanc pro spirituali necessitudine, (erat enim illi à confessionibus) edoctam, quanto in periculo Societas esset, infinitis precibus obsecrat, uti Societatis causam in se recipiat, & imminentem relationem, auctoritate suâ interpositâ tandiù differat, quoad Regem ipse per epistolam alloquatur, & ab eo responsum accipiat. Fecit illa quod rogabatur, & illicò datis ad Pontificem codicillis, optatam dilationem impetravit. Ea demum res, aliquid laxamenti dedit Ignatio: etenim spa-

tium nactus , ad Regem scripsit literas deprecationis & querimoniarum plenas ; illum etiam atque etiam per Christum obsecrans , ne Societatem nuper ad gloriam Dei tanto labore conflata , sine causa perditum iret ; non ita de ipsius Majestate , regnisque , & se & socios esse meritos , ut ab eo , nulla eorum existimationis , famæ , salutis denique ratio habenda esset : Non defore idoneos viros qui rem Tergestinam capeffant ; sineret modò sui ordinis homines , quâ cœpissent paupertatis & humilitatis viâ , ad Christi gloriam & salutem animorum , sine offensione pergere : Id si (ut sperabat) permetteret ; sese & socios immortalis beneficio Regi obstrictos fore , precesque pro ipsius Majestate saluteque nunquam intermissuros. Hisce , aliisque id genus , incensis officij religionis rationibus precibusque minimè restitit Rex : & quanquam invitus , tamen suis rationibus , amicorum utilitati posthabitis , quod vix fieri videbatur posse , per epistolam jussit Oratorem suum , ab instituta vel potiùs penè confecta actione desistere. Quæ res vulgata , & Pontificem maximum facilè in Ignatij sententiam adduxit , & Ignatium ipsum ac Socios affecit ingenti lætitia. Itaque & in posterum supplicationes decietæ , & in præsentia solemniter

hymnus, in gratiarum actionem publicè
 persolutus est. Ac pari deinde constantiâ,
 sese Ignatius idem opposuit, cum nostris
 hominibus pingua Sacerdotia, quibusdam
 verò Cardinalatus etiam deferretur, ac no-
 minatim Francisco Borgiæ, Hispano dy-
 nastæ, qui amplissimis in eo regno per-
 functus honoribus, divino instinctu, post
 uxoris obitum, rebus mortalibus valere
 iussis, & sponte deposito Gandiensi Duca-
 tu, magnâ hominum admiratione, Societa-
 ti se addixerat. Quanquam in Æthiopica
 legatione, quæ postmodum Lusitaniæ Re-
 gis Rogatu, à summo Pontifice nostris
 injuncta est, cum ad eam functionem, Ec-
 clesiasticæ dignitatis insignia & honorum
 rituli necessariò quærentur, imperanti
 pro potestate Vicario Dei, resisti non po-
 tuit: Præsertim cum periti rerum æstima-
 tores argutè conjicerent, novam hanc ma-
 num, non ad opes & copias, verum ad la-
 bores & aperta vitæ pericula destinari.






Confirmatur à Julio III. Societas.

C A P. XIX. !



OST hęc, Paulus III. Pontifex maximus, senio curisque confectus, è vita migravit; comitiaque novo creando Pontifici, in magna studiorum ac voluntatum varietate, in aliquot menses extracta sunt. Quo ipso tempore cùm Urbs, ut in diuturno interregno, annonæ difficultate vehementissimè laboraret, nostrisque numero in dies auctis, extrema fames adesse videretur, Ignatius, cùm aliorum, tum præcipuè sacri Collegij Cardinalium eximiam in se suosque benignitatem expertus est: quippe in summis occupationibus, Patres Augustos, pia nostrorum hominum recordatio subiit: communique consilio ad eorum inopiam sublevandam, non levis pecuniæ summa ex ipso Conclavi transmissa est: enixè in primis favente atque adjuvante Rodulpho Pio Carpenfi, quem Ignatius jam antè sibi, Sociisque, Patronum ac Protectorem, ut appellant, è summi Pontificis auctoritate delegerat. Ac rebus diu multumque agitatis,

Pontifex denique declaratur Julius eo nomine tertius, qui, quòd in Synodo Tridentina Legatus, Fabrum, Lainem, & Salmeronem Theologos Apostolicos familiariter noverat, multaque tum ex iis, tum ex aliis de Societatis instituto didicerat; Ignatio supplicanti multa in Societatis incrementum ac rem, admodum liberaliter tribuit; nec enim solùm prioris Pontificis de Ordine nostro judicia & acta, firma rataque voluit esse; verùm etiam eundem Ordinem novis insuper ipse testimoniis atque decretis ornavit. Cujus rei, publica diplomata exstant verbis amplissimis.



*Magistratu sese abdicare conatur
Ignatius.*

C A P. XX.

ISCE rebus ita peractis, cùm satis in præsentia, communi rei consultum esse videretur; Ignatius, qua erat humilitate, vigiliam suam alteri tradere, seque Generalatu omnino abdicare constituit. Igitur Patribus, quotquot communis rei commodo potuit, Romam evocatis; cùm in consilium convenissent, ne, ut olim, sibi fortè coram dicenti re-

clamaretur, per epistolam desertis verbis exposuit, se, qui vitia nosset sua, & initio invitum, atque adeò coactum, Societatis gubernacula recepisse, & nunc graviore etiam valetudine ætateque, multo minùs idoneum esse tanto muneri, proinde per Christi Domini sanguinem petere atque obtestari sese, ut sine ullo sui respectu, communi utilitati prospiciant, & quanprimùm sibi sufficiant virum & animo & corpore firmiorem. Id, quò liberiùs faciat, inquit: Ego in nomine Patris, & Filij, & Spiritus sancti, unius Dei ac Creatoris mei, depono Generalatum simpliciter & absolutè, meque abdico hoc munere, privoque: & omnibus animæ meæ viribus obsecro, tum Professos omnes, tum si quos professi adhibere ad hanc deliberationem volent, ut huic meo tam justo desiderio faveant, piamque oblationem libenter admittant. Hâc epistolâ recitatâ, magnus animorum motus est factus, cum partim viri modestiam ac submissionem satis admirari non possent, partim etiam pro se quisque metueret, ne quis alius fortassis Ignatij voluntati assentiretur. Verùm, ut ad suffragia ventum est, idem planè consensus omnium in eo retinendo exstitit, qui olim fuerat in eligendo: & enixè petenti, præcisè negatum. Denique per internun-

tium iussus Ignatius alia omnia cogitare: etenim se quidlibet potius, quàm alium gubernatorem ipso vivente passuros. Atque hæc communiter: dimisso deinde cœtu, privatim singuli cum eodem expostulare, quòd ab incœptis desistere, quòd vix dum constitutam Societatem, omnique custodia egentem, quasi durus pater tene-ram adhuc filiam deferere conaretur. Pergeret porrò, & publicam rem ordinaret, legesque perscriberet: Deum, cujus manus alligata non sit, in posterum quoque, sicut antea, piis ipsius conatibus adfuturum. Itaque Ignatius, quamquam invitus, & religiosæ quietis vitæque privatæ avidissimus, tamen ne minùs dicto audiens videretur esse, Patrum auctoritati ac precibus denique cessit, seque ad institutum opus legum scribendarum, quàm diligentissimè ætulit. Ac primùm, unius Dei gloriâ saluteque animorum sibi propositâ, Societatem universam, quò faciliùs administratio tota constaret, certas divisit in classes: providitque, quantum ingenio & cogitatione assequi valuit, cum ut cæteris vitiis, tum verò ut ambitioni & avaritiæ, quæ duæ perniciosissimæ sunt mortaliũ pestes, omnino obstrueretur aditus: veræque humilitati & paupertati, quàm maximus & maximè diuturnus honos ab omnibus ha-

beretur. Ad hæc , rationem præpositi Generalis creandi , necnon privatam ac publicam disciplinam , quæque alia cœtibus hominum regendis usui solent esse , præscripsit. Nec mediò majora , sed minora quoque ministeria curationesve , certis legibus ac præceptis , quàm accuratissimè persecutus est. Has deinde leges , quamquam longo tempore, summaque cura elaboratas & conditas, non tamen continuò pertulit , sed per idoneos homines tota Societate promulganda , curavit , ut usu ipso & magistrâ rerum experienciâ probaretur, satisne ad Societatis propositum, atque ad Apostolicam instituti formulam convenirent. Neque antè ratas fixasque voluit esse , quàm in proximo conventu Patrum totâ re agitatâ & planè perspectâ, legitimè sanciretur : Iisdemque Patribus deinceps addendi, moderandi , immutandi, ac demendi , prout expedire videretur in Domino , plenum jus ac liberam potestatem reliquit.

✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠

*Societati in Hispania valde laboranti
succurrit.*

C A P. X X I.


PER idem tempus Societas, videlicet ne lætiore successu intumesceret, vel ad otium ignaviamque delaberetur, variis in Europæ regionibus divino permissu vehementer exercebatur, idque partim ab invidis & obtrectatoribus, partim etiam ab iis, qui temporibus ita periculosis, tam insolitam concionum frequentiam, tam assiduam Sacramentorum administrationem, & reliqua instituti nostri munera, genusque doctrinæ suspectum haberent. Quo in numero, in aliis provinciis alij, sed in Hispania, vel accerrimus nostrorum insectator exstitit Joannes Siliceus Archiepiscopus Toletanus. Is cum à cæteris Societatis nostræ ministeriis valdè abhorreret, tum Exercitiorum Spirituum, quibus nostri eo tempore vel maxime in erudiendis hominibus utebantur, nomen ipsum pati non poterat. Compluti verò, in sua diœcesi, piorum civium liberalitate Collegium Societatis J E S U

repentè excitatum, quò academia illa penè tota conflueret, ita ægrè ferebat, ut de nostris è sua ditione pellendis, toto animo dies noctesque cogitaret. Sed cùm in ipsos palàm impetum facere vereretur, partim spectatâ vitæ innocentîâ, partim etiam virorum principum gratiâ, & summi (quod caput est) Pontificis auctoritate subnixos; iracundiæ suæ fulmina in populares suos, familiares nostros, apertè contorquet. Ac primùm, quòd è suo clero complures nostra disciplina ac meditationibus imbutos esse cognoverat, edicto minaci, juris in Ecclesia Toletana dicundæ potestate privat Sacerdotes eos, qui è nostra formula spiritualibus exercitationibus operam dedissent; deinde, præsentî anathematis pœnâ propositâ, vetat in academia Complutensi omninò quenquam à nostris hominibus Ecclesiæ Sacramenta suscipere. Quæ res, utpote insigni infamiâ, varios illico rumores hominum, Hispaniâ penè totâ commovit: cùm alij nostrorum acta, mores, instituta defenderent; alij contrà, non sine gravi aliqua certa que ratione tantum Antistitem ita de Societate statuisse disputarent. Nostri, quamvis Dei clementia & conscientîæ testimonio freti, re tamen tam atroci, tamque inopinata perculsi, angebantur animo; neque tam

ignominiâ suâ , quàm Ecclesiæ damno permoveantur , quod ex tanta hominum alienatione, tantisque calumniis imminere necessariò videbatur. Itaque cùm obsecrationibus, & sacrificiis, & voluntaria corporum castigatione , cœleste Numen , de more propitiassent; per communes amicos Archiepiscopũ docent, nihil ab se vel contra Ecclesiæ rem, vel contra ipsius Archiepiscopi dignitatem esse commissum, cur in rebus divinis occupati , & nihil nisi Dei gloriam & proximorum salutem ex Apostolica auctoritate quærentes, tantis injuriis affici, præsertim indictâ causâ, debuerint. Si quid secus ab inimicis, ad eum delatum sit, se ad purganda crimina, atque ad omnem satisfactionem in Domino paratos esse ; tantum ab eo suppliciter petere, uti conceptam iram, ad causam usque cognitam, pro sua sapientia ac pietate sustineat. Cùm ille nihil idcirco de acerbitate remitteret, satisque appareret, nostri nominis odium, altius in ejus animo insedisse, quàm ut evelli aut mitigari ulla ratione posset ; Ignatij voluntatem atque consilium per literas quàm primùm exquirunt. Ille , circumspectis rebus omnibus, Deumque per se, suosque enixè præcatus, ut ea res ad ipsius gloriam , salutemque animarum, bene ac feliciter eveniret; sine ulla dubita-

tione, si Archiepiscopus incepto perfis-
 stat, jubet Nostros, ad consilium Regium
 provocare; literas Apostolicas proferre:
 Societatis causam cum Christi causa con-
 junctam æquè moderatè ac fortiter agere.
 Ipse interea ad Pontificem adit supplex,
 Archiepiscopi factum exponit, summi tri-
 bunalis opem & auctoritatem implorat,
 sine ulla tamen graviore querimonia, vel
 exaggeratione verborum. Ac Nostri quo-
 que in Hispania, ex Ignatii præcepto, rem
 ad consilium deferunt, Pontificia diploma-
 ra, & jura Societatis legitima ostendunt,
 obseptum sibi aditum ad proximos adju-
 vandos exposcunt. Quæ cum nullâ ipso-
 rum culpâ ab Archiepiscopo acta esse con-
 staret, eum denique exitum habuit res, ut
 & Regij consilij decreto, & acri Pontifi-
 cis objurgatione, Archiepiscopus edicta
 sua revocare, nostrosque omni molestia
 atque ignominia liberare coactus sit. Quæ
 res lætitiâ bonis omnibus attulit eò ma-
 jorem, quò magis de nostra existimatione
 ac fama solliciti fuerant. Atque haud ita
 multò post, Archiepiscopo vitâ functo,
 Nostri à Toletana civitate benignè invi-
 tati, & in iis ipsis ædibus publicè collocati
 sunt, quas idem Archiepiscopus paulò
 antè, clericis quibusdam ædificaverat, ut
 ab iis qui Divinam Providentiam, ex re-

rum humanarum eventis observant, non sine causa animadversum fuerit, omnes tanti Præsulis in Societatem impetus & conatus, eò denique recidisse, ut cum maximè nostros, opinionis errore deceptus, ex universa Hispania pulsos cuperet, tunc ipse, in sua Toletana metropoli, domum illis exstrueret, ornaretque. Ejusmodi fuit igitur Hispaniensis illius procellæ transitus. Ac pari felicitate in aliis quoque provinciis coortæ in nos tempestates, Ignatii lenitate, prudentiaque, sedatæ sunt: ac Dei beneficio ubique ferè Societas, majora in dies incrementa capiebat.



De Julij III. Obitu, & de Marcelli II. in Ignatium nostrosque benevolentia.


C A P. X I I.



INTER hæc Julius, anno Pontificatus quinto demoritur; cui Marcellus Cervinus Politianus, ingenti bonorum omnium gaudio suffectus est: Quidquid enim erat spei de publicis rebus, id penè totum, ejus Pontificatus annis vulgò desponderant. Ad hunc Ignatius pro veteri familiaritate, cum

adorandi & gratulandi causa venisset; ar-
 ctè amplexatus hominem Pontifex, & sua-
 vissimè exosculatus, multa cum eo inam-
 bulans, de fidei Christianæ propagatione,
 deque restituenda Ecclesiastica disciplina
 seridò contulit: atque ob id ipsum, nonnullos
 ab eo petiit viros, quos haberet apud se
 consilij causâ. Cæterùm in primis dilexit
 Jacobum Lainem & Martinum Olavium,
 quorum videlicet utriusque virtutem ac
 sapientiam optimè noverat: Nam de Fran-
 cisco Xaverio, cujus fama rebusque gestis
 valde permovebatur, jam antè exoraverat,
 ut illum omnino Romam ex India revoca-
 ret: quòd tanti viri videndi, ruendique in
 ejus amplexum miro quodam desiderio te-
 neretur: Quinetiam nostros, quotquot ea
 tempestate Romæ versabatur, ad se in pa-
 latium adduci jusserrat: quòd hæc copio-
 las recensere, & singulos coràm, quasi bo-
 nus Imperator, milites vellet inspicere: De-
 nique multis de nostra Societate verbis ul-
 trò citròque habitis: Tu bellatores, inquit
 Pontifex, confice; nos utemur. Cùm ab eo
 congressu, aliisque deinde colloquiis, læ-
 tus admodum discessisset Ignatius, & op-
 tima spe Societatem impleisset, brevi ea læ-
 titia cunctis evanuit. Siquidem Marcellus
 altero & vicesimo die quàm Pontifex de-
 claratus fuerat, febris extinctus, ingenti

228 S. IGNATII VITÆ
omnium luctu Christianam rempublicam
orbam ac debilitatam reliquit.



Ignatij obitus.

C A P. XXIII.

SUCCESSIT Marcello Paulus eo
nomine quartus, qui cum propter
nonnullas interpositas offensiones, acerrimus
nostri Ordinis inimicus fore putaretur,
hominum opinionem longà fefellit.
Nam & in Ignatium ipsum, cunctis ad-
mirantibus, perhonorificum sese præbuit,
& Societatem multis rebus decoravit
auxitque, & nostrorum hominum operâ
maximis in rebus Ecclesiæ, plurimum
usus est, & de fundando collegio seu aca-
demia, quam in Urbe Ignatius magno rei-
publicæ Christianæ bono instituerat, se-
riò cogitavit. Hunc Pontificem inter, &
Philippum Catholicum Regem, exorto
gravi & periculoso bello, quod brevi dein-
de compositum est; cuncta misceri, com-
pleri armatis Urbs, tympanorum ac tor-
mentorum horrifico strepitu omnia perso-
nare; pacis artibus parum admodum loci
esse. Quocirca Ignatius partæsus tempo-

rum, & Societatis rebus utcumque compositis, contemplandi studio secessit in villam, quam non longè ab ædè sanctæ Balbinæ, ad Thermas Antonianas, in usum præcipuè Romani Collegij, amicorum benignitate nuper exstruxerat. Ibi, vel tectorio novi operis malè acceptus, vel urgente jam senio, lethalem in febrem incidit; sic, ut cùm ejus intima urerentur præcordia, nullus in facie pallor, nulla in toto corpore signa mortis existerent: tantùm insolita quædam lassitudo in membris ac motu apparebat. Itaque domum relatus, in lectulo collocatur. Accersiti confestim medici, bono animo jubent nostros esse. At ille cùm sibi ultimum diem instare sentiret, mirantibus cæteris, misit qui à summo Pontifice, sibi decedenti, salutarem expiationem & indulgentiam, ritu catholico precaretur. Deinde cùm ad multam noctem de more vigilasset, quin etiam nonnulla cum domesticis in rem Collegij transigisset; sopori se dedit: itemque qui aderant, cubitum dicessere, nihil admodum periculi suspicantes. At ecce manè postridie, duo è fratribus, ejus vitæ quotidianæ administri, cubiculum visendi Patris causâ introeunt; ad lectulum sensim accedunt, ac præter omnium opinionem, vitali spiritu penè defectum offendunt,

230 S. IGNATII VITÆ

Accurritur illicò ad Socios , alij ad medicum advolant : alij interea ad refocillandas vires (ut aſſolet) juſculum porrigunt : quibus ille cùm nihil jam opus eſſe dixiſſet , Jeſum intermortuis vocibus identidem appellans , placidiſſimè efflavit animam , horâ poſt ſolis ortum primâ , feriâ ſextâ , pridie Kalendas Auguſti , anno poſt Chriſtum natum M. D. L V I. Qui verò ad Pontificem pridie ſub veſperam fuerat deſtinatus , quòd nihil tale metueret , re in proximam lucem dilata , cùm quod volebat , ſtatim impetraſſet libente Pontifice , & verbis amiciffimis Ignatium proſequente ; graviter deinde ſemet incuſans , tempori non occurrit. Deſuncti corpus tum inſpiciendi , tum exenterandi cauſa diſſectum , ſummam viri abſtinentiam & ſobrietatem liquidò comprobavit : Siquidem & ſtomachus venterque prorsùs inanis , & præ ſiccitate diuturna miè contractus apparuit ; & jecur ea ipſa de cauſa ita obduratum auidùmque , ut penè lapideſceret. Sanè Realdus Columbus , egregius ea tempeſtate Sector , qui aperiendo interfuit , in hepatis venâ , quæ Porta dicitur , lapides tres , ſeſe inveniſſe teſtatur in ſuo de Anatomia libro : ut pro miraculo non levi habitum ſit , vitalibus adeò affectis , ac propemodum

exuistis , hominem tandiu vivere potuisse , præsertim hilari semper eodemque vultu exequentem Præpositi Generalis officia & munera. Mortuus est autem anno ætatis quinto & sexagesimo , suæ conversionis ferme trigesimo quinto , confirmatæ verò Societatis sextodecimo : Quam ille tam exiguo temporis intervallo , tam longè latèque propagatam reliquit ; ut jam tum ab ipso constitutæ numerarentur provinciæ duodecim , & in iis varia nostrorum domicilia fere centum. Vulgatâ ejus morte , ingens confestim hominum concursus visendi causa , domum est factus , atque hi manus , hi pedes certatim exosculari : alij rosaria , quæ vocantur , applicare corpori , multi etiam pilei vestiumve , quibus uti consueverat , frustulum aliquod enixè rogare : quibus tamen modestiæ gratiâ nihil à nostris est datum. Corpus in eodem cubiculo , ubi expiraverat , biduo fermè servatum , Sabbatho sub vesperam inclusum arcæ , post exequias mirâ populi frequentiâ celebratas , in templo nostro ad dextrum latus aræ maximæ humatum est. Ac statim præsentem opem ex Ignatij patrocinio Nostri sensere. Non enim , ut multi putarant , orba tali parente Societas , mœrori se dedit , aut concidit : quin imò ste-

232 S.IGNATII VITÆ
têre animis Patres ; perque omnes ordi-
nēs insolita quædam suavitas spiritus &
mentium vigor , ad subeundos CHRISTI
causa labores , & cœpta strenuè promo-
venda , pervasit.

LIBRI SECUNDI FINIS.



SANCTI



SANCTI IGNATII VITÆ

LIBER TERTIUS.

HActenus Ignatij toto vitæ cursu proposito, nunc præcipua quædam de ipsius factis, dictis, ac moribus, & quidem quò magis in promptu sint, per species exequemur: Ac primum de Studio precandi meditandique, qua laude in primis Ignatius floruit.

*De Orandi assiduitate, & Studio
Pietatis.*

CAPUT I.

INITIO conversionis, ut antè diximus, precandi contemplandique causa, magnam sibi vim intulit, partim in rerum caducarum, quibus assueverat, vitanda recordatione; paz-

tim etiam in scrupulorum molestiis abigendis. Procedente deinde tempore, cum magis in dies à contagione corporis, Deo adjutore, se abstraxisset; tantam ejus generis facultatem adeptus est, non modò ut è cœli siderumque aspectu, quo maximè capiebatur, sed etiam ut ex intuitu floris, aut herbæ, aut levissimæ cujuslibet rei, confestim in Dei cogitationem amoremque suavissimè raperetur. Idque nostris hominibus capiebat esse familiarissimum, ut in singulis creatis rebus, quoad ejus fieri posset, Creatoris potentiam, sapientiam, bonitatem agnoscerent. Eosdem monebat, ut contra quotidianas Dæmonum insidias, ne circumventi repentè in fraudem inducerentur; vel instructo, quod aiunt, agmine semper incederent, vel certè dissipatis in varias curas & negotia viribus, animi tamquam receptui canerent, statis horis diei; & in semetipsi descenderent, suâque omnia dicta, facta, cogitata, coram Deo quàm diligentissimè reputarent, adhibito etiam monitore, si opus esset, vel memoriæ, vel etiam notitiæ causâ: denique omnia probè contemplati, contra id vitium maximè pugnam capefferent, quo vitio se præcipuè urgeri & laborare sentirent; nec antè desisterent, quàm Deo duce debellatum esset. Sanè ipse, quan-

quam se habebat semper in potestate, & ex divi Bernardi præcepto, non se rebus tradere, sed commodare consueverat; tamen, quâ erat diligentia, in singulas horas ultro inquirebat in se: idque, propter diuturnam exercitationem, nullo negotio; magisque ac magis in spiritu proficere nitebatur, diem cum die, ut supra diximus, hebdomadam cum hebdomada conferens: qui cursus ad candorem animi ac perfectionem certissimus est; neque id solum, sed etiam statis quotidie temporibus, crepto ex summis occupationibus otio, contemplationi vacabat: quam ad rem aliquoties à domesticis clam observatus est, hoc maximè modo se comparans: Ut enim superiorem ascenderat ædium partem, unde liber esset prospectus ad sidera; stabat aliquantisper oculis in cœlum defixis; tum provolutus in genua, totius hujusce pulchritudinis Creditorem suppliciter adorabat; deinde propter imbecillitatem, humili scabello simul atque consedisset, continuò ex oculis uberes lacrymarum rivuli profluebant; idque nullo prorsus vel singultu vel strepitu. Atque in hunc ferè modum, æquè animo & corpore immotus, excipiebat divini luminis radios, ac Patri cœlesti mira quadam spiritus dulcedine jungebatur. Neque verò ad bea-

tos hosce congressus, tantummodo sub
 orationis horam componebat ille sese, ve-
 rum in perpetua quadam erat vigilia, con-
 tra omnes rerum mortalium illecebras, &
 otiosam mentis evagationem; nec minùs
 accuratè animum ab omni labe tuebatur,
 quàm qui pretiosis ornati vestibus, viâ lu-
 tulentâ coguntur incedere: Intenta erat
 custodia sensuum, quotidiana cujusslibet
 omissionis confessio, jugis recordatio be-
 neficiorum Dei, in aliorum factis dictis-
 que interpretandis nulla temeritas; deni-
 que summâ observabat curâ, quicquid
 ad Christi gratiam vel tuendam vel augen-
 dam quoquo modo pertinere intelligeret.
 Mortalium rerum curas, ac præcipuè quæ
 ad affines cognatôsve pertinerent, omnino
 refûgit, illud Apostoli dictum reputans
 apud se: *Nemo militans Deo implicat se
 negotiis secularibus.* Erat ei Proneptis ex
 fratre, virgo, quæ deinde Joanni Borgiæ
 nupsit, hodie Philippi Regis apud Cæsà-
 rem Legato; de hac in matrimonio collo-
 canda cum ad eum subinde referretur; to-
 tam ille rem semper ad cognatôs rejecit,
 nec adduci unquam potuit, ut vel mini-
 mam ejus negotij partē attingeret. Oranti
 aliquando per hyemem clauso cubiculo,
 allatas è Guipuzcoa litteras, Janitor festi-
 nè reddidit, ratus gratissimas fore, quòd ni-

mirum longo & locorum & temporum intervallo afferrentur; at ille fasciculum, ut erat ligatus, illico in ignem abjecit, re ipsa janitorem admonens, qui sese cœlesti militiæ addixerit, huic esse mortalia negligenda. Peregrinis hominibus, conditionem ipso interprete (quod multum apud Principes, auctoritate valeret) in aula quærentibus, negabat sibi nisi cum summi Regis aula rem esse: ad eam si aditum optarent, daturum se operam, quantum labore ac precibus assequi posset, ut essent in intimis Regis amicis ac familiaribus; quo responso vulgato, minus multi jam in eo genere, molestiam illi exhibebant. Nihil majoris momenti aggrediebatur unquam, nisi attentè consulto ac propitiato Deo; nec ullum quamvis leve religionis obibat officium, quin ejus animi ardor ex toto corporis habitu, ac præsertim ex fronte atque oculis, emisaret; ex quo facilè existimari potest, qualem ille se in horaria precatatione psalmisque, & in sacrificio Missæ præstiterit. Sanè, cum initio sacerdotij, in medio Lateranensi templo, Christi natalitia celebraret, ad Aram sacris Apostolorum Petri, Pauli, & Andreæ reliquiis inclytam, tantâ est repentè spiritus dulcedine delibutus, ut inter divinam rem peragendam lacrymas tenere nulla unquam ratione potuerit. Quo

iam insolito spectaculo commotus, è circumfusa multitudine quidam, ac rem longè secùs interpretatus, Francisco deinde Strata, Ignatij administro in aurem insusurrans; Facinorosum nempe virum, inquit, sacerdotem istum tuum, & omnibus flagitiis coopertum, qui conscientiaë stimulis agitur, crimina sua toto penè sacro defleverit. Visionum præterea extat libellus ac luminum, quæ illi ferme sacrificanti obvenire, quo maximè tempore Societatem ordinabat: quas visiones ipsemet pietatis & memoriae causâ in ephemeridem retulit. Eum libellum qui attentius legat, clarè perspiciat, qua præparatione, quo spiritu ad Sacramentum altaris accedere consueverit. Septem etiam Urbis templa, & religione & Pontificum indulgentiis celeberrima, certis anni temporibus diligenter & castè visebat pedes, & quidem per hyemem lacernatus, aut sine mantelo; nec ulla corporis lassitudine, aut cæteros exemplo suo destitui, aut se tantorum bonorum communione fraudari patiebatur. Piacularia verò grana quæ dicuntur, & cereas Agni coelestis effigies, pietasque Sanctorum icunculas, & alia id genus, quæ ab impiis iiridentur, ita studiosè tuebatur, & charas habebat, ut in ejus scrinio post mortem nihil ferè aliud apparuerit. Pro Eccle-

fra catholica , ac nominatim pro Christianis Regibus atque Principibus , quotidie ardentem orabat; pro summo vero Pontifice numquam sine uberrimis lachrymis. Et quoniam denuò lachrymarum incidit mentio ; non omittenda videtur hoc loco res memoratu digna. In cæteris ornamentis ac beneficiis , donum etiam lachrymarum Ignatius à Christo Domino acceperat, sic, ut in singulas preces illico fletus erumperet ; qua consuetudine eò denique adductus est , ut propter acrimoniam humoris paulatim exesa luminis vi , aciem oculorum penè amiserit ; hâc ille jacturâ, quòd ad ipsum privatim attinebat, non sanè movebatur ; quin imo triumphabat, se in obsequio Christi oculos perdere. Sed quoniam id fieri sine magno communis rei detrimento non poterat ; suorum præsertim accedente impulsu , precari Dominum institit, ut sibi liceret interdùm à lachrymis temperare ; nec frustrâ , si quidem ex eo tempore tantum in lachrymas jus & arbitrium obtinuit , ut earum quasi habenas, prout veller , adduceret idem atque remitteret. Quæ res cuiquam fortasse veritatis fidem excedere videatur : sed nobis, utique in tam recenti memoria , mentiendi causa non est.

✠✠✠ ✠✠✠ ✠✠✠ ✠✠✠ ✠✠✠ ✠✠✠ :: ✠✠✠ ✠✠✠ ✠✠✠

*Quod ejus fuerit de perfectione
judicium.*


C A P. I I.



Alicet precationi usque adeò de-
ditus esset, tamen eo studio, se vel
à publica re administranda, vel à
charitatis cæterarumque virtutum officiis
minimè patiebatur abduci; Et quanquam
certum unicuique spatium temporis quo-
tidie necessarium esse dicebat ad se colligendum,
virésque divinitus impetrandas;
tamen eos non ita laudabat, qui dulcedine
solitudinis & divinæ familiaritatis illecti,
in arenam descendere, & sua primùm vi-
tia evellere, deinde etiam proximos adju-
vare negligenter: Quin imo, pluribus do-
ctus experimentis, aiebat, qui minùs in eo
genere sibi temperant, eorum plerosque
(nisi periti cujuspiam ductum sequantur,
vel præcipuo Dei fulciantur auxilio) par-
tim Dæmonum illusionibus obnoxios ef-
se, partim etiam contumaces, & sibi placentes,
& in sua sententia mire obstinatos ac
pervicaces evadere: qua peste, nulla prope-
modum esset hominum cœtibus capita-

lior; Itaque suorum ille profectum, non tam ex continuata precatione, vel diuturno secessu, quàm è solidæ virtutis officiis, ac præsertim ex mansuetudine atque animi æquitate, spectabat. Cùm è familiaribus nescio quis, fratrem præstanti religione collaudans, ad Ignatium cum admiratione dixisset: En hominem jugiter precationi vacantem: imò verò, mutata voce, en, inquit Ignatius, hominem sibimet acriter imperantem. Alium quempiam, quòd stomachosior esset naturâ, & subinde in amara verba prorumperet, sese fratrum consuetudini alieno tempore subtrahentem, Ignatius blandè compellans: Quin te, inquit, statutis horis in fratrum consuetudinem das? cùm ille iracundiam naturæ bilémque prætenderet; Næ tu vehementer erras, ait Ignatius; etenim hæc & huiusmodi vitia non fugiendo, sed resistendo vincuntur. Denique licèt piæ precationis laude præcelleret ipse, ut dictum est, semper tamen spiritum, quem vocant, mortificationis, spiritui speculationis antetulit: Nam ut in eloquentiæ studio, cùm & ars & usus ipse sit necessarius, longè plus tamen à sapientibus viris, usui quàm præceptioni tribuitur; sic in parandis virtutibus, cùm & commentatio & actio requiratur; multo plus tamen agendo

& pugnando, quàm speculando vel cogitando proficitur.



De Charitate ipsius in Deum.


C A P. . I I I.



CHARITATE in Deum fuit, quantâ par est eum esse, qui ipsius Dei gratia, rebus humanis nuntium sponte remiserit; neque solùm eatenùs Dominum amabat, ut præ illo reliqua omnia nihil duceret (quæ virtutis hujusce præcipua est pars) verùm inerat in amore voluptas mira: prorsùs ut quantilibet pressus curis, ac molestiis fatigatus, in unius Dei recordatione, & quasi amplexu, per summam delectationem acquiesceret. **C**HRIStUM verò Dominum ac liberatorem videndi sicuti est, tanta flagrabat cupiditate, ut eam ipsam ob rem, solvi corporis vinculis vehementiùs in dies optaret. Itaque, si quando graviolem incidisset in morbum; concepta migrandi spe, abstraheretur illicò à sensibus, non sine magno valetudinis detrimento; quocirca mentem à cœlestibus rebus interim avocare, etiam atque etiam jubebatur.

a medicis ; & quoniam acerbissima Christi mors pro salute humani generis obita, Ignatio semper obversabatur ; vicissim ille pro Christo per summos cruciatus quotidie cupiebat emori millies. Quoties verò ingesta in illum convitia & ludibria reputaret apud se ; non modò rei atrocitate permovebatur , ut multi ; sed etiam accendebatur generoso quodam imitandi studio, atque in semetipsum quasi tanti sceleris auctorem acerrimè exardescibat : ac nisi eum cohibuisset existimationis ratio propter salutem aliorum ; simulatâ dementiâ, ad plebem in se concitandam , nudus onustusque cornibus , aut alio fœdo corporis habitu , prodire non dubitasset in publicum, & incessentes cœno vel stercore pueros, vocesque improbas, & sputa, & omnes alias insanæ multitudinis contumelias libentissimè pertulisset. Sed quoniam ejusmodi nulla se dabat occasio , certè quod erat proximum sedulò faciebat, ut immortalia Domini beneficia in se memoriâ coleret sempiternâ , & in ejusdem vel indaganda voluntate , vel gloriâ quærendâ, suas omnes curas cogitationesque consumeret ; cujus rei vel hoc satis magno argumento sit? Inter ipsam negotiorum molem, perditas meretriculas tanto studio combatatur ab impuritate avocare , ut si qua

ex iis resipisceret, séque intra pudicitiae septa recipere vellet, grandis jam natu vir, & præpositus Generalis, antecedere ipsemet, ac perductoris quodammodo munere fungi, Christi causâ non erubesceret. In quo cum admoneretur à quibusdam, frustra tempus ac laborem infumi; quippe insana- biles esse ejusmodi fœminas, ac licet in præsentia pœnitentiam ostenderent, brevi tamen ad ingenium redituras, Ego verò, inquit ille, cujuslibet istarum, unius dumtaxat noctis impedisse flagitia & injurias in Deum, omnis operæ ac vigilantiae præ- tium duxerim.



De Charitate in proximos.

C A P. I V.

EX hoc tam incenso in Deum amo-
re, egregia nimirum illa charitas
in homines redundabat; quos quo-
niam pretioso ejusdem sanguine redem-
ptos, ac proinde charissimos illi sciebat
esse, quidquid in Deum non poterat nul-
lius egentem rei omne id, ipsius gratiâ,
in proximos conferebat. Ut primùm è
peccatorum cœno emerfit, confestim ad

cæteros ex eodem cœno extrahendos incubuit, atque ob id ipsum (uti suprâ dictum est) ingenti labore & incommodo literis operam dedit, & in Societate instituenda nihil spectavit aliud, nisi ut errantes animos ad rectum salutis iter omni ratione reduceret. Barcinone, cùm in grammaticæ studio versaretur, eodémque tempore animorum quoque salutem acerrimè procuraret, Virginum quoddam collegium, cujus nomen consultò reticeo, solutâ admodum disciplinâ corruptisque moribus, ad veterem sanctimoniam ac sobrietatem omni studio revocare nitebatur, suadebátque illis præcipuè frequentem usum sacræ Confessionis & Eucharistiæ. Quam ad rem, temporibus illis insolitam, quò faciliùs eas adduceret, præire ipsemet illis palàm decrevit, adhibito ad id Puialto sacerdote, quo ipse ad confessiones utebatur, spectatæ virtutis ac sanctitatis viro. Igitur ex ejus manu, corpus Domini cùm subinde sumpsisset, fœminis ex odæo spectantibus; tam præclaro exemplo & assiduis hortationibus incitatæ, pleræque ad salutarem pœnitentiam officiûmque traductæ sunt. Quod nefarij quidam amatores ubi sentire, aditûmque sibi ad optata flagitia magis in dies obseptum videre; in extremam

offerati rabiem , Ignatium & Puialtum ex
 insidiis adoriri constituunt : ac die quo-
 dam è templo redeuntem utrumque fusti-
 bus ita malè acceperunt, ut Puialtus paulo
 pòst è vulnere dolore sit mortuus; Igna-
 tius verò, dies aliquot in lecto jacuerit: Sed
 vixdum receptis viribus , nec alterius nece
 nec suo malo perterritus, ad instituta cha-
 ritatis officia rediit alacer ; cùmque eum
 vulgò mōnerent , ac per Deum obtesta-
 rentur amici , ne denuò in capitis discrimen daret sese : Quid mihi optatius , in-
 quit ille,quàm pro Christo Domino meis-
 que proximis emori ? Parisiis , amicum à
 turpi cujusdam fœminæ consuetudine, fru-
 strâ sæpe revocare conatus , cujus ille fla-
 gitij causâ , vicum subinde petebat non
 longè ab urbe positum ; denique egressus
 hominis & itinera dissimulanter explo-
 rans , deterrendi ejus consilium tale com-
 mentus est : Stagnum erat propter viam
 quâ transeundum erat illi de more ; eò ma-
 turè prævertens Ignatius, tempestate per-
 frigida , sese nudus aquis collo tenùs im-
 merfit ; ibique salutare amico tetendit in-
 fidias : Nam ut appropinquantem aspexit,
 Deum precatus , ut ea res utrique feliciter
 eveniret , horribili repentè in adversum
 intonuit voce : Quò , quò miserrime pro-
 peras? non intelligis in quanto versere pe-

riculo? nonne intentum in te divinæ justitiæ gladium vides? Perge porrò, perge nefariam istam explere libidinem. Ego me hic tandiu tuâ causâ macerabo, quoad cœlestes iras, meo malo avertam abs te. At ille subita voce perculsus, atque ad Ignatij aspectum veluti deprehensus, obstupuit: demiratúsque charitatem viri, nec dubio pudore concepto, retulit pedem, & in posterum Deo adjuvante sese ab illa pestifera familiaritate continuit. Alius quidam Ignatij alumnus, præstanti vir ingenio, magnos in virtute processus effecerat, ac deinde (quæ humana fragilitas est) labore victus, Dæmone sollicitante, circumspiciebat fugam; quod ubi sensit Ignatius, variis ad eum retinendum hortationibus monitisque incassum adhibitis, eò denique descendit, ut pro discipuli sanitate, totum triduum omni cibo potúque abstineret, precésque cum lachrymis ad superos funderet; quâ poenâ, tamquam remedio, languenti animo applicito, resipuit ille, suumque errorem gemebundus agnovit, ac deinde in suscepto genere vitæ cum laude perstitit. Parisiis, ut antea dictum est, depositâ pecuniâ fraudatus à contubernali, sic, ut ad sese alendum, stipem emendicare: deinde cogeretur magno studiorum detrimento, non modò iratus amico non est,


verum etiam insigni beneficio rependit injuriam. Cum enim fraudator ille postea Hispaniam repetens, gravi morbo ex itinere implicitus, Rhotomagi substitisset; (quæ urbs, tridui ferme iter, distat Lutetia) ingravescente valetudine paulatim ad omnium rerum inopiam est redactus, cumque ut ignotus in alieno solo, spem nullam subsidij cerneret, licet præterita meminisset, ac præclarè sibi esset conscius, quàm malè de Ignatio meritis fuisset; tamen tantam opinionem de eximia viri bonitate conceperat, ut non dubitaverit illum de suo casu per literas facere certiolem, & aliquid opis ab eo suppliciter petere. Tum Ignatius, quasi hæreditas aliqua sibi obvenisset, sic alacer nullâ interpositâ morâ se in viam dat; Deum pro amici salute etiam atque etiam obsecrans: Quin etiam (quod longè mirabilius est) ad propitiandum illi Numen, iter illud totum pedibus nullo prorsus cibo potuque, ingenti celeritate confecit. Urbem ingressus, conquistum hominem amicissimè invisit, affectum semianimemque sedulo ministerio recreavit, atque ubi morbo levatus est, literas ei commendatitias ad amicos in Hispaniam dedit, & mendicato ab se viatico instructum, in navem imposuit; cum ille simul pudore gaudióque confusus,

dexteram Ignatij tenens , Deum superòs-
que omnes invocaret ad gratiam illi pro
se referendam , satísque mirari non pos-
set, senescente jam mundo, tantum chari-
tatis exemplum in terris existere. Per idem
studiorum tempus , tametsi multum de
spirituali functione remisera, nunquam
tamen potuit se continere, quominùs ere-
ptum ex literariis occupationibus quoti-
die tempus aliquod in proximorum salu-
te consumeret : Itaque & condiscipulos ad
virtutem ac pietatem ex occasione inci-
tabat ; & ex collatitia pecunia multorum
sublevabat inopiam , & ægrotos visendo
recreandóque humanissimè solabatur. In
iis cum ad quendam adiisset , gravi &
contagioso ulcere laborantem , & mini-
strandí causâ, ut fit, decumbentem subin-
de attrectasset ; in discessu metus Ignatium
subiit , ne ex eo contactu dextera pestilen-
tiam contraxisset : quæ suspicio cum so-
licitaret hominem vehementiùs , eumque
ab hujusmodi charitatis officio in posterum
avocaret : ille cognita fraude confestim
in semetipsum exarsit ; dexteramque in os
identidem inferens , increpuit ultro : Qui
de una manu tam anxius es , quid universo
corpori facies ? Atque hac fortitudine &
præsentem depulit metum , & ad eadem
porrò exequenda pietatis opera, sese vege-

tum atque hilarem præstitit. Atque hæc ægrotos adjuvandi consuetudinam non modò privatus, ubicumque terrarum fuit, verùm etiam Societati præpositus diligentissimè tenuit. Nam è nostris, ut quisque in morbum inciderat, cujuslibet esset ordinis, & exemplo acciri medicum imperabat, ac nihil prorsùs omitti eorum, quæ is præscripserat, oppigneratis etiam divenditisque, si opus esset, lancibus, stragulisque, & cætera supellectili. Sanè, cùm ex laicis adjutoribus quidam sæva conficteretur febris; ad eumque refocillandum delicatiori cibo opus esset, quidquid nummulorum domierat, denarios tres, eam unam in rem insumi jussit; Ac resistenti paulisper obsonatori, nihilque præterea pecuniæ ad cæteros alendos superesse dicenti; Atqui nos quidem, inquit ille, valemus: arido pane contenti esse poterimus: Atque ita languenti coëmptum obsonium est. Ipsos verò decumbentes invisebat subinde ipsemet, confirmans unumquemque verbis planè divinis atque cœlestibus; dabátque operam, ut omni deposita sollicitudine, superioribus esse curæ, se suamque salutem, sine ulla dubitatione sentirent. Homines vel de se ipso privatim, vel de Societate communiter bene meritos diligentissimè coluit, nullumque in eos neque vivos, neque mortuos

grati ac memoris animi officium prætermisit. Quippe non modò pro ipsorum salute Dominum per se suosque precabatur assiduè ; sed etiam, dum viverent, sæpe domum veniebat salutandi causa ; eosdemque adeuntes ad se, quanquam alieno tempore, accipiebat in primis hilariter : deque Societatis progressu , ac rebus præsertim Indicis , quarum ipsa longinquitas habet delectationem, pergebat amicissimè facere certiores : atque etiam , cùm opus esset, quibus rebus poterat , benignè adjuvabat. Hieronymo quidem Arzio, Hispano doctore, (quicum erat ei magna necessitudo) non modò graviter ægrotanti frequens adfuit ipsemet, sed etiam fidelibus famulis destituto, probos & industrios è Societate viros ministrandi gratia submisit. Andreas Lipomanus patritius Venetus, quem Trinitatis Priorem appellabant , vir non pietate minùs quam genere nobilis, Collegio nostrorum hominum constituendo Patavij , opimum sacerdotium ejusdem urbis addixerat, dimidia tantùm parte vectigalium sibi quoad viveret reservata. At verò Ignatius, ne se vinci pateretur officio ; patentibus litteris eum ultrò perpetuum sacerdotij administratorem declaravit ; neque è vectigalibus attigit quidquam, nisi quod ab ipso Priore quotannis ad paucos

ē nostris alendos per eleemosynam præberetur. Quin etiam ejus fratris filio pensionem decrevit annuam aureorum ad quadringentos; quam tamen bonus ille Prior nequaquam admisit. Ac cæteros item, quorum beneficiis provocatus esset, eximio quodam studio & observantia prosequutus est.



Mansuetudo ejusdem & Comes.

C A P. V.




B omni fastu & moribus imperiosis vehementer abhorrui: vestigium in eo contumaciæ cerneret nullum; & quod difficillimum est, lenitatem ita cum gravitate miscebat, ut neque facilitas de auctoritate, neque severitas quidquam de suavitate detraheret. Parisiis per jocum invitatus à nobili quodam, vellet ne tridiculis ludere: (quibus in oblonga mensa per angustum fornicem eburnea pila trajicitur.) Ego verò ludam, inquit Ignatius. At enim qua sponsione, subjicit ille, qui pecuniâ careas? Tum Ignatius: Hac sponsione, respondit, ut certo utique dierum numero tibi deser-

1 viam: veruntamen, arbitrato tuo, si viceris
 tu; meo, si superior ipse discessero. Cum
 ea conditio placuisset: Age sanè in certa-
 men descenditur: cùmque nihil minùs cal-
 leret Ignatius divinitùs factum est, ut in
 singulos omninò trajectus victor evaderet:
 subinde exclamante adversario, se meritò
 plecti, qui Ignatium provocasset: séque
 divinum iudicium prorsùs agnoscere. Per-
 actò deinde certamine, victum victor ab
 inanibus curis & occupationibus in ali-
 quot dies abductum, è sponsione, spiri-
 tualibus exercitationibus diligenter exco-
 luit, torpentémque situ ac deliciis animum
 ipsius, ad salutarem Dei metum æternæ-
 que vitæ cogitationem excitavit. Venetiis
 Patavium pedibus cùm iter haberet, do-
 mesticâ eâque admodum attritâ lacernâ
 ob inopiam indutus, Jacobo Laine comite;
 pecuarius quidam puer, qui à via non lōgè
 armenta pascebat, conspectis eminùs pe-
 regrinis, ad eos repentè propiùs advolat:
 habitúsque fortasse novitate permotus,
 defixis procaciter in Ignatium oculis, ca-
 chinno tollere, eidémque licentiùs cœpit
 illudere: cùmque Ignatius vultu placido
 substitisset; conversus ad eum comes:
 Quin, ait, acceleras gradum pater, téque
 istius pueri petulantix subtrahis? Imo
 verò, inquit ille: cur puerum oblata sibi

præter spem hac tanta oblectatione fraudemus? Itaque consultò etiam diutius hæsit in iisdem vestigiis, ac se curiosius intuendum ridendumque affatim protervo adolescentulo præbuit: plus nimirum ex hoc qualicumque sui contemptu ac ludibrio hauriens voluptatis, quam alij ex vulgi plausu faustaque acclamatione percipiunt. Atque hunc mansuetudinis tenorem diligenter in omni vita servavit: ac satis constat, annis ipsis triginta, quibus Christum sequutus est, neminem prorsus ab eo fuisse non modò contumeliosè tractatum, sed ne appellatum quidem acerbius. Si quid præciperet; roganti erat propior quam iubenti. Alloquendi verò ejus causa, nihil erat necesse tempus opportunum, aut molles captare aditus: quâlibet adiisses horâ, sive corpore melius haberet, sive deterius, prosperis æquè atque adversis in rebus, & accipiebat benignè, & patienter ad finem usque sine interpellatione audiebat: ac nullum quamvis infimæ sortis hominem stare coram se, nedum aperto capite patiebatur esse; nec modò ex destinato congressu, verùm etiam ex occursu fortuito, fratres ita lætis intuebatur oculis, ut vel ex hoc, insitam animo in omnes benevolentiam satis ostenderet. Amicos præterea, tum domesticos tum exter-

nos, interdum ad prandium aut cœnam, sive, ut appellabat ipse, ad pœnitentiam invitabat; nec repudiabat si quis ultrò se offerret: quin etiam intervenientes cœnæ vel in ipso jam exitu, nihilominus jubebat accumbere, & frustula panis ipse carpendo, & simulandâ appetentiâ, convivium consultò extrahebat, quoad novissimus quisque sine rubore aut sollicitudine perotium absolveret. Si quis ab eo quidpiam sibi aliisve peteret; vel dabat hilarè, verbis etiam, quod aiunt, munus exornans; vel si abnueret, causas afferebat ejusmodi; ut ille sese contemptum nullo modo existimare posset: Actanta ipsius erat in eo genere vel efficacia vel suavitas, ut qui ad eum legati à quopiam venerant, cum id quod volebant, minimè impetrassent, Ignatij rationibus interdum ita victi pacatèque discederent, ut ultrò ipsi mutata ratione, apud eos, à quibus missi fuerant, ipsius causam pertinacissimè tuerentur.





Gravitas ejusdem, & in custodia disciplina, Severitas.

C A P. V I.



B hac porrò comitate, quemadmodum austeritas, sic etiam levitas omnis aberat & ineptiæ. Ita enim compositus fuit moribus, ut neque manum, neque oculum membrumve aliquod sine causa & ratione moveret; & in statu, incessu, accubatione, sessione, decorum teneret. Jam in loquendo fuit adeò consideratus & parcus, ut nullum planè verbum, nisi consultò ac meditatò proferret. Neque figuris vel amplificationibus utebatur, sed rei gestæ seriem & rationum momenta sine fuco exponebat: Qua simplicitate plus valebat in persuadendo, quàm alij calamistris & lenociniis. De se ipso, deque suis rebus, nisi necessitas cogeret, vel Dei gloria postularet, nihil dicebat unquam: ab aliorum verò factis dictisque exquirendis, nisi ad suam curam spectarent, omninò abstinebat. Consueverat etiam eos reprehendere, qui de soluta Ecclesiæ

Ecclesiæ disciplina, deque emendandis Principum moribus temerè disputarent: quam tentationem se fugasse dicebat, consideratione extremi judicij, & eorum quæ tali tempore à semetipso propriè exigenda forent: Quæ si pro se quisque reputaret, haud ita facilè homines in aliorum vitam inquisituros. Denique tanta inerat in ejus sermone provisio, tarditasque longo usu parta, ut cùm biliosus ac præservidus esset naturâ, pituitosus ob id ipsum ac lentus haberetur à medicis. Atque hi mores, cum admirabili vitæ sanctitate conjuncti, incredibile est, quantum illi conciliarent venerationis: nam ut quisque intîmus erat Ignatio, ita suspiciebat eum maximè. Ludovicum quidem Consalvum Lusitanum, qui domus Romanæ minister aliquandiu vixit, magno rerum usu, magnâ prudentiâ virum, dicere solitum accepimus: antequam cum Ignatio coram egisset, præclarè sese utique de illo existimare solitum, qui tali Societati præesset: at verò, postquam ipso familiariter usus est, Societatem magnifacere cœpisse, quam Deus tali præside ac moderatore donasset. Jacobus verò Laines, qui proximus ab illo Societatis gubernacula tenuit, cæterique Patres, quamvis humanissimè cum illis Ignatius ageret, tamen eximiam viri virtutem ita

revereabantur, ut bene moratos vel parenti liberos, vel magistro discipulos, ad stare diceres. Quòd si quando, (quod tamen perrarò fiebat) rei necessitate coactus, vultum indueret severiorem, & aliquem increparet asperitùs; tanta erat vis pondùsque verborum, ut contra nehilcere quidem auderet quisquam. Idque præsertim in causa viri cujusdam insignis apparuit; qui cùm turbulentior esset, quàm ut cum diutiùs ferri oporteret; cumque ejus animum Ignatius blandis monitis præceptisque nequicquam sanare tentasset; ad extremum oratione conversa, divinam testatus justitiam, ac cœlestis iræ minas intentans, tantum ardorem spiritus præse tulit, ipsi ut parietes tectaque non dubio motu nutare & concuti viderentur. Quo terrore perculsi qui aderant, illicò procumbentes, Dei pacem precibus ac votis exposcere: Ipse verò qui accusabatur, exanimis ad pedes Ignatij sese confestim abjecit, ac supplex confusa voce, culpæ veniam petiit, séque posthac in officio fore pollicitus est. Continebat autem in disciplina cùm cæteros omnes, tum eos maximè, qui vel insigni eruditione, vel generis nobilitate præstarent: quippe quorum dicta factaque, ad exemplum in omnes partes valeant plurimùm. Otium verò,

ut omnium vitiorum fœnitern ac seminarium, in primis oderat : Itaque duos trêsvē rei familiaris adiutores, cū ad januam alieno tempore confabulantes ē superiore loco aspexisset, illico jussit acervum lapidum in proximo situm, in summam ædium contignationem sine cunctatione transferre : Eisdem tertio post mense cū ibidem iterum otiantes animadvertisset, illam ipsam lapidum congeriem ut in eundem locum referrent, unde asportaverant, imperavit : amicē insuper admonens, nihil in Dei famulatu periculosius esse desidiā. Cū quendam in tradito sibi munere valde remissum atque oscitantem invenisset, quæsit ex eo, cuinam in tali ministerio daret operam, Deo ne, an hominibus ? cū ille se Deo utique deservire dixisset : Plectēris igitur, inquit Ignatius; nam in rebus humanis minū accuratē versanti, jure forsan ignoverit quispiam, at immortalī Deo ministrari negligentē, id verò nullo pacto ferendum est. Spectaculis publicis, quamvis alioqui licitis, vel etiam sacris, adesse nostros non ita facile permittebat : quod si qui, facta potestate, se ad ea conferrent ; eos etiam atque etiam jubebat, sine ullo arrogantiaē seu levitatis judicio, modestiam ac submissionem tenere ; cedere omnibus, & infimum semper

locum (nisi aliter à circumstantibus co-
gerentur) eligere. Cùm è Romano ab se
nuper instituto Collegio , adolescentes
quosdam solutiùs in publico ambulantes
vidisset ; castigandos curavit palam, hor-
tandósque gravi oratione , ut quem habe-
rent insitum animis pudorem ac verecun-
diam , cum externo item corporis habitu
præ se ferrent : & quoniam Apostolo teste
spectaculum facti essent omnibus , cave-
rent etiam atque etiam , ne supervacanea
locutione, curioso oculorum obtutu, alió-
ve incondito gestu motúve corporis, quen-
quam offenderent ; præsertim cùm eo de-
genere toto, multa cum precatatione lachry-
mísque , conscripta pulcherrima ipse præ-
cepta paulo antè edidisset. Nihil novi
moris in Societatem induci , se inscio est
passus ; principiísque vigilanter & acriter
obstitit : quippe qui exempli vim nosset,
& rerum incrementa fallentia. Quosdam,
qui ad vineam injussu luserat pilâ ; laicum
etiam, sapone manus lavantem , haud im-
punè abire permisit ; seditiosos verò , &
alienæ laudis obtrectatores , & rerum no-
varum cupidos , non diu tulit : sed omnia
expertus , quæ ad revocandam dubiam in-
dolem, & pejore loco positam, facere vider-
entur ; si parum proficeret , ad extremum
è Societate pellebat. Neque per ea tempo-

ra, carcerem compedēſve in Societatis mo-
res induci permittit; negans, qui vinculis
conſtringendi forent, eoſdem eſſe ad no-
ſtram inſtitutum idoneos. Itaque custo-
diæ loco, januam oſtentare conſueverat;
acciditque aliquando, ut juſta de cauſa
complures adoleſcentes exauſtoratos unâ
dimiſerit; atque hujusmodi ferè (quod
ſilentio prætereundum non eſt) è Socie-
tate pulſi homines, exitialem exitum ſorti-
ti ſunt; ſatîſque conſtat, alios inter ſym-
phoniam laſcivè ſaltantes repenti occi-
diſſe, alios contractâ rixâ interfectos, alios
denique alio miſerabilis lethi genere pe-
riiſſe. In puniendo autem id ſequebatur
in primis, ut noxæ reſponderet animad-
verſio, & in ſuo quiſque vitio plecteretur:
ſupervacanea verba ſilentio, ignaviam la-
bore, honoris cupiditatem ignominiâ lue-
ret. Ac ferme animadverſionum Ignatii
genus erat illud; circulum humi deſcribe-
re, ex quo noxi ne injuſta excederent:
colloquiis certorum hominum nomina-
tim interdiceret, verberationes ad præfini-
tum temporis ſpatium injungere, & alia
ejuſmodi: Noxas autem leviores & quoti-
dianas intelligo; cujuſmodi in homines
etiâ ſtudioſos perfectionis cadunt: nam
graviores Ignatius minimè toleraſſet. So-
lebat etiam ſontibus, ad humilem men-

fam in triclinio accumbentibus, objurgatorem inducere, infimæ plerumque conditionis hominem, sed ingeniosum & acrem; qui cunctis audientibus, vitia reorum increparet, exprobarétque religionis annos & negligentiam: idémque cæteros carptim nec opinantes repente perstringeret; nimirum edomandæ superbix causa, mentisque è pigritiæ veterino excitandæ. Sed qui deliquerant, priusquam ex consuetudine punirentur, quàm lenissimè operam dabat, ut suam ipsi culpam agnoscerent; atque ultro sibi met multam irrogarent: quæ tamen si gravior videretur, confessione contentus, ita moderabatur, ut multum saepe de acerbitate minueret,



Ejusdem animi Submissio, & quidnam de virtute Obedientia senserit.

C A P. VII.

NEGABAT, suo quidem iudicio, quenquam probè intelligere, quàm vehementer in se quisque divinæ Bonitatis operationem impediât; quantâve illius beneficia & dona

per socordiam ignaviámque corrumpat. Quo crimine sese accusabat in primis, atque ita de suis demissè & humiliter sentiebat, ut se mortalium omnium infimum, & opis divinæ maximè egentem putaret: sibi que cæteros omnes ad virtutem pietatémque, & exemplo & incitamento fateretur esse. Privatae verò vitæ quanto desiderio teneretur, & initio declaravit in recusando magistratu; & deinde, cum ut redigeretur in ordinem, aliúsque sibi succederet, omni ope contendit. Quod tamen si consequutus non est; tamen obedientiæ studium, quibuscunque rebus potuit, semper ostendit. Romano quidem Pontifici, cùjus in verba præcipuo Sacramento juraverat, ita erat præstò, ut ad ipsius nutum sese paratum exhiberet, confecta jam ætate, unius baculi adminiculo, pedibus quocunque opus esset peregre proficisci; vel etiam navigium ascendere planè exarmatum, seque, eodem Pontifice jubente, mari ventisque sine ullà dubitatione committere. Quem ipsius animus, vir quidam primarius cum haud satis probaret, & in ejusmodi re consilium prudentiámque requireret; prudentiam quidem, non obedientis, verùm imperantis esse, respondit Ignatius. Et sanè cum in Societate nostra virtutem hanc cæteris omnibus anteferet,

tum nihil huic laudi tam contrarium dicebat esse, quàm in superiorum jussis & consilio examinando moram, vel potius arrogantiam; negabátque obedientis nomine dignam haberi oportere, qui legitimo superiori non cum voluntate, judicium quoque submitteret. Id enim demum esse Deo gratissimum holocaustum, cum omnes animi vires, ac præsertim intelligentia & mens, quæ summum in homine obtinent locum, in obsequium Christi coguntur: Qui verò inviti ac dissentientes, actu exteriori duntaxat, jussu præpositorum exequerentur, hos inter vilissima mancipia vel pecudes potius numerandos aiebat. Exerat ejus epistola ad socios Lusitanos in hanc sententiam scripta, (qua nihil ego quidem in eo genere vidi subtilius) quam qui accuratè perlegerit, facilè intelliget, quàm jure Ignatius, tantùm huic uni mentis & rationis obsequio, tribuendum putarit. Quin etiam in sermone quotidiano sæpissimè usurpare consueverat; qui ad superioris nutum, voluntatis propensionem solummodo, non etiam judicij consensionem accommodarent; eos altero tantum pede intra religionis septa versari. Neque verò ejusmodi præcepta verbis tantùm explicabat ille; sed, quantùm ei res & persona concederet, etiam factis. Medico quidem,

quoties ægrotaret, ita se dicto audientem præbebat, ut ejus monita pro oraculis duceret, ac quodammodo prudentiam penitus exuisset, & omnem suæ salutis curam & sollicitudinem, in eundem projecisse videretur. Cum stomacho gravissimè laboraret aliquando, ex nimio videlicet hepatis calore, ut suprà diximus; adhibitus medicus, quo domus eo tempore utebatur, adolescente, nec peritissimo, frigida corporis constitutioni causam illicò tribuit. Nec mora, quidquid excogitare potuit ad corpus & præcordia calefacienda, præscripsit. Ac primùm fenestras, forésque cubiculi, ne quid afflaret auræ, obserari diligenter jussit; deinde languentem multa sub veste continere sese; postremò quàm calidissimo cibatu, & exiguo mero, sed quàm austerrissimo refici: Quæ omnia Ignatius licèt sibi, non levibus argumentis, minimè accommodata sentiret, ac medicum ipsum nec literatissimum, neque exercitatissimum sciret esse; tamen, ne cum extremo quidem vitæ periculo, contra ejus edicta, nihil unquam effatus est. Æstus erat summa: calores ut in urbe maximi: ingenti stromatum pondere premebatur Ignatius: manabat è mēbris omnibus tanta sudoris copia, ut culcitrae ac vestes maderent; ac nihilo minus ex præcepto, se intra calida fomenta

cohibebat ægrotus; ardebat siti, nihil omnino poscebat; discruciabatur doloribus acerbissimis, nullam edebat vocem; linguebatur animo interdum, neque tamen significabat; denique per versa curatione eò adductus est; ut cum ultimum sibi discrimen adesse intelligeret, Societatis administratione Patribus delegata, aditū cubiculi domesticos prohiberet omnes, uno excepto valetudinarij curatore: atque id demum extitit signum, desperata jam valetudine, se ad vitæ exitum comparantis. Itaque Patres in re tam subita consilio habito, cum non decissent, qui medici præsertim junioris placita reprehenderent; Alexandrum Petronium, ætate provecta virum, & medicæ artis laude præstantem, extemplò acciri jubent. Is ut inspexit Ignatium, genusque & ordinem adhibitæ medicinæ cognovit; per summam indignationem vociferatur, hominem calore necatum esse: pandi confestim fenestras & ostia, levare stragulis lectum, frigidaë hauftus affatim dari æstuantî imperat: quæ res prioris medici inscitiam planè coarguit; siquidem refrigerato hepate, ventriculi tormina quievêre, & obedientiæ meritis Pater auctus, pristinam insuper valetudinem brevi recepit. Rursus, cum jejunia cineralia seu Quadragesimam, quamvis af-

fecto corpusculo perseveranter nihilominus observasset; ipsâ denique feriâ quartâ sanctioris hebdomadæ, febris correptus est, nec dubitavit idem Alexander, quin totum id ex imbecillitate nimia proveniret; quocirca pulli gallinacei esum, ad vesperam illi præscripsit; abiitque admodum incertus animi, utrûm Ignatius tali tempore iussa facturûs esset. Redit deinde postridie, quæritque sollicitus, num se refecerit pullo. Cùm annuisset Ignatius: Fatebor, inquit Alexander, ingenuè id quod res est. Complures non custoditâ solemni abstinentiâ nihilominus hoc triduo in morbum incidere: quibus ego cùm accersitus, carnium cibatum indixerim, vix ægréque ab iis impetravi ut obtemperarent; propterea quòd per hos dies carnibus vesci, nimis grave piaculum ducerent: tu contrà, peracto jam penè curriculo, ad ipsas metas meo monitu non recusasti desistere; hoc ego, Pater, satis mirari non possum. Ad ea Ignatius, serena fronte, quæ animi tranquillitatem indicaret: Atqui obediendum est, inquit: nec plura in eam sententiam effatus est. Quo responso mirificè delectatus Alexander, & sanctitatem viri magis magisque suspiciens, totam rei gestæ seriem ipsemet mihi deinde narravit. Atque ad sapientem hanc sanctamque stulticiam cæca, ut ipse

appellabat, obedientiæ; suos, ut essent ad subita ac seria promptiores, interdum fictis etiam in rebus erudiebat. Sacerdos quidam, edito jam signo, paratus ad sacrificium, & calicem tenens, cum è vestiario pedem efferret, per nuntium ab Ignatio, qui totam rem è propinquo observabat, repentè jubetur, sacro deposito ornatu, pallium sumere prodeundi causa. Paruit ille sine tergiversatione, ac palliatus Patri confestim apparuit. Tum Ignatius quærit ex homine; sitne ægrè passus, in procinctu jam ad immolandum, subitò se juberi sacra deponere vestimenta, rémque divinam omittere? Cùm ille se ne tantulum quidem esse commotum affirmaret: Atqui me, scito (inquit Ignatius) non quo te in præsentia opus habeam, sed periclitandi tui obsequij gratiâ, id fecisse de industria: & sic habeto; plus te sacrificio deserendo esse meritum, quàm si id ipsum, ut destinaveras, illicò peregisses: nam etsi Altaris mysterium tanti apud Deum est, quanti profectò est; tamen, ut scriptum legimus, melior est obedientia quàm victimæ. Quendam etiam, cùm maximè confessionem nobilis cujusdam exciperet, consultò vocari ad se jussit: Cùm ille se peracto mysterio mox affuturum dixisset: accersit eum denuò: at ipse nihilominus confidentis rogatu hæsit pau-

lulum. Ac venienti deſnum Ignatius : Ita
ne verò ? iterum, inquit, evocandus es ? Et
gravioribus verbis accepit hominem : non
quò illius tum quidem operâ egeret , ſed
obſervantiam & agilitatem experiri volue-
rat. Sic enim aiebat : cupere ſe, quemadmo-
dum cæteræ Deo dicatæ familiæ, ex inſti-
tuto , aliæ paupertatem , aliæ ſilentium,
aliæ pſalmodiam, aliæ denique aliud præ-
cipuo ſtudio colerent: ſic in Societate nihil
haberi prius aut potius alacritate amoré-
que parendi : & maximè proprium inſigne
noſtrorum hominum eſſe Obedientiam;
quippe quæ , divo Gregorio teſte , virtus
una cæteras omnes animo virtutes inferat,
inferasque cuſtodiat. Hiſce ergo artibus,
& huiusmodi , ſubinde alumnos exercere
conſuevit : ut ad quanlibet Præfeſti vo-
cem aut ſignificationem parati, vel inchoa-
tum apicem in ſcribendo relinquerent ; ſé-
que expeditos , ubi opus eſſet , illicò ſi-
ſterent,

✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠ ✠✠✠

Paupertas ejus & Castimonia.

C A P. V I I I.



VOLUNTARIAM paupertatem (quam ille religionis murum appellabat) ad extremum usque constantissimè coluit ; nec modò ipse proprium habuit nihil , sed ne alios quidem, quamvis genere nobiles , ac deliciis olim assuetos, quidquam habere permisit. Quin etiam quenquam è professâ domo apud Germanicum Romanumve Collegium, nisi admodum rarò & justa de causâ prohibuit vesci : quò nimirum, si opus esset, jurare veriùs posset, nihil omninò ad ipsam domum , ex Collegiorum fructibus pervenisse. Pauperem autem spiritu , eum sibi denique aiebat videri , qui erga ea quibus uteretur, sic esset affectus animo, ut instar statuæ cujusdam videretur esse, quæ nullo pacto resistit recusâre , quominus omnî quamvis pretioso amictu & ornatu confestim exuatur. Castitatis verò laudem, Dei beneficio tantam adeptus est, ut ex quo die sese in beatæ Virginis fidem ac patrocinium contulit voto , nullam , ut initio

dictum est, deinde, quamvis præfervidus
 nativâ, carnis tyrannidem senserit. Porro
 in Societate, nobilissimam hanc virtutem
 tanto studio custodiri volebat, ut nihil
 omnino neque in dictis, neque in factis
 lascivum aut petulans appareret, ac quo-
 ad fieri posset, nostri cœlestem vitam in
 terris agerent, ab omni corporis conta-
 gione sejuncti. Quin etiam in scholis, Te-
 rentium explicari, (ni perpurgatus esset)
 quanquam optimum Latinitatis auctorem
 & Romanæ comœdiæ principem, vetuit
 nominatim, quòd eum videlicet parum
 verecundum, ac parum pudicum arbi-
 traretur. Noluit igitur ea lectione pue-
 rorum animos imbui, ne plus moribus
 noceret, quàm prodesset ingeniis; ex quo
 facilè existimari potest, in cæteris rebus
 quàm acer & vigilans custos pudicitiae
 fuerit.



•••••

*Æquitas animi , & Constantia
ejusdem.*

C A P. I X.



DVERSUS ea quæ videntur acerba , & contra omnes varietates quæ in vita versantur , animo fuit semper ita præsentī , ut nunquam , vel à religioso dignitate discederet. Romæ cū apud nobiles quosdam , ut solebat , de rebus divinis familiariter ageret , instituto jam sermone , trepidus ab domo nuntius eī repente in aurem insusurrat , lictores in domesticam suppellectilem à creditoribus immistos , cuncta miscere & evertere ; vix ab eis impetratum , sustinerent tantisper , dum ipse tota de re certior fieret ; Et inchoatam disputationem admirabili tranquillitate animi absolvit. Quærentibus dein amicis quid subitæ rei accidisset : Noster , inquit , œconomus , ad necessariam ædificationem ære alieno contracto , in præsentia solvendo non est ; impatientes moræ creditores , ad auferenda pignora ministerium forense miserunt ; ij

perturbare dicuntur omnia ; sed me res non movet ; nam strata si abstulerint, humi pro nostra paupertate cubabimus ; unam vereor , ne inter tumultum , commentarij de religione pereant , magna cura & labore confecti ; hos ego sanè velim salvos : cætera negligo. Tum ij qui aderant , Patris patientiam admirati , facinus indignum exclamant ; domum nostram advolant ; prædelsque pro Ignatio facti, satellitum protervitatem magno convitiò cohibent ; neque ea res cuiquam amicorum fraudi fuit : siquidem aureis ducentis ab Hispano doctore , cujus modò meminimus , Hieronymo Arzio , & quidem quid accidisset ignaro , postera die submissis , nullo ipsorum incommodo , æs alienum est persolutum. Suscepra negotia in finem usque perseveranter urgebat ; neque verò, quos sibi socios expeditionum assumpserat, torpere patiebatur. Ubi necessarium iter , vel quid aliud gravioris momenti destinasset in diem certam, præsertim si postularer occasio, nulla vi tempestatis, aut alia quavis difficultate deterrebatur , quominus ad constitutum tempus cogitata perficeret. In ad-eundis principibus viris , quod ille necessariò & sæpè faciebat , cunctas aulae molestias, & indignitatem, & aulicorum con-

tumaciam deliciâsque vorabat alacritate mirabili ; acciditque aliquando , ut aditu exclusus , commodam admissionem horas ipsas quatuordecim jejūnus obsederit. Si quid , re bene perspecta , consiliariis etiam adhibitis , decrevisset ; haud ita facilè se ab eo deduci patiebatur. Ad Ecclesiasticam disciplinam pro sua parte adjuvandam statuerat , ne quis ex aliis ordinibus , quamvis eruditione , aut eloquentia , aut alia qualibet laude clarus , in Societatem admitteretur : Quin etiam , si quis per imprudentiam irreperat , qui vel diem unum in alienis castris fuisset , contra nitentibus interdum advenæ propinquis , amicisque gratiosis , remittebat ad pristina signa , vel si minùs parèret , certè è Societate pellebat : ne cæteri nimirum Ordines de nobis conqueri possent , aut Societas quasi quoddam perfugium desertoribus esse putaretur. Neque minorem animi fortitudinem præstitit in iis tuendis , quos , probato ipsorum spiritu & vocatione , in Societatem adscripsisset ; quorum constantia cum à parentibus (ut fit) per amplissimos etiam viros acerrimè interdum oppugnaretur ; Ignatius , ubi opus fuit , coram summo ipso Pontifice , suorum causam contra opes & gratiam , divino fretus auxilio , sine ulla dubitatione me-

tūve, non solum defendit, sed etiam obtinuit. Itaque principes etiam viros, Julius III. Pontifex maximus festivè ad-monebat, ne cum Ignatio contenderent; utique ni vellent è certamine victi discedere. Cùm lege cavisset, ne quis è nostris vel exequiarum, vel sacrificij, vel cujuscūpiam omnino ministerij nomīne pecuniam aut eleemosynam ullam acciperet, nedum cogeret: eam ipse legem diligenter sanctēque in omni vita servavit: neque commisit unquam, ut fidem suam, in rebus præsertim sacris, temere obligaret, vel (quod vitandum est maximè) specie pietatis, quæstum facere videretur; quo in genere illud insigne memorant: Graviter ægrotabat ætate jam devexa idem Hieronymus Arzius; ad hunc, visendi causa (fuit enim in colendis amicitiis diligentissimus) cùm venisset Ignatius, hominemque benigno & spirituali alloquio recreare conatus esset: ille de futura vita sollicitus, aureos ducentos ad piacularia sacra pro se facienda, sudario involutos, institit Ignatio obtrudere; quos cùm obfirmato animo rejecisset Pater, quòd diceret se alieno periculo doctum, ab hujusmodi conventis jam pridem abstinere, neque plus oneris velle suscipere, quàm quantum præstare cum fide posset: admi-

ratus ille sanctimoniam & integritatem viri, eam ipsam summam paulo post ad eundem sine ulla conditione transmisit. Tum Ignatius sponte complures hostias ad expianda amici peccata decrevit ; neque in officij & charitatis certamine vinci se ab laico passus est. Pacem & concordiam (quoad officium & Dei gloria pateretur) non modò cum suis, verum etiam cum alienis, omni cura studioque revinuit semper ; & cavuit ne, aut per se aut per suos, facto dictòve quenquam offenderet. Cùm Martinus Olavius, qui collegio Romano annos aliquot magna cum laude præfuit, excellenti vir ingenio doctrinæque, theses aliquot de more proposuisset, in quibus erat caput de Immaculato, ut appellant, Conceptu beatæ Virginis ; licet ea de re Ignatius pro sua egregia in Deum & Virginem pietate minimè dubitaret, tamen ne Fratres Dominicani, qui ad disputationem invitabantur, id ægrè ferrent, seque nominatim provocari putarent, (contrariam enim sententiam tuentur eorum plerique) eam thesem induci tollique omnino imperavit. Anno Christi nati M. D. LIII. cùm Societas in Hispania, Deo adjuvante, majorem in modum cresceret ; gravia in nostros crimina repente

conficta ab iniquis , & Exercitiorum spiritualium præcipuè liber , in suspicionem apud sacros Inquisitores , magno apparatu artificiòque vocatus est ; quo nuntio Romam allato , multi auctores Ignatio fuère , ut se suosque omni ope tueretur ; accusatorum calumnias & improbitatem in tanto præsertim suæ existimationis ac famæ periculo redargueret. At ille , conscientiae testimonio ac Dei bonitate subnixus , nihil extimuit , remque totam sine ullo tumultu magistratibus cognoscendam reliquit , quorum operâ & veritas brevi patuit omnibus , & ex eo tempore Societas in iisdem provinciis feliciores in dies habuit progressus. Nec minor anno insequente in nostros , qui in Gallia versabantur , procella defæviit : Siquidem gravi ab aliquot illustribus Theologiæ doctoribus decreto proposito , usque adeò lacerata ac tantam in invidiam adducta Societas est , ut eam non modò profanum vulgus , verùm etiam concionatores ipsi quotidianis probris & convitiis è superiore loco proscinderent. Ei decreto , ciminibusque scripto refutandis , cum se aliquot è nostris Ignatio paratos offerrent ; ac res indigna minimèque toleranda cunctis videretur esse ; verbis ex Evangelio desumptis Ignatius : *Pacem* , inquit , *de vobis* :

pacem meam relinquo vobis : neque certamen cum adversariis ullo pacto suscipi est passus, quòd diceret, procul dubio fore, ut ipsa dies & nostrorum innocentiam satis probaret, & inimicorum cogitationes & consilia frangeret : idque non ita multo pòst, Dei beneficio est factum : nam & accusatio tota brevi consenuit, & ipsis criminationibus illustrata Societas, radices in iis regionibus egit altiores. Admirabilem verò facilitatem, vel potiùs animi altitudinem, Romæ ostendit Pater in acerbissimis vicinij cujusdam injuriis perferendis ; namque is, ut nostros in proximam sibi domum immigrasse cognovit ; càm Ignatium sociòsque, ut alij multi, sine causa pessimè odisset, una re valde lætatus est, quòd vendendi suas ædes, quippe nostris valde opportunas, & conficiendæ pecuniæ præclaram sibi occasionem oblatam putaret. Ergò, ut peregrinum ad conditiones quamlibet iniquas cogeret, variis artibus patientiam hominis exercere constituit : ac primùm in atrij cujusdam interjacentis, quod finibus nostris contineri constabat, possessionem impudenter invasit : neque tamen Ignatius eam rem judicio persecutus est. In id atrium deinde pavones & alia demisit altilia ; quæ obversis in eam partem cubiculis, Nostris mo-

lestissimo clangore diu noctúque obstrepent ; nequaquam expostulavit Ignatius : eidem , triclinij parietes in eam partem , luminis causa perforare volenti , per summam contumeliam restitit ille ; nihilominus quievit Pater , atque ob id ipsum cæco aliquot annos triclinio est usus. Cùm hæc maximè ageret vicinus , ultrò Ignatium ac socios tota Urbe institit criminari , bipedumque nequissimos & cupidissimos dicere , qui in alieno solo , contenti malè partâ ingenti pecuniâ , domibusque per falsam religionem occupatis , possessiones in dies continuare , seque ipsum patriis ædibus penè per vim exturbare contenderent. Quæ res cùm delatæ ad Ignatium essent , non modò sedato animo tulit , ut cætera , sed etiam ex eo die Dominum deprecari pro adversario cœpit ardentius. Denique cùm ille diuturna importunitate Nostros ad quamlibet iniquum pretium perduxisset , & piorum subsidiiis domus tandem esset coëmpta , ita ex ea migravit , ut , quasi mox æquâda solo esset , sic omnia inde ferramenta , fores , fenestrarum obices , atque adèò elaborati lapidis quidquid potuit , secum asportaverit ; neque tamen gravius ea de re questus Ignatius est , neque tali homini , aut ulli omnino mortalium , ullo un-


quam nomine litem intendit. Neque verò ab hominibus tantum, sed etiam ab ipsis penè temporibus, invictum animum præstitit; siquidem nulla unquam vel domestica inopia vel publica annonæ caritate adduci potuit, ut contra Christi consilium de crastino sollicitus esset; aut, qui nomen Societati profiterentur, modò ad institutum idonei forent, eos, quamquam ingenti pressus familia, repudiaret. Atque hoc eò magis homines mirabantur, quòd illo ipso tempore viri locupletes, ac principes, inopiæ metu, multos è domesticis convictoribus non sine rubore dimitterent. Itaque cùm ex Ignatio quidam è familiaribus pro amicitia sciscitaretur, quid ita alij divites & pecuniosi in tantis annonæ difficultatibus familiam sustinere aptusque minuerent; contrà ipse nullis vectigalibus, nullo certo redditu fultus, eandem augeret? Non satis attendis, inquit ille, quæ sit vis ac natura virtutis illius, quam in Theologicis virtutibus secundam Apostolus numerat; cui, certis & exploratis in rebus, locus esse qui potest? *Spes enim, ut idem ait, quæ videtur, non est spes; nam quod quis videt, quid sperat?* Neque verò timendum esse, ne qui aves cœli pascit, & agri lilia splendissimo vestit ornatu, quæ neque ferunt,

neque

neque nent, neque in horiea congregant; idem suis operariis, in Ecclesiæ vinea nullo stipendio laborantibus, necessaria ad exigendam vitam alimenta deesse patiatur. Quod ille videlicet; cùm jam inde ab ipsa conversione multis documentis præclarè didicisset; tum verò post suscepta Societatis gubernacula, magis magisque experiebatur in dies; quo in genere, ne sim longior, nonnulla subnectam. Cùm in sumptus quotidianos aliquando esset opus præsentì pecunia; atque nescio quid cõmendum Joannes Gruceius rei domesticæ curator exisset, incertâ etiam tum luce, quidam eî repentè sacculum auro plenum obtulit, ac nihil effatus, illicò sese è conspectu proripuit. Joannes verò, quæ erat simplicitate, ut auri speciem vidit, illusionem ac præstigias diaboli suspicatus, in proximam ædem beatæ Mariæ supra Minervam sese recipiens, divinam opem suppliciter imploravit; domum deinde regressus, pecuniam inspectam & formâ & materiâ probam reperit; Deique clementiam ac benignitatem admirans, in ea quæ destinaverat, sine cujuscumque damno vel molestia insumpsit. Idem, cùm in magnis rei familiaris angustis, Deo superisque in Laterano supplicasset, in reditu ad Colossæum thea-

trum illi subitò vir quidam ignotus aureos centum in manum dedit , ac statim apparere desit. Quare Ioannes non tam lætitiâ quàm horrore perfusus, pecuniam domum attulit. Ignatius verò gratias quidem egit Domino, sed talibus jam pridem assuetus, nihil rei novitate commotus est. Rursus nostris pecuniæ inopiâ laborantibus , quidam è Patribus dum nescio quid exquirat in arcula tomento scrutisque villissimis plena ; nihil minus opianti venit in manus chartaceum involucrum, aureis refertum ita nitidis atque micantibus, ac si tum primùm ex officina prodirent: quo tam insperato subsidio , præsentī egestati peropportunè subventum est. Quodam die sub vesperam , cùm domi panes, vinum, ligna penitus defecissent ; postridie manè , præter omnium expectationem, à nobili matrona vehes lignis onusta submittitur ; ea ligna dum in cella vinaria, ut fit, condit janitor ; januam domus patentem reliquit imprudens : recordatus deinde , cùm ad occludendum accurrisset, repentè modios aliquot frumenti , & vini cados in ipso vestibulo reperit : neque adhibitâ quantâvis diligentia unquam rescire potuit , quis ea dona misisset. Hæc igitur & alia ejusmodi subinde accidebant , quæ , politico supercilio rem æsti-

mantì, frivola cuipiam fortasse videantur; sed certè & paternam in famulos, Dei providentiàm satis declarant; & Ignatij securitatem atque fiduciam ab omni stultitiæ vel temeritatis infamia vindicant.



Ejusdem Ratio gubernandi.

C A P. X.

IN consilio capiendo, & rebus gerendis, cùm Deum semper, ut dictum est, accurata supplicatione consuleret, tum verò (quod mirum fortasse cuipiam videatur) non pietatis gustum, sed rationis ductum præcipuè sequebatur: ut non rationem spiritus dulcedo præiret, sed dulcedinem, ratio. Hoc enim aiebat uno maxime, belluis homines antecellere, quòd hi ratione utantur, illæ nequaquam. Idem ad exequenda consilia, quoad fas esset, omnes artes & humana præsidia sic adhibebat, quasi omnem spem in iis repositam haberet: rursus ita Deum orabat, & ex eo pendebat uno, ac si nihil omnino in rebus humanis opis aut perfugij collocaret: Atque hoc pacto (quod longe

optimum ac perfectissimum est) prudentiam cum pietate iungebat ; ipsaque negotia , tanquam onera paribus examinata ponderibus , quamvis difficili ac lubrico itinere , ad optatos plerumque exitus perducebat. Ad consultandum autem illud observabat in primis, ut in quaque re semper ejus rei peritissimos adhiberet ; qua communicatione ac lenitate nimirum assequebatur , ut & rationes iniret optimas, neque in arte sua se quisquam ab eo vel præteritum , vel contemptum , jure conqueri posset. Ac cæteris etiam in rebus videbat etiam atque etiam , ut uniuscujusque dignitatis , ætatis , ac meriti ratio haberetur. Petronius erat Pisautensis, qui ante aliquot annos mortuus est , egregia pietate & virtute presbyter ; is , cum tres minores natu germanos fratres ad Societatem suis adhortationibus perduxisset ; cum semper Ignatius adolescentulis , loco parentis ac præsidis voluit esse : neque de iis gravius quidquam , nisi ex illius auctoritate ac sententia , statui passus est. Ad officia vel negotia , quæ per se obire non posset , cum viris principibus transigenda , viros eligebat , rerum usu ac dicendi copiam præditos ; atque iis ita vel scripto vel verbis mandata dabat, ut liberum iis omnino relinqueret , cum in rem præsentem

venissent, suo ipsorum arbitrato, cuncta ex re & ex tempore moderari. Idemque sub vesperam ad se redeunti cuipiam ex iis, cum rei gestæ rationem ab eo reposeret, primum omnium: Satin (aiebat) ex animi tui sententia? Quæ liberalitas hominis & ipsi causæ proderat multum, & suorum illi mirè devinciebat animos: & eosdem ad exequenda negotia perquam alacres promptosque reddebat. Anno post Christum natum M:D.LII. cum ad res in Lusitania componendas Michaëlem Turrianum legaret, haud ita pridem in Societatem admissum, licet ei varias præceptiones ac monita ediderit consignata litteris; tamen cum probè nosset fidem ac prudentiam viri non modò permisit, ut, cum in provinciam pervenisset, suo arbitrato consilia rebus aptaret; sed etiam permulta ei dedit folia pura, suo munita chi-rographo, quibus ille, prout opus esset, quidquid videretur, inscriberet; ac deinde obsignatas epistolas, cuicumque expediret, ipsius nomine redderet. Atque hanc consuetudinem laxè cum procuratoribus ac nuntiis agendi, semper magno cum emolumento retinuit. Quin etiam præfectis inferioribus minimè malignè suum cuique jus ac potestatem impertire consueverat: cavebátque diligenter, ne, quæ

per eos agenda forent , usurparet ipse; vel ea re quidquam omnino apud subiectos , de illorum auctoritate vel estimatione minueret. Veruntamen iis ita laxabat habenas , ut easdem adduceret quoties vellet ; nec non in eorum instituta moresque & administrandi genus dissimulanter inquireret. Exstat epistola ipsius ad Præpositum provinciæ Lusitanæ , in hanc sententiam scripta ; cuius mihi partem hoc loco inferere visum est : *Neque verò Provincialis aut Generalis Præpositi officium est , inquit, minuta quæque ; ac temporaria præsertim , in administrando sectari : sed , cum ad personæ dignitatem honestius , tum ad tranquillitatem animi tutius est, ea præfectis inferioribus delegare , & rei confecta rationem , ab eis deinde repetere. Equidem in meo fungendo munere id ipsum sequor : atque huiusce consilij maiorem in dies fructum capio; quippe cum & labore & sollicitudine levare me magnopere sentiam : Ac tibi, quoque valde sum auctor , ut curas & cogitationes tuas defigas in commodis & salute potissimum universa provincia : & in rebus quidem singulis ordinandis ac disponendis , cum opus est , & ipse versere , & hominum tuo iudicio peri-*

eorum sententiam exquiras : Caterùm ab iisdem rebus per te curandis transigendisque , ut plurimum abstineas ; sed instar excelsi cuiusdam motoris , orbes tibi subiectos æquabiliter & cum gravitate ciere pergas : à quibus deinde , ut à proximis causis , propria cuiusque effecta proveniant : Quod si feceris , & plura , & magis tuo muneri convenientia , sine tumultu ac trepidatione confeceris. Præterea illud est in hac ratione commodi , quòd si quid in agendo peccetur , ejus peccati præstat in tuis administris , quàm in te , residere culpam : ac multo magis decet , quidquid ipsi deliquerint , corrigi abs te ; quàm si tu erraveris , (quod perfacile est singula curiosius persequenti) te ab inferioribus emendari. Quod reliquum est , nobis Dominus IESUS CHRISTUS ad ipsius voluntatem & clarè intelligendum & ritè exequendam pro suâ benignitate lumen ac vires impertiat. Roma xi. Kalendas Januarias M. C. LII.

Hanc igitur Societatis gubernandæ regulam instinctu planè divino tenebat Ignatius , eamque in omnes partes plurimùm aiebat valere. Primum , quòd inferiores Præfecti , quò plus credi sibi , & quò liberaliùs tractari se vident , eò libentiùs ,

ne videlicet humanitate vincantur , ultro ipsi cum superiore communicent : Deinde , quòd multò acriùs ac studiosiùs versentur in opere : nam ut quisque maxime suum habet negotium , ita summam in ejus procuratione vigilantiam præstat. Accedit , ut major sit in dispiciendo ac statuendo claritas , majus auxilium Dei ; quippe sicut in rebus communibus cum universali Præposito, Numen cæleste præcipuo favore conspirat ; sic idem propriis cujusque Præfecti muneribus, suo quodam ac peculiari munere assistit: Quorum si facultas & auctoritas à superioribus nimis arctè circumscribatur, & quæ per hosce tractanda sunt , illi suscipiant ; primùm ipsa diffidentia odiosa est ; Et , ut in alienis quodammodo rebus , continuò languescit industria. Ad hæc per eam cupiditatem & ambitionem, peculiaris ille, de quo dictum est , divinæ gratiæ quasi concursus amittitur. Præterea , cùm ad rem bene gerendam & facultas & scientia necessariò requirantur ; scientia plerumque inest ei, qui rem ipsam ex officio tractat , habetque subjectam oculis; huic si minuatur jus, & Superior ipse, causâ non æquè benè cognitâ , rei transigendæ se immisceat ; ingenti prorsus malo potestas à cognitione sejungitur : atque hinc nimirum in omni

cœtu suspiciones, discordiæ, rixæ; cùm rectores & curatores non contenti suo munere, alter in alterius partes invadunt: pèrque summam confusionem tollitur discrimen officiorum, & ordo ille, quo nihil est in hac rerum universitate præstantius. Denique ubi is, qui destinatus est quópiam, certis alligatur præceptis, rarum est ut quidquam è sententia possit efficere: magna enim consilij pars est in tempore; & novis quotidie casibus interdum ipsa negotiorum species immutatur: quibus in rebus dum religione occupatus animus hæret, dum fluctuat apud se, dum cogitur ad absentes referre: interim, irreparabili sæpe damno videlidet, occasionis prætervolat opportunitas. Quæ cum præclare Ignatius nosset, cum suis adjutoribus procuratoribúsvæ, nisi sic res aliter postularer, eâ quam dixi facilitate utebatur. Itaque & in magnis & arduis plerúmque actionibus voto respondebat eventus; & tanta erat ipso regente concordia, is ordinum consensus, ut Societas tota uno eodémque spiritu ductúque agi videretur. Benevolentiam & charitatem suorum erga se non solum affabilitate, mansuetudine, cæterisque virtutibus, verum etiam industriâ quâdam alebat: cavebátque diligentissimè, ne quid admitteret, cur eorum quispiam ab illo


se minùs vel diligi vel probari putaret; quod in creando primùm Generali Præposito servavit, ut dictum est; ac deinde retinuit in sufficiendo sibi, cùm ægrota- ret, Vicario Generali: nec non in eli- gendis, qui Marcello Pontifici maximo, ut item supra dictum est, Pontificis ipsius jussu, in Palatio adisterent; quam nominationem ad ipsorum Patrum con- silium rejecit; ne certos ipse appellan- do, cæteros ad ejusmodi munus minùs idoneos judicasse videretur. Præterea, si quid pro imperio asperiùs exequendum esset; ejus invidiam ad inferiores admi- nistros rejicere solitus est, ipsis videli- cet non invitis; communemque paren- tem piè ac religiosè tuentibus. Qui ho- minibus cum potestate præsunt, hós cùm aliæ fraudes & mala circumstant, tum illud in primis, de quo sanctus Ber- nardus ad Eugenium: *Est item vitium, inquit, cujus si te immunem sentis, inter omnes qui cathedras ascenderunt, sedebis me judice solitarius; quia veraciter singu- laritérque levasti te supra te, juxta Pro- phetam: Facilitas credulitatis hac est, cujus calidissima vulpecula, magnorum neminem comperi satis cavisse versutias.* Ab hoc igitur scopulo, sicut à cæteris, magnopere Ignatius declinabat: quippe

satis ad omnem animadversionem ipsa
 varietate suorum temporum eruditus ; ac
 delatoribus ita unam aurem præbere con-
 sueverat , ut semper alteram reo reserva-
 ret absenti, Quin etiam accusatoris ipsius,
 inter dicendum , gestus , oculos , vultus-
 que omnes attentè observabat ; crebrisque
 ac minutis interrogationibus , veritatis
 eliciendæ gratia , fatigabat hominem : to-
 tam deinde rem , si opus esset , per se &
 per idoneos viros omnibus vestigiis inda-
 gabat leniter ac sine tumultu : cavebátque
 non modò ne quenquam damnaret in-
 dictâ causâ , verùm etiam ut ne quid om-
 nino præjudicati ad causæ cognitionem
 afferret. Illud etiam , in rebus præsertim
 gravioribus, observabat interdum , ut ac-
 cusatorem juberet sua manu scribere, quæ
 deferret : primùm quòd hominum natu-
 ram pronam esse ad maledicendum intel-
 ligeret , & stylum quàm linguam longè
 faciliùs contineri : tum etiam , ut si quod
 mendacium , ut fit , tempore procedente
 extitisset , id ipso delatoris chirographo
 teneri & coargui posset. Atque hoc tem-
 peramento fiebat , ut neque si quid gra-
 vius accidisset , ignoraret Ignatius ; neque
 innocentes per calumniam aut per factio-
 nem circumveniri vel opprimi sineret.
 Idem omnes reipublicæ partes vigilanter

curabat , neque committebat (in quo graviter à magistratibus ferè peccatur) ut dum unam amplecteretur , desereret alteram. Veruntamen præcipuâ quâdam fuit observatione in hominibus ad Societatem adscribendis : Quam ille rem tanti momenti ducebat esse ; ut cùm alioquin é custodia corporis evolare quàm primùm optaret , hanc unam ob causam in aliquot annos propagari sibi vitæ spatia cuperet ; quoad nimirum tyrocinij formula ac disciplina ad Societatis usum & institutum probè constituta foret. Tyrones autem ille , non à naturali quadam bonitate , vel potiùs tarditate ; sed à vigore magis ingenij , & rerum gerendarum adjumentis , legebat ; negabatque , qui ad populi negotia factus non esset , eundem esse ad ministeria Societatis idoneum. Quòd si quis bardum quempiam eo nomine obtruderet , quòd ipsum utique è sæculi naufragio diceret evasurum ; nihilominus recusabat Ignatius , neminem affirmans è Societate Jesu dicendum esse , quæ ad suam unius , non etiam ad aliorum salutem , & acriter & scienter posset incumbere. Quos autem ad probationem admiserat , eorum spiritum dabat operam ut quàm plurimis experimentis cognosceret penitus : neque illos tantùm ad suavem quandam sensum

pietatis (quo imperiti omnia metiuntur)
 sed ad veras ac solidas virtutes erudiebat :
 ac præsertim (quod sæpe jam diximus)
 ut ad nullius rei quamvis cæteroqui lauda-
 bilis amorem , tanquam ad scopulum ad-
 hærescerent ; sed ab omni alia cupiditate
 vel etiam propensione soluti ac liberi , ex
 uno tantum superiorum nutu ac volunta-
 te pendērent : neque assuescerent abditos
 eorum sensus exquirere , vel imperia scis-
 citari ; vel quem , quibuscumque de causis ,
 iidem , aut supra cæteros tollerent , aut
 etiam infra , suo arbitratu deprimerent : sed
 illis omne iudicium & consilium à superis
 datum , sibi simplicitatis & obsequij glo-
 riam esse relictam putarent : essentque pro-
 inde ad omnia quamvis ardua & absurda
 & subita paratissimi. Omnes omnium que-
 rimoniae perbenignè audiebat , ac solaba-
 tur verbis humanissimis ; atque etiam di-
 ligenter curabat , ut salvâ religionis disci-
 plinâ , & Præfectorum dignitate , unicui-
 que satisfaceret. Neque verò minori vigi-
 lantia & severitate Præfectos ipsos , quam
 reliquos omnes in officio continebat ; quia
 etiam tantò plura majoraque ab illis ,
 quam ab his , exigere solitus est , quantò
 superiores inferioribus , gradus & virtutum
 insignibus , antecellunt. Idem , in respon-
 dendo agendoque , simplicitatem ita cum

cautione conjunxit, ut satis appareret, alteram alteri non modò impedimento non esse, verum etiam ornamento atque præsidio Suspenſa, vel ambigua, vel obscura verba, perplexum de industria incertumque sermonem, uti barbaras artes, & subdola mendacij tegumenta, fideique ac societatis humanæ perniciem, semper est detestatus; ac suo monstravit exemplo veritatis cultor eximius, quantum inter prudentiam & calliditatem interſit.



Ejusdem Ratio proximos adjuvandi.


C A P. X I.

MIRÆ fuit ſolertiæ in ſolicitan-
dis mortalibus, & à diaboli ſer-
vitude ad Chriſti Domini obſequium
traducendis: ac quibus artibus Dæmon
ad animarum perniciem utitur, eaſdem
ipſe (quoad liceret, ac fas eſſet) ad
hominum ſalutem ac beneficium trans-
ferebat. Voluntates ac naturas eorum,
quibuſcum ageret, feſtinè odorari; am-
bitioſis ſplendida, avaris utilia, volu-
ptuoſis jucunda proponere; & ſuo, quod
aiunt, hamo vel eſcâ quemque piſcari.

Jam in congressu, maximè Principum, id observabat in primis, ut sermonis initia illis daret, extrema reservaret sibi: cavebátque ne de rebus etiam divinis ineptè, vel ad satietatem ac fastidium ageret. Tristem verò & horridam sapientiam, utique postquam in lucem hominum prodiiit, semper vitavit: cùmque philosophiæ nomen ipsum intelligeret, etiam si modestè tractetur, tamen satis odiosum esse per se; nihil in habitu suo, vel in genere vitæ, rarum aut notabile conspici voluit; ac semper sese, quibus rebus honestè ac religiosè potuit, ad communem consuetudinem accommodavit; neque commisit, ut quod ipse non faceret, id in aliis reprehendere putaretur: prorsus ut, ejus mores prima fronte vel eminùs intuenti, unus aliquis è populo videretur esse: verùm quò propius illum inspiceres, quò diutiùs ac familiariùs uterere: eò magis præstantiam virtutésque viri, tanquam odorem ex affrictu, sentires; atque id ipsum est causæ cur Nostris nullam in vestitu ornatúve religionis injunxerit notam: sed quò faciliùs in hominum cœtus & consuetudinem irreperant, ac tempestivis colloquiis unumquemque adjuvarent; ubicumque gentium versarentur, quàm modestissimo ejus gen-

tis habitu iussit incedere: neque ullum dare signum animi à sensu communi vel ab humanitate abhorrentis. Idem valde vituperabat moderatores animarum eos, qui vel unâ eadémque viâ, ac ferme quam ipsi tenuissent, cæteros etiam ad studium virtutis conarentur adducere; vel duntaxat si quis ad pietatem esset sua sponte propensus, formandum regendúmque susciperent: sed ipse nimirum vel feros & barbaros homines non dubitabat aggredi, sic, ut à singulis quod dabatur acciperet: & quos ad consilia Christi provehere non posset, certè ad præcepta sensim allicere nitebatur: Atque ut bonus agricola non tantùm rectas & fructuosas arbores, sed etiam depravatas neque ita fertiles colit: easque vel adminiculis erigit, vel circumcidendo castigat, vel sub aliena latentibus umbra cœlum aperit, vel telluris vitio laborantibus mutat locum: sic ille, rerum difficultate nequaquam exterritus, dispiciebat in primis quod ingenium qua ratione tractandum esset; iisdemque sæpe morbis, pro varietate naturæ, non diversas modò, sed etiam contrarias inter se medicinas adhibere consueverat. Quòd si quem, omnia expertus, tamen è cœno peccatorum extrahere nequivisset; non ideo contrahebat animum, vel se angori

dabat , quasi oleum & operam perdidisset : sed conscientia & officij fructu contentus , acquiescebat in alto Providentia divina consilio. De spirituum discretionem , (quam ille scientiam habuit maximam) deque moderandis affectibus , multa praecepit egregie : quae quoniam extant scripta , (quemadmodum initio diximus) nihil est quod à nobis hoc loco ingerantur.



Vita ejus quotidiana & domestica.


C A P. XII.

SOCIETATI Praepositus , devexa jam ætate , vivendi privatim hanc ferme normam tenebat. Manè , ut primùm evigilasset , certum tempus dabat precationi & contemplationi bonorum cœlestium : deinde , si sacrificandum illi esset , (quod munus , propter summam animi attentionem , & corporis imbecillitatem , sæpe intermittere cogebatur) sacro , sub vesperam pridie , ad Urbis consuetudinem ordinato , & accuratè præcognito , rem divinam faciebat : quæ recitanda forent , vel

in privato facello, nemine præter administrum adstante, contra morem Hispaniensem, elatâ pronuntians voce: usque adeò Ecclesiæ Romanæ ritus omnes & cæremónias adamaverat. A psallendo quamquam invitatus abstinerebat, quòd ei propter vim lachrymarum, & frequentem ecstasim, quâ corpus mirè affligebatur, ejusmodi officio summus Pontifex nominatim interdixerat. A sacro, si cujus negotij causâ prodeundum esset, comite uno prodibat: si minùs, admittendis audiendisque vel domesticis, vel externis operam dabat, serena parique semper, ut diximus, fronte: minimè suspiciosus ille quidem aut timidus; attamen apprimè circumspectus ac providus; ut illi non facilè quisquam posset imponere. Actiones autem omnes è divi Basilij præcepto condiebat tacitæ precationis salse: séque ipsum, ut dictum est, excutiebat subinde, nequid labis exquotidiano mortalium rerum usu contraheret. A prandio, post gratiarum actionem, remissionis causâ, de rebus haud ita seriis molestisque sermones habebat jucundos; qui tamen, ut plurimum, ad agendi & gubernandi scientiam facerent. Inde vel actibus publicis, vel subscriptioni lectionique epistolarum, tempus dabat; ac multa etiam, prout res exigeret, suâ manu

exarabat ipse. Tum, si hora suppeteret, suorum acta recognoscebat. A cœna verò, insequentis diei negotia disponebat; accersitisque administris vel procuratoribus, sua cuique separatim dabat mandata; deinde cum eo, quem sibi à secretis elegerat, per otium agebat: eo dimisso, ad multam noctem solus inambulabat innixus baculo, majorem in modum attentus meditantisque apud se: postremò, quod supererat temporis, necessariae tribuebat quieti; id erat spatium horarum circiter quatuor. Cubiculo usus est perangusto ac tenebricoso: cujus formam nec successores quidem adhuc, religionis, ut puto, causâ mutarunt. Cibi potúsque fuit adeò parcus, ut gustatum funditus perdidisse videretur: nisi si quando pauculis vesceretur castaneis, quibus patrio more puer olim assueverat. Nulli unquam ferculo, quamvis famelicus ac jejunus, arripit: nullo edulij vel condimenti genus cuiquam indixit; nihil unquam inter edendum est questus: licet per adiutorum inscitiam incuriamve, cibaria malè cocta conditâque, vinum etiam fugiens aut acidum præberetur. Nihil denique sibi propriè apponi voluit unquam: & graviter administrum aliquando punit, quod uvæ racemum uni sibi præter cæteros attulisset. Quæ sanè

peritus rerum æstimator haud ita leviter duxerit, si hominis vel ætatem ipsam, cui multa dantur, vel infirmitatem valetudinis, plura imperantem; vel denique summam inter suos potestatem; & licentiam, ut ita dicam, sub arbitrato vivendi, consideret. Munditias in victu cultûque dilexit, sed faciles, & nequaquam exquisitas: cujuscumque & viatorem & Christi famulum decent: placuitque ei semper, ad alliciendos præsertim homines, ut dictum est, non incompta frugalitas. Ac de Ignatio quidem (quod me non fugit) alia id genus multa narrantur: verum singula persequi necesse non est: tantum ad viri mores virtutemque intelligendam, hæc pauca libavimus.



*Pietatis opera publicè per eum
instituta.*

C A P. XIII.



INTER ipsam Societatis administrationem, cui potissimum inserviebat, non exiguam partem curarum aliis quoque rebus impertiit, atque his maximè, quæ ad salutem & commo-

dum populi, atque ad splendorem ac digni-
 tatem sanctæ Romanæ Ecclesiæ pertine-
 rent. De curandis ægrotis, & Pœnitentiæ
 Sacramento, Innocentij III. Papæ lex est
 Ægrotos, nisi peccata ritè confessos, à
 prima inspectione medici, néve adeunto,
 néve curanto. Ea lex cùm ipsa desuetudine
 propemodum antiquata esset, perfecit Ig-
 natius ut salutaris illa consuetudo longo
 intervallo revocaretur; visendi tamen spa-
 tio in alteram usque vicem extracto: qua
 moderatione videlicet, simul & publicæ
 existimationi, & singulorum animis cor-
 poribúsq; consultum est. Mulierculas à
 maritis cum pudicitia capitisve periculo
 dissidentes, matronis ditioribus in officio
 continendas ac sustentandas dividere con-
 sueverat: sed cùm cresceret numerus; ne
 cui gravior esset impensa, locum iisdem
 recipiendis alendisq; publicè parare con-
 stituit; suúmque consilium impertiit pri-
 moribus civitatis: quibus rem ita proban-
 tibus, ut nemo tamen se profiteri vellet
 tam gloriosi operis principem, hanc ra-
 tionem Ignatius iniit, rei ad exitum per-
 ducendæ: Ex area templi nostri Petrus
 Codatius procurator, lapides ingentes ef-
 foderat, cujuscmodi multi ruinis veteribus
 continentur: Hos igitur lapides in magna
 rei familiaris inopia vendi, & summam


ex iis confici aureorum centum Ignatius imperavit : Eam pecuniam cùm ad opus inchoandum primus in medio posuisset, tantum reliquis ardorem iniecit, (insitâ mortalibus naturâ properè sequendi quæ inchoare piguit) ut ex voluntaria collatione institutum sit cœnobium, quo ejus generis fœminæ sese reciperent ; ibique securæ tandiu delitescerent, quoad compositis controversiis in gratiam cum maritis redirent : Atque idcirco cœnobium (ut supra diximus) Malè nuptarum vulgò appellatum est. Adejus autem loci custodiam atque administrationem, Ignatius piorum hominum sodalitatem adhibuit, prudenti sanè consilio. Etenim in communem utilitatem intentus, ne uno duntaxat munere implicitus teneretur, ut quodque opus absolverat, confestim ejus operis procuratione certis atque idoneis hominibus demandata, ipse animum & cogitationem ad alia deinceps atque alia transferebat. Parthenonem etiam sanctæ Catharinæ, cù à Funariis, vel à Rosa cognomen est, Ignatius idem instituit : quo in Parthenone, puellæ forma eleganti, quarum pudicitia periclitaretur ob angustias rei familiaris, magnâ præfectorum diligentia conquiritæ, interdum etiam pro potestate, si res exigat, è complexu pa-

rentum abreptæ , hodie ad centum & quinquaginta sub claustris , & sanctimonialium fœminarum disciplina , magno labore & impensa educantur ; eædémque, simul atque maturum est , vel perpetuæ religioni & castitati sponte se consecrant; vel idoneis viris dantur nuptui, dote à loci præsidibus persoluta. Non minùs laudabile quod sequitur. Cùm plurimi bonæ interdum indolis pueri & puellæ , ut in urbe plena peregrinis & advenis , destituti vel orbi parentibus , miserandum in modum per plateas & compita seminudi & egentes errarent ; utriùsque sexus & commodis & salutis , eodem Ignatio suadente , provisum est. Itaque ex eo tempore, duabus in ædibus, hoc est sanctæ Mariæ in Aquiro, & sanctorum quatuor Coronatorum , masculi seorsùm ac fœminæ, & gratis aluntur , & rudimentis Christianæ fidei, ac partim literis partim etiam necessariis ad usum reipublicæ artibus atque opificiis imbuuntur. Utriusque autem sexus est hac tempestate numerus capitum ampliùs ducentorum ; quorum illi præter domesticas exercitationes , ad funera quoque prosequenda psallentes & candidati procedunt ; hæ, ubi adoleverint, vel maritantur , vel in sacratarum virginum collegia sese conferunt. Quin etiam

quod olim in patria sua perfecerat, id ipsum Romæ quoque molitus est: ut ulcerosi ac mendici per compita miserè queritantes, unum in locum coacti, publicâ impensâ ex censu & collationibus alerentur; eamque rem ingenti civitatis approbatione ad exitum perduxisset, ni pauci potentes, nescio quo spiritu impulsî, huic tam præclaræ actioni obstitissent. Ad hæc, è quisquiliis Hebræorum si cuipiam Evangelij lumen affulserat, hunc hospitio confestim acceptum Ignatius pro sua tenuitate liberaliter ac benignè tractabat, quoad Christianis præceptionibus eruditus baptismatis fonte renasceretur: neque à procurandis neophytorum commodis antè destitit, quàm ex auctoritate summi Pontificis ædes paratæ sunt, quas Catechumenorum appellant: quibus in ædibus hodie, masculos seorsum ac fœminas; cùm aliorum, tum præcipuè Gregorij XIII. Pontificis maximi munificentia, largè sustentat. Atque etiam (quod expressius charitatis argumentum est) baptizati ex eo loco non antè mittuntur, quàm aut literarum præsidio, quas interim edocentur, aut artis cujuscumque, necessaria sibi in reliquam vitam adjumenta paraverint: quo pietatis officio multi ex eadem secta permoti, magno bonorum gaudio, sese quotannis

quotannis ad Christum adjungunt. Illud verò optimum, quòd ad Catholicæ fidei reliquias in Septentrionali plaga fovendas augendâsque, auctore atque adjutore in primis Joanne Morono Cardinali amplissimo, Seminarium clericorum in Urbe condidit, dato negotio nostris hominibus, qui conquistos bonæ indolis adolescentes, Romam ex iisdem regionibus mitterent: atque id Seminarium, sive collegium Germanicum, ut appellant, acerbissimis deinde tempestatibus, ingenti labore ac perseverantia tutatus Ignatius est; præstantissimis è tota Societate doctoribus ad eam juventutem & literis & moribus instituendam adhibitis: quod opus & Ecclesiæ Romanæ ornamento, & Germaniæ magno adjumento & fuisse & esse hodie, vel maximè constat, cum in ejus penè collapsi instaurationem & amplificationem, idem Gregorius XII I. pro sua præcipua in eas nationes clementia & voluntate vehementer incubuit. Nec Germanicæ modò, sed cæterarum quoque gentium pueros & adolescentes Ignatius, piis ac liberalibus disciplinis imbuendos, (quam unam expeditissimam emendandi generis humani rationem ducebat esse) per se suosque, admonitu planè divino suscepit: atque ob id ipsum gymnasia, quibus æquè

infimi ac summi gratis erudirentur, non Romæ solùm, sed etiam toto penè terrarum orbe constituit, summâ adhibitâ curâ, ut ne quid professores nostri, quamvis acutum & plausibile, afferrent peregrini vel novi dogmatis, nedum ab orthodoxa fide abhorrentis; verùm in singulis quæstionibus, celeberrima quæque & probatissima doctorum placita sequerentur.



Quadam de Ignatio mira.

C A P. XIV.

RÆTER ea quæ superioribus libris Ignatio divinitus accidisse retulimus, non pauca de eodem admirabilia prædicantur; quorum aliqua nobis hoc loco exponere visum est. Recenti conversione, Hierosolymam petens, dum Barcinone transmissionem expectat, interea divinam rem, sacras conciones, & alia religionis officia quàm accuratissimè obire non destitit. Accidit autè aliquando, ut cùm in templo verbum Dei audiret, conspicata hominem fœmina princeps, peregrini habitu, fæci plebis immistum, videre sibi visa sit ejus caput ac fa-

ciem eximio quodam fulgore splendentem, idque tanta sua cum animi voluptate, ut quanquam invita ac repugnans modestiæ causa, tamen ab eo aspectu oculos nulla ratione posset avertere. Igitur concione dimissa, nihil ei fuit antiquius, quàm ut mariti permissu, peregrinum per idoneos homines oppido conquistum, hospitio acciperet; qui domum ingressus, percunctantibus illis, quis aut cujas esset, peregrinari se Hierosolymam dixit, neque de se ipso verbum ultra addidit: verum enim vero, sermonem de rebus divinis instituens, omnes, qui aderant, cælesti quodam solatio lætitiaque perfudit. Qua re vehementiùs etiam permoti, operam dedere, ut nobilis quidam vir, ipsorum propinquus, in Italiam trajecturus, unà cum Ignatio conscenderet, rati, navigium utique tali vectore perire non posse; neque eos fefellit opinio: siquidem alia navis, cum eodem ferè tempore vela fecisset, non longè à portu vi tempestatis absorpta est; at verò qua Ignatius vehebatur, celerissimo cursu Caietam incolumis tenuit; post reversionem verò, dum Barcinone, ut initio dictum est, Grammaticæ rudimentis operam dat, res accidit ad viri sanctitatem illustrandam, haud levis momenti. In patria Beatae MARIÆ, cui à Mari co-

gnomen est, ad plateam Lullianam, Liffani duo fratres de patrimonio diutius litigaverant. Ac denique à iudicibus latâ sententiâ, is qui causâ ceciderat, præ nimio dolore ad ultimam desperationem reductus, impulsu Dæmonis, è cubiculi trabe laqueo se suspendit: ea re cognita, vicini ad tetrum illud spectaculum confluunt, mirantes hominis facinus, miserantes insaniam. Id simul atque Ignatius audivit, confestim advolat, pendentem ex infelicitigillo restem præcidit, hominem vel cadaver potius collocari jubet in lectulo; deinde seorsum nixus genibus pro salute ipsius, Deum orare non sine lachrymis institit. Res mira; deprecante Ignatio, cunctis qui aderant in lectulum obversis, & expectatione suspensis; miser illè repente sustulit oculos, vocisque usum eatenus duntaxat recepit, quoad vocato celeriter in id sacerdoti peccata ritè confessus, ac demum expiatus, animam è Tartari faucibus ereptam Domino reddidit; cujus rei fama totam urbem finésque illos magna cum omnium admiratione pervasit; & supersunt hodie, qui meminerint: à quibus ego id ipsum Barcinone diligenter quæsi. Ac multo pòst, Romæ, constituta jam Societate, aliud non minùs mirum Ignatio contigit. Cum Alexandro Petro,

nio, cujus antè meminimus, & medico & philosopho insigni, magnum usum amicitiamque contraxerat. Ad eum ægrotum aliquando vicissim ipse visendi causa cùm adiisset, quanquam alieno tum tempore, tamen pro familiaritate à domesticis introductus, occlusis fenestris in lectulo quiescentem invenit: & ex tenebris ratus hominem sopori sese dedisse, suspenso vestigio tacitus adrepens, pulvino sensim affedit; ac nihilominus Alexander è somno excitatus, & repentè Felicitatem uxorem reclamans: Quis novus hic splendor, quæ tanta, inquit, lux cubiculum complet? At illa simpliciter, id quod erat, unum Ignatium introisse respondit. Tum Alexander, homo gravis & prudens, non dubio argumento, viri sanctitatem interpretatus, ex eo die Ignatium, tanquam humano fastigio celsiorem, magis magisque suspexit: totamque deinde rem ipse mihi aliisque seriò exposuit. Parisiis, Michaël quidam Hispanus, quem Romæ deinde falsæ criminationis ministrum in Patres fuisse diximus, impatienter ferens patronum suum Franciscum Xaverium, è medio honorum cursu ad studium humilitatis Christianæ traductum fuisse; irâ percitus, Ignatium, utpote ejus rei auctorem interficere omninò constituit: cùm-

que in hospitium ipsius ultrò invasisset, strictoque jam gladio scalas furibundus ascenderet, divina repentè voce perterritus: Quò tendis infelix? retulit gradum, totamque rem conscientia victus postmodum ipse confessus est. Anno à Virginis partu, M. D. L I V. Rodulphi Pij Cardinalis operâ, Societatis collegium ad Lauretanam ædem institutum est; acciditque, ut domus nostris ad habitandum attributa, Lemurum terroribus & Faunorum ludibriis admodum esset infesta; cùmque noctu præsertim, modò hi, modò illi, detractis è cubiculi stragulis, vel insolito quodam cachinno excitati, per cæcas tenebras trepidarent; ad eam pestem avertendam multa nequicquam experti, denique per epistolam ad sacrificia & preces Ignatij, tanquam ad sacram anchoram communi consensu confugiunt. Illere cognitâ, Deum attentè precatus, rescripsit sociis, bono essent animo, Divino præsidio freti, (quod in tali re fecerat ipse non semel) Dæmonum terriculamenta nihili ducerent. Mirum dictu, recitatis literis, omnes confestim eâ molestiâ spectrisque non modò in præsens, verùm etiam in posterum liberati sunt. Cùm Ignatij defuncti corpus, exequiarum causâ jacêret in feretro, Bernardina quædam Romana, filiam, strumis

iam diu laborantem, quam arte nulla medici sanare valuerant, ad osculandas mortui manus admoveere vehementer optabat; certam ex eo contactu, filiae valetudinem sibi pollicita: sed cum præ turba, impetu sæpe capto, puella nunquam ad feretrum accedere potuisset; denique mater, quippe quam filiae charitas valentiolem audaciorémque reddebat, non antè destitit, quàm ex Ignatij vestimentis frustulum adepta est; id frustulum virginis collo simul atque alligatum, velut præsentì Numinis ope, morbus evanuit: cujus miraculi rumor cunctis, ut par est, admirantibus, longè latèque manavit. Ac ne prophetiæ quidem insigni dono caruisse putandus Ignatius est, siquidem aliqua partim abdita aperuit, partim longè à conspectu remota monstravit, partim etiam multo pòst futura, sine ullo errore prædixit. In iis, qui Barcinone Ignatium maximè coluère, ac præcipuum ex ejus consuetudine & monitis fructum utilitatémque cepère, vidua quædam fuit nomine Agnes, è Paschala familia; hæc cum cætera charitate Ignatium adjuvit, ejusque sustentavit inopiam, tum Parisios proficiscentem, ad usque templum S. Andreæ, tria millia ab urbe passuum, officij causâ prosecuta est, unà cum Joanne filio, optima spe summæ virtutis ac pie-

tatis adolescentulo. Hunc in digressu cū oscularetur Ignatius, eique præcepta in reliquam vitam paterna daret: Cur, inquit ille, cū alij abs te exculsi, tuisque monitis incitati, vel CHRISTI consilia sint sequuti, vel certè in virtute magnos progressus effecerint, me unum, parens optime, rudem informemque destituis? quid misero mihi te absente futurum est? Atqui bono animo esto, fili, respondit Ignatius, nequaquam tibi deerit exercendæ patientiæ, deque DEO bene merendi materies: nāque ubi adoleveris, uxorem duces, multisque incommodis afflictaberis, quæ te solvi deliciis, & in auxilio divino implorando torpere minimè patientur. Neque abfuit dicto fides; siquidem post aliquot annos, ille contracto matrimonio, multos suscepit liberos; cūque haud ita dives esset, debitorum fraude, quibus non exiguam pecuniæ summam crediderat, rei familiaris naufragium fecit, hodièque confecta jam ætate senex, seque familiamque suam quotidianis laboribus ægrè sustentat. Ejus deinde Agnetis mortem, Barcinone sanctissimè obitam, Romæ Dei monitu præsensit Ignatius, ut literæ Antonij Araozij, qui morienti viduæ affuerat, nihil ei super illa re novi postmodum attulerint. Quidam haud ita.

pridem in Societate versatus, cùm ex imposito sibi munere tanta molestia afficeretur, ut somnum capere vix posset, ac de repetendo sæculo cogitaret; Ignatius rem divinitus odoratus, adolescentem nocte intempesta è lectulo vocari ad se iussit, alioqui fratrum necessitatibus, mirum in modum parcere solitus. Is cùm animo valde perturbato venisset, fictâ personâ quæsit ex eodem Ignatius, si quis hac vel illa tentatione sollicitaretur, quidnam ei consilij daturus esset? ac per eam sermocinationem, omnes illi obstupescenti, sensim ejus animi recessus ac latebras patefecit simul, & perturbationes admirabili dexteritate sedavit: Eodémque charitatis officio erga alios quoque multos pari perspicacitate perfunctus est; qui cùm suos morbos propter inscitiam aperire non possent, ultrò iis ipsemet ante medicinam, & genus ægritudinis & causas detegebat. Vicetix, Fabro & Laine comitibus, dum ex voto finem anni vertentis expectat, cæteris item Patribus ob idipsum Venetia ditione dispersis, repentè affertur, Simonem Roterigium, Bassani, gravissima febrî correptum, in extremo versari vitæ discrimine; quo nuntio perculsus Ignatius, licet ipse quoque febricula teneretur, tamen illico surgit, ac Jacobi Lainis, qui

gravius laborabat, curâ piis hominibus demandatâ, sequente Fabro, se pedes in viam dat, eodémque die passuum octodecim ferè millia confecit, eâ quidem celeritate, ut præcedentem vix Faber consequi posset: Cúmque ex itinere, de Simone sollicitus, orandi causa paululum è semita divertisset, supplicatione peracta, sensit auditas preces; atque ad Fabrum rediens, pro certo affirmavit, Simonem è morbo evasurum: Ad quem ut venit, arctè complexus hominem, læta omnia sperare & certam sanitatem expectare iussit. Nec sanè frustra; quândoquidem Simon paulo pòst, contra omnium opinionem, pristinæ valetudini reditus est: atque id beneficium, hodiéque secundum Deum, Ignatio sese acceptum referre testatur. Haud longè à Bassani mœnibus, loco edito, templum cernitur beati Martyris Viti, ex quo in subjectam cōvallem despectus est, cùm cætero cultu visendam, tum crebris aquarum è Medoaco amne derivationibus. Id templum eo tempore tuebatur solitarius quidam, Antonius nomine, vir doctrinarum expertus & idiota quidem ille, veruntamen severus & gravis, & ipso totius corporis atque oris habitu venerabilis; ac proinde apud illas gentes magnâ virtutis & sanctitatis opinione. Is Ignatium nihil insigne præ se fe-

rentem, elato supercilio (ut ipse postea fatebatur) contemnere apud se cœpit, ac parvi facere; quoad intentiùs aliquando supplicanti demonstrare dignatus est Dominus, qui vir & quantus esset Ignatius, quamque multorum adjumento & saluti, divinâ providentiâ destinatus; ex quo suam ille temeritatem dolenter accusans, Ignatium studiosè dein colere, atque observare instituit. Per eosdem fortè dies quidam ex Ignatij sociis, partim Anachoretæ consuetudine, partim etiam ipsius loci amœnitate captus, ita cogitare cœpit apud se; Hem, Ignatij comites, vexatis tanto labore, tanta rerum omnium difficultate corporibus, de animorum insuper salute periclitamur: rarò, quam extulimus domo mentem spiritumque referimus: nimium pulveris sordiumque campestri hoc opere & exercitatione colligimus; ac cæteris quidem major forsan gratiæ divinæ fiducia, plus virium fuerit ad obvia quæque superanda; mihi verò meæ infirmitatis præclarè conscio nōne conducat, procul negotiis tumultibúsque cœlestem in terris vitam, unà cum hoc sancto eremi cultore transigere, & abjectis multiplicibus curis, uni Deo vacare? Hæc apud se identidem reputanti occurfabant ex altera parte Ignatij charitas, dulcedo sociorum, cœpta com-


munia, datæ dexteræ, & deferendi nefas. Ejusmodi cogitationum æstibus cùm aliquandiu fluctuasset, denique consultandi causa Anachoretam ipsum adire constituit; sed nequaquam cessit illi res è sententia; quippe vixdum extra oppidum extulerat pedem, cùm ei uni spectrum est objectum, armatus vir trucibus oculis, stricto gladio minitans. Exterruit primò ea species hominem: dein impetu capto cùm nihilominus pergeret; iratus ille ac furens in obvium irruere visus. Tum verò peregrinus haud dubiè terga dat, ac sine respectu in oppidum avolat, mirantibus incolis, quod tam effusè fugientem aspicerent, nemine persequente. At ille à præcipiti cursu non antè destitit, quàm in ipsius Ignatij diversorium sese cum insana trepidatione conjecit. Cui subridens Pater (totam quippe rem Deo revelante cognorat,) Siccine titubas? inquit: Modicæ fidei, quare dubitasti? Qua ille interrogatione, & in præsentia valde compunctus; & in posterum, ne ab instituto deficeret, magnopere confirmatus est. Cùm Joan. Codurius, è primis Patribus unus, è gravi morbo in ultimum vitæ periculum esset adductus, ad rem divinam pro socij salute faciendam, Ignatius ædem sancti Petri in Monte aureo petiit; cujus & loci, & Apo-

stoli, ut supra diximus, præcipua quadam religione tenebatur; cùm ad medium ferè pervenisset pontem Janiculensem, qui Sixti pons hodie dicitur; sublati intentisque repentè in cælum oculis, retulit pedem attonito similis; ac deinde conversus ad comitem, (is erat Baptista Viola Parmensis, ex quo hæc ipsa cognovi) Domum redeamus, inquit: Codurius noster migravit è corpore. Creditus est Ignatius ex illo stupore, & siderum intuitu, & repentina reversione, ut olim Hozij, sic tum Codurij animam vidisse cælum intrantem: licèt justis fortasse de causis de hoc celaverit, quod justas item ob causas, de illo non reticuerat; nam & id ipsum aliis aspexisse ferebatur, & ex horarum ratione comperum est, eo ipso temporis momento Codurium expirasse: & alioqui non fuit, cur amicissimi viri cognito excessu domum extemplò reverteretur, vel ad piaculare sacrum ejus causa de more faciendum rectà pergere omitteret. Id autem accidit anno post Virginis partum M. D. XLI. quarto Kalendas Septembris. Eodem ferè loco deinde quiddam aliud accidit non absimile. Cùm Stephanus Baroëlius Novocomensis, qui vivit adhuc, periculoso morbo implicitus teneretur, & cunctis de illius vita sollicitis, Ignatius pro viri valetu-

dine in eadem illa quam diximus æde sancti Petri in Monte aureo perlitasset ; in reditu comitem læto vultu compellans (is fuit Petrus Ribadeneira Toletanus , qui hæc ipsa mandavit litteris) non moriturum ex eo quidem morbo Stephanum constanter asseveravit ; nec vana fuit prædictio : siquidem haud ita multo pòst , ægrotus non sine magna omnium admiratione convaluit. Cùm Patavij nostris ad gymnasium , & reliqua Societatis munera , sanctæ Mariæ Magdalenæ templum & ejus templi vectigalia tribuisset Andreas Lipomanus egregia pietate vir , cujus mentionem antea fecimus ; de adeunda loci possessione grave certamen à nobilissimis viris injectum est. Venetiis tum Laines & Salmeron Societatis causam agebant ; ij ad rem perficiendam omni conatu nequicquam adhibito , cùm adversariorum potentiâ valde premerentur , ac penè ab incœpto desistere decrevissent ; postremò (quod unum reliquum videbatur esse perfugium) per litteras totam rem Ignatio commendant. Ille , cùm quintâ circiter feriâ literas accepisset , postridie (qui dies erat natalis Deiparæ Virginis) re divinâ peractâ , respondit CHRISTI causam ne defererent ; eodem adjuvante , voti compotes fore , nec vana fuere promissa : quippe , re in Senatu diu multumque

que agitatâ, denique possessio nostris adjudicata est cunctis ferme suffragiis : atque à peritis rerum æstimatoribus non leve miraculum est habitum, in ejusmodi civitate, à duobus ignotis & peregrinis hominibus, clarissimorum civium opes & gratiam superatam fuisse. Paulo I V. Pontifice maximo, cum inter bellicos tumultus vir quidam princeps, qui nuper est mortuus, Collegij Germanici tutelam ac patrocinium, oneris & impendij gravitate defatigatus, abjicere cogitaret, idemque auctor esset Ignatio, ut, ne in re jam desperata ac penè collapsa diutiùs operam & oleum perderet ; sanè fortiter Ignatius illi respondit : Faceret ipse quod vellet : se quidem, quoad viveret, eam procurationem nunquam esse depositurum ; neque verò dubitare se, quin tam præclarè inchoatum opus divina providentia conservatura esset ; ac datura aliquando Pastorem, qui non modò necessariis, verùm etiam copiosis ad victum cultumque vectigalibus, id Collegium instrueret. Per eadem ferè tempora, vir quidam pecuniosus, templi nostri miseratus angustias, ædem nobis ædificare voluit laxiorem, sed cum is descriptionem quandam suam sequeretur, cum dignitate quidem illam & elegantia, verumtamen ad religionis nostræ usus parum idoneam,

Ignatius piam viri voluntatem utique accepit, egitque, ut debuit, gratias : rem verò ipsam animo fidenti rejecit, quòd sibi compertum esse diceret, non defuturum olim, qui templum nostris muneribus accommodatum exstrueret. Quarum duarum præsensionum alteram, Gregorij XIII. Pontificis maximi summa, ut dictum est, pietas atque benignitas ; alteram, Alexandri Farnesij Cardinalis amplissimi eximia religio, & regia planè magnificentia comprobavit. Alia item de Ignatio miranda narrantur: quæ quia mihi haud satis explorata sunt, necesse non habui adscribere ; præsertim quòd clarorum hominum sanctitas, non tam signis atque miraculis, quàm charitate in Deum, & vitæ innocentiam continetur.



Ejusdem Forma, & Statura corporis.

C A P. X V.

STATURA fuit modicâ, & grato & pleno dignitatis aspectu, colore inter album & aquilum ; ex porrectâ lataque fronte, vivacibus oculis, oblongo & incurvo naso, quam vel in primis certam prudentiæ notam metoposcopi existimant :

LIBER TERTIUS. 321


claudicavit nonnihil è vulnere olim in propugnatione Pompelonenſis arcis accepto, ſed citra ullam deformitatem; ut nemo ferè niſi curioſus animadverteret. Effigies circumfertur illius, non admodum ad vivum, ut familiares affirmant; ſiquidem ex mortui demum facie, gypſo imaginem expreſſere plañtæ; quoniam ipſe, dum viveret, neque pingi ſe, neque ſingi permiſit, omnibus in rebus humanæ gloriæ contemptor egregius; ac dignus proſectò, cujus vitæ ſanctimoniam præſtantiſſimasque virtutes, pia poſteritas, tanti parentis memor, in omne tempus imitetur & celebret,

F I N I S.




CAPITUM INDEX.

LIBRI PRIMI.

CAP. I.	 RTVS ejus & educa- tio.	pag. 1
II.	Conversio ejus ad Chri- stum.	5
III.	Ad Montem Serratum religionis causa proficiscitur.	16
IV.	Acta ejus in Monte Serrato.	22
V.	Ardores ejusdem in studio pœni- tentia.	25
VI.	Molestia scrupulorum, ac tentatio- nes ejusdem.	28
VII.	Ignatij profectus in spiritu.	36
VIII.	De studio collocato ad proximos adjuvandos.	40
IX.	E gravi morbo periclitatur.	43
X.	De inanis gloria vitio superato.	45
XI.	De profectioe hierosolymitana.	47
XII.	Navigat in Italiam.	49
XIII.	Navigat in Palestinam.	56
XIV.	Palestina loca sancta perlustrat.	59
XV.	In Hispaniam redit.	65
XVI.	Barcinone ad studia litterarum	

CAPITUM INDEX.

	<i>aggreditur.</i>	72
XVII.	<i>Ijusdem commoratio Compluten-</i> <i>sis.</i>	79
XVIII.	<i>Lutetiam proficiscitur.</i>	94
XIX.	<i>Extrema inopia incommoda supe-</i> <i>rat.</i>	97
XX.	<i>Variè propter Christum exercetur,</i> <i>102</i>	
XXI.	<i>De sociis ad Ignatiũ adjunctis.</i>	109




LIBRI SECUNDI.

CAP. I.	Æ Ger Hispaniam repetit.	118
II.	Æ Venetias ingenti labore con- <i>tendit.</i>	125
III.	<i>Venetias ad Ignatium socij ve-</i> <i>niunt.</i>	130
IV.	<i>Sacris initiatur Ignatius : & de</i> <i>rebus ab eodem & sociis in Veneta</i> <i>ditione gestis.</i>	138
V.	<i>Ignatio Romam appropinquanti</i> <i>Christus apparet & unde Societati</i> <i>Jesu nomen inditum fuerit.</i>	144
VI.	<i>Ignatius Roma , Christianæ rei</i> <i>dat operam. In Cassinati mon-</i> <i>te animam Hæzj cælum intran-</i> <i>tem videt.</i>	148

CAPITUM INDEX.

- CAP. VII. *Romam Patres universi conveniunt : veterem plebis erudenda morem & frequentem usum confessionis & Eucharistia restitunt.* 153
- VIII. *Falsis criminibus circumvenitur Ignatius & absolvitur.* 155
- IX. *Ignatius & ceteri Patres de constituenda societate deliberant.* 168
- X. *Patres in varia loca Pontificis jussu discodunt.* 168
- XI. *Ignatius plebi fame periclitanti succurrit.* 178
- XII. *Confirmatur à Pontifice maximo Societas.* 182
- XIII. *Præpositus generalis creatur Ignatius.* 185
- XIV. *Generalis Ignatius denuo catechista munere fungitur.* 194
- XV. *Societas augetur , distribuuntur Provincia.* 196
- XVI. *Varia in Ignatium tempestates excitantur.* 190
- XVII. *Regimen fœminarum à societate depellit Ignatius.* 202
- XVIII. *Honoribus in societatem nostram Ignatius aditum obstruit.* 205
- XIX. *Confirmatur à Julio III. societas.* 217

- XX *Magistratu sese abdicare conatur Ignatius.* 218
- XXI. *Societati in Hispania valde laboranti succurrit.* 222
- XXII. *De Iulij III. obitu & de Marcelli II. in Ignatium nostrosque benevolensia.* 226
- XXIII. *Ignatij obitus.* 228



LIBRI TERTII.

- CAP. I. **D**E Orandi assiduitate, & studio pietatis. 233
- II. *Quod eius fuerit de perfectione iudicium.* 240
- III. *De Charitate ipsius in Deum.* 242
- IV. *De Charitate in proximos.* 244
- V. *Mansuetudo ejusdem & comitas.* 252
- VI. *Gravitas ejusdem & in custodia disciplina severitas.* 256
- VII. *Ejusdem animi submissio, & quidnam de virtute obedientia senserit.* 262
- VIII. *Paupertas ejus & castimonia.* 270
- IX. *Æquitas animi & constantia ejusdem.* 272

CAPITUM INDEX.

- CAP. X. *Ejusdem ratio gubernandi.* 283
 XI. *Ejusdem ratio proximos adjuvan-*
di. 294
 XII. *Vita ejus quotidiana & domestica.*
 297
 XIII. *Pietatis opera publicè per eum in-*
stituta. 300
 XIV. *Quadam de Ignatio mira.* 306
 XV. *Ejusdem forma & statura corpo-*
ris. 320

FINIS.

P E R M I S S I O N.

VE u la Requeste dudit M O L I N;
Je n'empesche pour le Roy, que ledit
Livre soit Imprimé par ledit M O L I N;
avec deffences à tous autres en tel cas
requises Fait ce dernier jour de Janvier
1658.

V I D A U D.

SOit fait suivant les Cōclusions du
Procureur du Roy ; ce dernier jour de
Janvier 1658.

S E V E.

1/2 the time

at the same rate

as before

the same

the same

the same

the same

the same

the same

the same

the same

the same

the same

the same

the same

the same

the same

the same

the same

the same

the same

the same

the same

the same

ALPH

